

## Ini Sa Medoo

# BINAELAN SA SALU I HÉSUS

**Ini Denu Sa Binaelan Sa Medoo Salu I Hésus**

*Na, si Lukas sa migsulat siini libelu. Ini sa nekeuman diyà sa muna igsulat di diyà sa mapulù etaw si Tiyopilu.*

*Diyà siini libelu, egtulonen i Lukas sa medoo binaelan sa medoo etaw pinetegudon i Hésus. Tinulon i Lukas sa denu sa Mepion Tegudon nekeseluh diyà sa langun menuwa. Tinulon di ma denu sa ketegudon sa medoo salu i Hésus diyà sa medoo duma da etaw Hudiyu, agulé diyà sa medoo balangan etaw beken Hudiyu ma taman sa egoh da nekeangay mediyù dò.*

*Migtulon ma Lukas i denu sa Metiengaw Suguy i Nemula pineangay i Nemula diyà kenagda. Danà sa ketabang sa Metiengaw Suguy i Nemula, egpekegaga da egbael sa langun igsugù i Nemula diyà kenagda. Owoy tinulù sa Metiengaw Suguy di ma kagda denu sa egbaelan da.*

*Na, si Lukas sa duma i Pabelo mig-angay egtegudon sa kagi i Nemula dutu siedò medoo mediyù menuwa. Endà mglekas di diyà kenagdi, apiya di pa nebilanggu Pabelo i dutu Loma dò.*

### Igsulat I Lukas Diyà Si Tiyopilu

**1** 1O Akay Tiyopilu, egoh ku anay migsulat diyà keniko, tinulon ku sa langun binaelan i Hésus owoy sa igtulù di ma edung sa egoh di anay egtulù 2,3taman sa egoh di nebatun dutu langit dò. Egoh di neenaw dema egoh di nematay, takà egpehaa Hésus i diyà sa medoo salu di hinemili di owoy tinulù di ma kagda denu sa kedatu i Nemula. Taman epat pulù agdaw, takà egpehaa Hésus i diyà kenagda. Huenan di, tigtu egketiigan da nehagtay

dema Hésus i enù ka hinaa da kagdi. Egoh di endà pa nebatun dutu langit dò, tinulù di kagda danà sa egkegaga sa Metiengaw Suguy i Nemula.

4Na, sebaen agdaw egoh da nesetipon, eg-ikagi Hésus i diyà sa medoo salu di, guwaen di, "Ugpà yu diyà Hélusalém. Angati yu sa ketuu sa igpasad i Nemula, sa tapay tinulon ku diyà keniyu. 5Egoh anay migbautis si Huwan sa medoo etaw diyà wayeg anì tandaan da sa kepigtuu da. Dodoo endà melugay di iya sa ibautis i

Nemula keniyu sa Metiengaw Suguy di lumuhub diyà keniyu.”

**Ini Sa Ego I Hésus Nebatun**

6Na, ego sa medoo salu i Hésus nesetipon dema, eg-igsà da diyà kenagdi, guwaen da, “O Datù, enù di ya, ini ego di sa agdaw ego ko humemaga sa etaw beken Hudiyu egkedatù diyà kenita, anì ipelikù ko sa kedatù ta diyà sa duma ta tugod i Islaél?”

7Egsagbì Hésus i, guwaen di, “Endà metiigan yu duu sa atas di, enù ka si Emà ta Nemula daa sa meketiig iya wé danà sa hagdi egkegaga. 8Dodox yoko egkelifeng duu ini i. Amuk tumebow sa Metiengaw Suguy i Nemula diyà keniyu, tunungan yu anì meketulù yu denu kenak diyà Hélusalém, owoy diyà sa langun menuwa diyà uwang Hudiya owoy uwang Samaliya, owoy taman siini sinukub langit.”

9Ego di neabus eg-ikagi, egkebatun Hésus i dutu langit dò. Ego da eghaa, nekedilung dé Hésus i diyà gaeb owoy endà dé hinaa da duu. 10Ligò di egkebatun, eglengag da eg-inengteng diyà langit. Petow dé duen sa duwa egsugusuguen i Nemula migkawal mebulà migtebow diyà kenagda. 11Eg-ikagi da, guwaen da, “O medoo tegeGaliliya, yoko eglengag ga. Nebatun Hésus i miglikù dutu langit dò. Dodox

pelikù mendaan diyà tanà éhê mendaan sa kehaa yu ego di nebatun dutu langit dò.”

12Agulé, miglikù sa medoo salu i Hésus dutu Hélusalém dò kedu diyà Getan Olibu. Sakakilumitelu kéen sa kediyù di kedu diyà Hélusalém.

**Ini Sa Ego Da Mighemilì Sa Sebaen Salu**

13Na, ego sa medoo salu i Hésus migtebow diyà Hélusalém, nesetipon da diyà sa bilik dalesan kenà da eg-ugpà. Ini sa nesetipon, si Pidelu owoy si Huwan owoy si Santiyago owoy si Andelis, si Pilipi owoy si Tomas, si Baltolomi owoy si Matéyo, owoy sa sebaen ma Santiyago anak i Alpiyo, owoy sa sebaen ma Simon sa mebagel eghemalang sa tanà Hudiya, owoy sa sebaen Hudas anak sa sebaen Santiyago. 14Takà da egkesetipon owoy nesesebaen sa pedu da langun amuk egimbà da. Nesetipon ma sa medoo bayi dahiyà, owoy sa medoo hadi i Hésus owoy sa inay di ma, si Maliya.

15Na, sebaen agdaw nesetipon sa medoo etaw egiptuu, duen kéen magatus duwa pulù sa kedoo da. Egtigdeg Pidelu i owoy eg-ikagi, guwaen di, 16“O medoo loyuk ku, neketuu dé sa kagi igpesulat sa Suguy i Nemula diyà si Dabid ego anay denu si Hudas sa eg-enggat sa medoo etaw anì

egsigkemen da Hésus i. 17Si Hudas sa duma ké, enù ka kagdi ma sa hinemilì i Hésus anì mulig diyà sa galebek ké.”

18Na, duen sa pilak kinuwa i Hudas danà sa binaelan di medaet, owoy iya sa igbeli di tanà. Agulé migpetoyò Hudas i. Hê, nenabù owoy nebetù sa getek di. 19Netiigan sa langun etaw tegeHéusalém iya wé binaelan di. Huenan di, egpengadanán da sa tanà di, Akildama, enù ka iya sa selepangan di, tanà binayadan di depanug.

20Eg-ikagi dema Pidelu i, guwaen di, “Neketuu dé sa kagi i Dabid igsulat egoh anay diyà sa libelu ta Isalem, guwaen di, ‘Meigtohon sa dalesan di.

Endà dumuen etaw mugpà dahiya.’<sup>a</sup>

Duen ma sa kagi i Nemula igpesulat diyà sa libelu Isalem, guwaen di,

‘Pesambì sa sebaen etaw sa galebek di.’<sup>b</sup>

21,22Na, mepion amuk hemilien ké sa sebaen etaw munut kenami sa mighaa si Datù Hésus nehagtay dema egoh di nematay. Mepion ma amuk kagdi sa duma ké takà mig-unut kenami edung sa egoh i Hésus migpebautis diyà si Huwan taman sa egoh di nebatun langit dò.”

23Agulé, hinemilì da sa duwa maama, si Matiyas owoy si Hosé. Iya ma sa ngadan i Hosé, si Balsabas owoy si Husto.

24Agulé egimbà da, guwaen da, “O Datù ké, netiigan ko sa pedu sa langun etaw. Huenan di, petiigi ko diyà kenami sa tayu di etaw hinemilì ko 25mekesambì si Hudas anì dumuen sa sebaen ma salu egbulig kenami, enù ka sinalidan i Hudas sa galebek di danà di mig-angay diyà sa hagdi kenà sa ketamanan sa langun etaw tegebael medaet.”

26Agulé egoh da migsimbà, egkusing da eghemilì. Hê nehemilì Matiyas i. Agulé, pineunut da kagdi diyà sa sepulù owoy sebaen salu i Hésus.

#### Ini Sa Egoh Sa Suguy I Nemula Migluhub Diyà Kenagda

**2** 1Na, egoh di neuma sa agdaw sa Pista Pintikostis, nesetipon diyà sa sebaen dalesan sa langun etaw epgigtuu diyà si Hésus. 2Petow dé duen sa dagì dinineg da kedu langit dò éhê delegdeg kelamag. Nebelet dagì di sa dalesan kenà da nesetipon. 3Agulé, hinaa da sa éhê legleg apuy nepalak owoy netukid sa pulu sa langun etaw nesetipon. 4Hê, migluhub sa Metiengaw Suguy i Nemula

<sup>a</sup> 1:20a Basa ko Isalem 69:25.    <sup>b</sup> 1:20b Basa ko Isalem 109:8.

diyà kenagda. Mig-edung da eg-ikagi sa medoo balangan kagi endà netiigan da duu, enù ka egpeikagiyen sa Metiengaw Suguy i Nemula kagda.

5Na, duen medoo metiengaw etaw Hudiyu kedu diyà sa langun balangan tanà eg-ugpà diyà menuwa Hélusalém. 6Egoh da migdineg sa metaled kagi, medoo da nesetipon. Negaip da temù, enù ka egkedineg sa uman sebaen etaw sa hagdi balangan kagi inikagi sa medoo etaw egpigtuu. 7Tigtu da negaip temù sa medoo etaw egdineg, owoy eg-ikagi da, guwaen da, “Anan tegeGaliliya ini i medoo etaw eg-ikagi. 8Maen di ya megaga da mikagi sa tapay kagi ta? 9Medoo sa keduwan ta, enù ka duen etaw dahini tegePaletiya, owoy etaw tegeMidiya, owoy etaw tegellam. Duen ma etaw kedu Misopotamiya, owoy etaw tegeHudiya, owoy etaw kedu Kapadosiya, owoy etaw kedu Ponto, owoy etaw kedu Asiya. 10Duen ma etaw kedu Peligiya, owoy etaw kedu Pampiliya, owoy etaw kedu Igipu, owoy etaw kedu uwang Libiya medapag diyà Silini. Duen ma etaw kedu Loma, etaw Hudiyu owoy etaw beken Hudiyu egpangunut diyà sa adat Hudiyu. 11Duen ma etaw kedu Kelita, owoy etaw kedu Alabiya. Dodoo egdinegen ta

langun diyà sa medoo balangan kagi ta sa tinulon sa medoo etaw tegeGaliliya denu sa mepion binaelan i Nemula.”

12Na, tigtu da negaip temù owoy egkebogo sa penemdem da. Egseigsaay da, guwaen da, “Ngadan sa selepangan ini i?”

13Dodox duen ma liyu etaw egpeumàumà sa medoo etaw egpigtuu, guwaen da, “Eghiluwen da dé danà da eg-inem wain.”

#### **Ini Sa Ego I Pidelu Migtulù Kenagda**

14Agulé, egtigdeg da Pidelu i owoy sa sepulù owoy sebaen salu i Hésus. Egpetaled Pidelu i eg-ikagi, guwaen di, “O medoo etaw Hudiyu owoy sa kedoo yu eg-ugpà diyà Hélusalém, dineg-dineg yu, hih, enù ka duen sa tulonen ku diyà keniyu. 15Sa penemdem yu guwaen yu dò eghiluwen ké wain, dodoo endà eghiluwen ké enù ka endà pa meedup sa agdaw. 16Dodoo tigesa sa medoo hinaa yu giina, enù ka neketuu dé ini ego di sa medoo kagi igsulat i Howil sa tegesugkow i Nemula ego anay, guwaen di,

17 ‘Ini sa kagi i Nemula.

Amuk buyu meuma sa  
sabuhanan agdaw,  
ipeluhub ku sa Suguy ku  
diyà sa langun etaw.  
Tumulon sa medoo anak yu,  
maama owoy bayi, sa kagi

ku egtebowtebow diyà  
kenagda.  
Dumuen sa ipehaa ku diyà sa  
medoo batàbatà maama  
diyà keniyu.  
Tegeinepen ma sa medoo  
lukes maama diyà keniyu  
sa ipehaa ku kenagda.

**18** Tuu ini i. Amuk meuma iya  
wé,  
ipeluhub ku sa Suguy ku  
diyà sa medoo etaw  
egpangunut diyà kenak,  
iling ka maama ataw ka  
bayi,  
owoy tumulon da sa kagi ku  
egtebowtebow diyà  
kenagda.

**19** Ipehaa ku sa medoo  
panduan diyà awang,  
owoy dumuen ma sa medoo  
egkegaipan etaw diyà tanà.  
Dumuen sa depanug owoy sa  
apuy owoy sa mekepal  
ebel.

**20** Dumeleman sa agdaw  
owoy kumelalegà sa bulan  
mekeiling depanug  
amuk buyu tumebow siedò  
agdaw ku sumambì sa  
tanà.  
Megaipan sa langun etaw  
owoy oloen da aken danà  
siedò agdaw ku hauwen  
da.

**21** Dodoo mealukan doo sa  
langun etaw umumow diyà  
si Datù.<sup>c</sup>

22“Na, o medoo duma ku  
tugod i Islaél, dinegdineg yu,  
hih, sa eg-ikagiyen ku diyà  
keniyu. Si Hésus tegeNasalét sa  
Tigtu Datù sinugù i Nemula  
diyà tanà. Iya sa tandà di kagdi  
sa pineangay i Nemula sa  
medoo tandà hinaa yu owoy sa  
medoo panduan igpebael i  
Nemula diyà kenagdi. Netiigan  
yu dé enù ka diyà keniyu sa  
egoh di egbael iya wé. 23Tapay  
dé netiigan i Nemula sa kebael  
yu si Hésus, dodoo danà doo sa  
ungayà i Nemula sa kesikem  
yu kenagdi. Igsugù yu Hésus i  
igpetutuk diyà sa medoo etaw  
tegebael salà anì ipeimatay yu  
kagdi. 24Dodox inenaw i  
Nemula mendaan egoh di  
nematay. Linaun di sa anak di  
kedu diyà sa lebeng di enù ka  
endà mekeatu sa kepatay etaw  
diyà kenagdi. 25Egoh anay  
migsulat Dabid i denu si Hésus,  
guwaen di,  
‘Netiigan ku takà eg-unut  
kenak Nemula i.  
Denu kuwanan ku anì  
egbulig kenak,  
huenan di endà mebogo a.

**26** Iya maen di ya tigtu neiyap  
sa pedu ku  
owoy oloen ku Nemula i.  
Apiya di pa nematay sa lawa  
ku,  
duen doo sa mepion  
eg-angat-angatan ku,

<sup>c</sup> 2:17-21 Basa ko Howil 2:28-32.

27 enù ka netiigan ku endà tangtangen di sa suguy ku dutu bayà dò.  
 Owoy endà mebaluy di diyà kenagdi amuk meledak sa lawa ku,  
 enù ka hinemilì di aken.

28 Igpetiig di diyà kenak dumuen sa lalù ku endà meelut di.  
 Tigtu mepion sa pedu ku enù ka takà eg-unut diyà kenak.<sup>d</sup>

29“O medoo loyuk ku, metumàmà sa kagi ku diyà keniyu denu sa tupù ta si Dabid. Egoh anay nematay Dabid i owoy iglebeng dé dalem sa batu tinosongan etaw. Tapay doo duen sa lebeng di diyà kenita taman ini egoh di. 30Dodox egoh i Dabid endà pa nematay, kagdi sa tegesugkow i Nemula owoy netiigan di sa igpasad i Nemula diyà kenagdi. Igpasad i Nemula dumuen sa sebaen tugod di kumedatù iling sa kedadù di. 31Egoh anay netiigan i Dabid sa baelan i Nemula, huanan di migtlon denu sa keenaw sa Tigtu Datù sinugù i Nemula, guwaen di,  
 ‘Endà metangtang di dutu bayà dò,  
 owoy endà ma meledak sa lawa sa etaw hinemilì di.’

32Na, netiigan ké mig-ikagi Dabid i denu si Hésus, enù ka

inenaw i Nemula Hésus i egoh di nematay owoy hinaa ké langun sa egoh di nehagtay dema. 33Pinedakel i Nemula kagdi owoy pinepenuu di denu kuwanan di. Pinetuu di dé sa igpasad di diyà kenagdi sa kepeangay di sa Metiengaw Suguy di diyà kenita, owoy iya sa hinaa yu giina owoy sa dinineg yu ma. 34Na, beken sa lawa i Dabid sa nebatun dutu langit dò, dodox si Hésus polo sa nebatun. Egoh anay igsugkow i Dabid sa kagi i Nemula, guwaen di,  
 ‘Mig-ikagi Nemula i diyà sa Datù ku, guwaen di,  
 Penuu ka dahini denu kuwanan ku

35 taman atuwan ku sa medoo kuntelà ko owoy ipeutuh ku keniko.<sup>e</sup>

36“Na, o medoo tugod i Islaél, apiya di pa inimatayan yu Hésus i egoh yu migtutuk kenagdi diyà sa kayu ighbugsud, ipetiig ké doo diyà keniyu kagdi sa hinemilì i Nemula sa Datù ta owoy sa Tigtu Datù sinugù di diyà tanà.”

37Na, egoh sa medoo etaw migdineg sa inikagi i Pidelu, tigtu nebogo sa pedu da. Eg-igsà da diyà kenagdi owoy sa duma salu i Hésus, guwaen da, “O Akay, ngadan sa mebaelan ké, kami i?”

<sup>d</sup> 2:25-28 Basa ko Isalem 16:8-11. <sup>e</sup> 2:34-35 Basa ko Isalem 110:1.

38Egsagbì Pidelu i, guwaen di, "Ekedi yu dé sa salà yu owoy pebautis yu anì metandaan di sa kepigtuu yu diyà si Hésus Kelistu. Amuk epgigtuu yu, ipeuloy i Nemula sa medoo salà yu owoy mesakem yu sa Metiengaw Suguy i Nemula ibegay di diyà keniyu. 39Egoh anay igpasad i Datù ta Nemula ibegay di sa Suguy di diyà keniyu owoy diyà sa medoo tugod yu owoy diyà sa medoo etaw mediyù, enù ka begayan di sa langun etaw igsasà di anì migtuu da."

40Na, medoo ma sa kagi i Pidelu diyà kenagda. Isasà di kenagda, guwaen di, "Yoko eg-unut ta diyà sa duma yu tegebael medaet anì endà mepigtamayan yu."

41Agulé, medoo sa etaw epgigtuu sa kagi i Pidelu owoy egpebautis da ma. Duen buyu telu ngibu etaw epgigtuu egoh iya wé agdaw, owoy nekeunut da sa medoo muna epgigtuu. 42Takà da egdinegdineg sa ketulù sa medoo salu i Hésus. Egseamutay sa medoo etaw epgigtuu, owoy nesetipon da amuk egsimbà da diyà si Nemula owoy amuk eg-ilingan da sa ketepitepi epan sa ketulù i Hésus kenagda.

#### **Ini Sa Binaelan Sa Medoo Etaw Epgigtuu**

43Na, duen medoo panduan owoy medoo tandà egkegaipan

etaw egbaelan sa medoo salu i Hésus. Huenan di, tigtu negaip sa langun etaw. 44Takà egkesetipon sa langun etaw epgigtuu owoy nesesebaen sa pedu da. Huenan di, egsebegayay da sa medoo langun taman da. 45Egdagangen da ma sa tanà da owoy sa medoo langun taman da, owoy itukid da ibegay sa pilak da diyà sa duma da egkepasangan. 46Egkesetipon da uman agdaw diyà sa Dalesan i Nemula, owoy eg-angay da egkaen diyà sa hagda dalesan. Tigtu neanggan da egoh da neseunut egkaen. 47Eg-loolen da takà Nemula i, owoy netuuwan sa medoo liyu etaw diyà kenagda. Uman agdaw egkeumanan sa kedoo etaw eg-alukan i Nemula.

#### **Ini Sa Egoh Sa Pikit Nelikuan**

**3** 1Na sebaen agdaw, eg-angay Pidelu i owoy si Huwan diyà sa Dalesan i Nemula egoh di alas telu dé mahapun, enù ka iya sa ulas da egsimbà. 2Duen sa maama pikat inuwit di miglesut sa kepikatan di egpennu diyà sa bengawan sa Dalesan i Nemula kepengadan da sa Metolol Pintuan. Uman agdaw eg-uwiten sa medoo duma di anì megeni pilak diyà sa medoo etaw eggemow dahiya. 3Egoh di mighaa si Pidelu owoy si Huwan eggemow diyà sa Dalesan i Nemula, egpegeni pilak diyà

kenagda. **4**Agulé egoh da eghaa sa pikat, guwaen i Pidelu diyà kenagdi, “Inengteng ko kami.”

**5**Huenan di, eghahaa sa pikat diyà kenagda enù ka eg-angat-angat pilak diyà kenagda. **6**Dodox guwaen i Pidelu, “Endà duen pilak ku, dodox begayan ku kuna sa mekebegay ku. Huenan di, danà sa tunung i Hesus Kelistu tegeNasalét, bigkat ka dé.”

**7**Agulé, egsabaan i Pidelu sa belad di denu kuwanan owoy pinetigdeg di. Hê, petow dé nebegeng sa lisen di owoy migkebagel ma dé. **8**Huenan di, egtigdeg owoy egbigkatbigkat. Agulé, eg-unut diyà si Pidelu owoy si Huwan lumudep diyà sa Dalesan i Nemula. Egbigkatbigkat owoy egsautsaut owoy eg-oloen di ma Nemula i. **9**Eghauwen sa langun etaw dahiya sa maama egbigkat owoy eg-olò si Nemula. **10**Egkilalaen da kagdi sa etaw takà egpegeni pilak diyà sa Metolol Pintuan sa Dalesan i Nemula. Huenan di, tigtu negaip da enù ka hinaa da nekebigkat dé sa pikat.

#### **Ini Sa Egoh I Pidelu Egtulù Diyà Sa Dalesan I Nemula**

**11**Na, egoh i Pidelu owoy si Huwan diyà sa luglug Dalesan i Nemula kepengadan da Luglug i Salomon, egsabà pelà diyà kenagda sa maama nelikuan

danà di neanggan temù. Agulé, egletu sa medoo etaw eg-angay diyà kenagda enù ka tigtu da negaip. **12**Egoh i Pidelu mighaa sa medoo etaw nesetipon, eg-ikagi, guwaen di, “O medoo duma ku tugod i Islaél, yoko egkegaip duu sa hinaa yu. Yoko eg-inengteng duu kami, enù ka beken danà sa nami tunung sa nekegaga ebulung siini maama, owoy beken ma danà sa ketiengaw ké. **13**Dodox si Nemula sinaligan sa tupù ta si Ablaham owoy si Isak owoy si Hakob, kagdi polo sa nekegaga ebulung siini maama. Binulungan di kagdi anì meolò Hesus i pineangay di diyà tanà. Dodox kiyu, igbegay yu Hesus i diyà sa egkegaga i Gubilenu Pilatu. Apiya di pa ungayà i Pilatu lengaan di Hesus i, hinawidan yu polo anì meimatayan sa pineangay i Nemula diyà kenita. **14**Apiya di pa metiengaw Hesus i owoy endà duen salà di, inekedan yu doo. Migpegeni yu polo diyà si Pilatu anì lengaan di sa sebaen etaw tegeimatay. **15**Igpeimatay yu polo Hesus i, sa ebgay lalù endà meelut di diyà sa langun etaw, dodox inenaw i Nemula kagdi i egoh di nematay. Tuu iya wé, enù ka hinaa ké kagdi i egoh di mig-enaw dé. **16**Danà sa tunung i Hesus, nelikuan dé siini maama hinaa yu owoy kinilala yu. Danà di migpigttuu diyà si Hesus, nelikuan dé owoy

nekebigkat ma dé, owoy iya sa hinaa yu ini egoh di.

17“O medoo duma ku, netiigan ku doo inimatayan yu lapeg sa medoo ulu-ulu yu Hésus i, enù ka endà netiigan yu duu kagdi sa Tigtu Datù sinugù i Nemula. 18Dodox danà iya wé kebael yu, igpetuu i Nemula sa kagi di igsugkow sa medoo tegesugkow di egoh anay, guwaen da, ‘Meimatayan sa Tigtu Datù peangayen i Nemula diyà tanà.’ 19Huenan di, ekedi yu dé sa medoo salà yu owoy pangunut yu diyà si Nemula anì ipeuloy di sa salà yu. 20Amuk hediya sa baelan yu, kumelanh sa pedu yu danà i Datù Nemula owoy pelikuen di ma Hésus i sa Tigtu Datù hinemili di. 21Dodox mugpà pelawà dutu langit dò taman sa egoh i Nemula meluman sa langun taman, enù ka iya sa igpasad di igesugkow di diyà sa medoo tegesugkow di egoh anay. 22Egoh anay, mig-ikagi Mosis i diyà sa medoo tugod i Islaél, guwaen di,  
 ‘Peangayen i Datù Nemula sa sebaen tegesugkow di diyà keniyu,  
 éhè mendaan sa kinepeangay di kenak.  
 Kagdi ma sa tugod yu.  
 Dinegdineg yu sa langun tulonen di diyà keniyu.

23 Amuk duen etaw endà egpangunut diyà sa eg-ikagiyen di,  
 iya sa etaw beken etaw i Nemula owoy mekesugsug ma.<sup>f</sup>

24“Na, sa langun tegesugkow i Nemula egoh anay, si Samuwél owoy sa medoo nekehudihudi kenagdi, anan da egtulon denu sa ketebow i Hésus Kelistu. Hê, neketuu dé ini egoh di sa kagi da egoh anay. 25Kita ma sa pinasadan i Nemula, enù ka tinulon sa medoo tegesugkow di sa pasad di diyà kenita. Neketuu dé ini egoh di sa pasad di diyà sa medoo tupù ta, enù ka mig-ikagi Nemula i diyà si Ablaham egoh anay, guwaen di, ‘Mesugkudan sa langun etaw diyà tanà danà sa sebaen tugod ko.’<sup>g</sup>

26Huenan di, kita sa muna pineangayen i Nemula si Hésus anì tabangan di kita amuk ekedan ta sa salà ta.”

#### Ini Sa Egoh I Pidelu Owoy Si Huwan Migsagbì Diyà Sa Medoo Ulu-ulù

**4** 1Na, egoh i Pidelu owoy si Huwan eg-ikagi pelà diyà sa medoo etaw nesetipon, duen migtebow diyà kenagda sa medoo tegesimbà owoy sa

*f* 3:22-23 Basa ko Dutilonomiyu 18:15,19. *g* 3:25 Basa ko Génésis 22:18.

ulu-ulù sa medoo tegebantay Dalesan i Nemula. Duen ma medoo etaw Sadusiyu eg-unut kenagda. Na, iya sa penemdem etaw Sadusiyu endà dé umenaw gaa sa etaw nematay. 2Huenan di, egbulit da, enù ka egtulù Pidelu i owoy si Huwan mig-enaw Hésus i egoh di nematay, huenan di mebaluy doo umenaw sa langun etaw nematay. 3Hè, egsigkemen da Pidelu i owoy si Huwan. Egbilangguwen da kagda segdu enù ka mahapun dé owoy ungayà da igsaan da kagda amuk umenaw simag. 4Dodox egpigtuu dé sa medoo etaw migdineg sa inikagi i Pidelu owoy si Huwan. Buyu lima ngibu dé sa kedoo maama egpigtuu diyà si Hésus, lapeg sa tapay egpigtuu.

5Na, egoh di umenaw simag, egkesetipon diyà Hélusalém sa medoo ulu-ulù etaw Hudiyu owoy sa medoo kaunutan Hudiyu owoy sa medoo tegetulù uledin igsugkow i Mosis. 6Dahiya ma Anas i sa Tigtu Ulu-ulù Tegesimbà, owoy si Kayipas, owoy sa sebaen Huwan, owoy si Alihandelo, owoy sa medoo tigtu duma i Anas. 7Agulé, egpetigdegen da Pidelu i owoy si Huwan diyà sa taengan da, owoy eg-igsaan da kagda, guwaen da, “Enù di ya

sa kebael yu? Ngadan di etaw sa ebgbegay tunung diyà keniyu? Ngadan di etaw sa eg-ingadanan yu anì megaga yu mulung sa pikat?”

8Agulé, linuhub sa Metiengaw Suguy i Nemula Pidelu i owoy egsagbì diyà kenagda. Guwaen di, “O medoo ulu-ulù owoy kaunutan ké, 9eg-igsaen yu kami denu sa panduan binaelan ké diyà sa maama pikat. Eg-igsaen yu ma sa pesuhan di nelikuan dé. 10Tulonon ké kiyu owoy sa langun tugod i Islaél anì metiigan yu sa pesuhan di nelikuan siini pikat. Egtigdeg diyà sa taengan yu owoy nelikuan dé danà sa tunung i Hésus Kelistu tegeNasalét. Si Hésus sa inimatayan yu, dodox inenaw i Nemula kagdi egoh di nematay. 11Na, si Hésus sa tinulon sa kagi i Nemula igpesulat, guwaen di, ‘Sa sebaen batu inekedan yu, kiyu i tegebael dalesan pulung batu, iya polo sa tigtu miulan batu hinemilì ku.’<sup>h</sup>

12Na, endà duen liyu etaw mekealuk kenita denu sa salà ta. Sumalà dé sa etaw diyà siini sinukub langit, endà duen liyu etaw pineangay i Nemula diyà tanà anì alukan di sa medoo etaw denu sa salà da.”

<sup>h</sup> 4:11 Basa ko Isalem 118:22.

13Agulé, tigtu negaip sa medoo ulu-ulü diyà sa Dalesan i Nemula enù ka mebagel Pidelu i owoy si Huwan egsagbì kenagda, apiya di pa tukéey sa pinangagian da. Dodoo netiigan da kagda sa duma i Hésus.

14Dodoo sa medoo ulu-ulü diyà Dalesan i Nemula, endà negaga da duu egsigbolow sa kagi i Pidelu owoy si Huwan enù ka hinaa da sa maama nelikuan egtigdeg dahiya. 15Agulé, pinelaun da Pidelu i owoy si Huwan kedu diyà sa bilik kenà da nesetipon. Iya sa binaelan da anì egseolomoy sa medoo ulu-ulü, 16guwaen da, “Ngadan sa mebaelan ta? Endà mepalaw ta duu iya wé panduan binaelan da, enù ka negaipan sa langun etaw diyà Hélusalém owoy netiigan da ma. 17Mepion polo amuk limedangen ta kagda anì endà manan da tumulon denu si Hésus diyà sa medoo etaw anì endà mekeseluh sa kagi denu kenagdi.”

18Huenan di, egoh da migpedalem dema si Pidelu owoy si Huwan, eghawidan da kagda anì endà kumedoo sa etaw egyptuu diyà si Hésus, guwaen da, “Yoko eg-uman na egtulù denu si Hésus.”

19Dodoo egsagbì Pidelu i owoy si Huwan, guwaen da, “Penemdem yu ini i. Ngadan sa tayu mepion diyà si Nemula, iling ka mangunut ké diyà sa niyu kagi ataw ka

mangunut ké diyà si Nemula?  
20Endà mekesabuh ké umolom denu sa hinaa ké owoy sa dinineg ké.”

21Agulé, eg-umanen sa medoo ulu-ulü Hudiyu eglimedang Pidelu i owoy si Huwan. Agulé linengaan da kagda, enù ka endà duen sa pesuwan da egyptihayen enù ka eg-loen sa langun etaw Nemula i danà sa maama nelikuan dé. 22Na, labi dé epat pulù gepalay sa kelukes sa maama nelikuan.

#### **Ini Sa Egoh Sa Medoo Etaw Egpiptuu Egsimbà**

23Na, egoh i Pidelu owoy si Huwan nekelaun, eg-angay da diyà sa medoo duma da egyptuu owoy egyptulen da diyà kenagda sa kehawid sa medoo kaunutan Hudiyu owoy sa medoo ulu-ulü tegesimbà.

24Egoh sa medoo etaw egyptuu migdineg iya wé, egsimbà da langun diyà si Nemula, guwaen da, “O Datù Nemula, kuna sa migbael sa langit owoy sa tanà owoy sa dagat owoy sa langun taman diyà tanà. 25Kuna ma sa migpeikagi si Dabid, sa tupù ké migpangunut diyà keniko egoh anay, enù ka danà sa Metiengaw Suguy ko, guwaen i Dabid,

‘Maen di ya egbulit sa medoo etaw beken Hudiyu?  
Owoy maen di ya egpenemdem sa etaw

Hudiyu sa pandapat da umatu, dodox endà megaga da duu.

**26** Neseseton sa medoo sulutan diyà tanà anì gumila da, owoy neseseton ma sa medoo ulu-ulù ta anì liputan da Nemula i owoy sa Tigtu Datù sinugù di.<sup>i</sup>

**27** Na, neketuu dé iya wé kagi i Dabid ini egoh di, enù ka dahini diyà Hélusalém neseseton da Hélod i owoy si Ponkiyu Pilatu owoy sa medoo tugod i Islaél owoy sa medoo duma etaw beken Hudiyu anì imatayan da Hésus i, sa pineangay ko diyà kenami, apiya di pa endà duen salà di. Kagdi sa Tigtu Datù sinugù ko diyà tanà.

**28** Inimatayan da kagdi, dodox danà sa dakel egkegaga ko owoy danà sa tapay penemdem ko, tapay dé netiigan ko sa langun kebael da kenagdi. **29** O Datù ké, netiigan ko ma sa kelimedang da kenami i etaw epgangunut diyà keniko. Huenan di, buligi ko kami anì endà melimedangan ké tumulon sa kagi ko. **30** Pehauwi ko sa tunung ko anì melikuan sa medoo etaw eglinadu owoy dumuen ma medoo panduan ko

owoy medoo egkegaipan etaw danà sa tunung i Hésus, sa sinugù ko.”

**31** Na, egoh da neubus egimbà, egkekayung sa dalesan kenà da neseseton. Agulé linuhub sa Metiengaw Suguy i Nemula kagda, huenan di endà dé egkelimedangan da duu egtulon sa kagi i Nemula diyà sa medoo etaw.

#### **Egsebuligay Sa Medoo Etaw Egpigtuu**

**32** Na, nesesebaen sa pedu sa medoo etaw egpigtuu. Endà duen etaw lumaguk sa langun taman di, dodox egsebuligay da takà. **33** Tigtu tinunungan i Nemula sa medoo salu i Hésus anì tumulù da denu sa keenaw i Datù Hésus danà da mighaa kenagdi nehagtag dema. Tigtu egtabangan i Nemula sa langun etaw egpigtuu diyà kagdi.

**34,35** Endà duen etaw pubeli diyà kenagda enù ka egdagangen da sa tanà da owoy sa dalesan da, owoy ibegay da sa pilak diyà sa medoo salu i Hésus anì itukid da ibegay diyà sa medoo duma da egkepasangan.

**36** Na, duen sa maama tegeSipeli, sa tugod i Lebi. Iya sa ngadan di si Hosé, dodox

---

*i* 4:25-26 Basa ko Isalem 2:1,2.

ingadanan sa medoo salu i Hesus kagdi si Bilnabi enù ka tegebulig. 37Dinagang di sa tanà di owoy inuwit di sa pilak ibegay di diyà sa medoo salu i Hesus.

**Ini Sa Egoh I Ananiyas Owoy Si Sapila Migbutbut**

**5** 1Na, duen sa maama si Ananiyas, owoy sa sawa di si Sapila. Dinagang da sa duma tanà da, 2dodoo nesesebaen sa pedu da eglaguk sa pilak di. Agulé inuwit i Ananiyas sa duma pilak di diyà sa medoo salu i Hesus, owoy ubòubò di ibegay imet sa langun pilak. 3Agulé guwaen i Pidelu, “O Ananiyas, maen di ya eg-unutan sa pedu ko sa penemdem i Satanas anì mutbut ka diyà sa Metiengaw Suguy i Nemula? Kulang ini i pilak ko diyà sa lagà sa tanà dinagang ko. 4Egoh ko endà pa egdagang sa tanà, kuna sa épê di, owoy egoh ko migdagang, niko ma sa pilak di. Endà tinegel ka etaw egpebegay pilak egoh ko egdagang sa tanà ko. Maen di ya pinenemdem ko kami eg-akal denu sa lagà sa tanà ko? Beken kami sa egbutbutan ko, dodoo si Nemula polo.”

5,6Na, egoh i Ananiyas migdineg iya wé inikagi i Pidelu, nepilay dé owoy nematay ma. Hê, eg-angayen sa medoo melaud egbekut ginis sa nematay, owoy sineoyongon da

eg-angay eglebeng. Agulé tigtu nelimedangan sa langun etaw migdineg denu sa kinepatay di.

7Agulé telu kaulas kedu iya, migtebow Sapila i, dodoo endà netiigan di duu nematay dé sa sawa di. 8Eg-ikagi Pidelu i, guwaen di, “Tuloni ko aken. Enù di ya, ini daa sa langun pilak igbayad sa tanà dinagang yu?”

Guwaen sa bayi egsagbì, “Hoò, iya daa sa kedoo di.”

9Guwaen i Pidelu, “Maen di ya eppenemdemén yu telesawa tumepeng sa Suguy i Nemula amuk metiigan di sa salà yu ataw ka endà? Haa ko. Diyà pelawà selat sa etaw mglebeng sa sawa ko giina, owoy uwiten da ma kuna dutu.”

10Hê, petow dé nematay ma sa bayi. Egoh sa medoo maama migtebow dahiya, nematay dé si Sapila. Agulé, eg-uwiten da ma sa lawa di owoy ilebeng da ma dapag sa sawa di. 11Huenan di, tigtu nelimedangan sa langun etaw egpigtuu owoy sa medoo liyu etaw migdineg denu siini nebaelan da.

**Ini Sa Medoo Panduan Binaelan Sa Salu I Hesus**

12Na, duen medoo panduan owoy medoo tandà egkegaipan etaw binaelan sa medoo salu i Hesus diyà sa kehaa sa medoo liyu etaw. Takà egkesetipon sa medoo etaw egpigtuu diyà sa luglug Dalesan i Nemula

kepengadan da Luglug i Salomon. 13Dodoxo apiya di pa netuuwan sa medoo etaw diyà kenagda, endà doo duen etaw eg-unut diyà kenagda amuk endà tigtu di epgiftuu, enù ka nelimedangan di sa pedu di endà tuu. 14Dodoxo egkedoo sa etaw epgiftuu diyà si Datù, duen medoo maama owoy medoo bayi ma eg-unut diyà sa etaw epgiftuu.

15Na, danà sa medoo panduan egbaelan sa salu i Hesus, eg-uwiten etaw sa medoo eglinañadu diyà sa kilidan kalasada, owoy itenà da ma sa kamah owoy sa ikam da dahiya anì mekesugat sa alung i Pidelu diyà kenagda amuk tumalà enù ka ungayà da melikuan da. 16Eg-angay ma Hélusalém dò sa medoo etaw eg-ugpà diyà sa medoo liyu menuwa medapag dahiya, owoy eg-uwiten da sa medoo etaw eglinañadu owoy sa medoo etaw kinudi busaw. Hê, nelikuan da dé langun.

#### **Ini Sa Egoх Sa Medoo Salu I Hesus Nepelihay**

17Na, egbulit sa Tigtu Ulu-ulù Tegeimbà owoy sa medoo duma di etaw Sadusiyu. Tigtu egkesina da, 18huenan di egsigkemen da sa medoo salu i Hesus owoy egbilangguwen da ma. 19Dodoxo egoh di sumigep, inukaan sa egsugusuguen i Nemula sa pintu bilangguwan, owoy egpelaunen di sa medoo

salu i Hesus. Egsuguen di kagda, 20guwaen di, “Angay yu diyà sa Dalesan i Nemula. Tuloni yu sa langun etaw denu sa lalù ibegay i Nemula diyà etaw.” 21Na, egpangunut sa medoo salu i Hesus diyà sa kagi di egsugù. Huenan di, egoh di sumimag, egdalem da diyà sa Dalesan i Nemula owoy eg-edung da egtulù.

Na, egoh iya magtu kesimag, nesetipon sa Tigtu Ulu-ulù Tegeimbà owoy sa medoo duma di anì setiponen da sa langun kaunutan Hudiyu. Egoh da nesetipon langun diyà sa Dalesan i Nemula, igpeangay da sa medoo salu i Hesus dutu bilangguwan dò. 22Dodoxo egoh sa sinugù da migtebow diyà sa bilangguwan, endà hinaa da duu sa salu i Hesus dalem sa bilangguwan. Agulé, egpelikù da diyà sa medoo ulu-ulù nesetipon diyà Dalesan i Nemula, owoy guwaen da, 23“Egoх ké migtebow dutu, nepintuan doo sa bilangguwan owoy egbantay doo sa medoo tegebantay. Dodoxo egoh ké mig-ukà sa pintuan, endà duen etaw hinaa ké dalem.”

24Na, egoh sa medoo ulu-ulù tegeimbà owoy sa ulu-ulù sa tegebantay Dalesan i Nemula neketig iya wé, tigtu negaip da, enù ka endà netiigan da duu sa inangayan sa medoo salu i Hesus. 25Agulé duen sa etaw migtebow diyà kenagda,

guwaen di, "Taa yu, hih. Dini dé diyà Dalesan i Nemula sa medoo etaw binilanggu yu, owoy egtulù da diyà sa medoo etaw."

26Agulé, eglekang sa ulu-ulu tegebantay owoy sa duma di anì angayen da sa medoo salu i Hésus. Dodoo endà egtegelen da duu kagda egsabà enù ka egkelimedangan da sa duma etaw egbuungen da kagda batu. 27Inuwit da sa medoo salu i Hésus diyà sa kenà sa medoo ulu-ulu nesetipon, owoy egpetigdegen da kagda diyà sa taengan da. Agulé eg-ikagi sa Tigtu Ulu-ulu Tegesimbà diyà sa medoo salu i Hésus, guwaen di,  
 28“Hinawidan ké sa ketulù yu denu iya wé etaw eg-unutan yu. Dodoo endà egpangunutan yu duu sa kagi ké, huenan di netiigan dé sa langun etaw diyà Hélusalém sa igtulù yu. Mig-ikagi yu ma kami sa mig-imatay sa etaw eg-unutan yu. Huanan di pineangay ku kiyu dini.”

29Agulé, egsagbì Pidelu i owoy sa duma di salu i Hésus, guwaen da, "Apiya di pa eghawidan yu kami, endà sumabuh ké tumulù enù ka si Nemula sa egpangunutan ké.  
 30Sa Nemula sinaligan sa medoo tupù ta, kagdi sa mig-enaw si Hésus egoh di nematay. Dodoo inimatayan yu kagdi i egoh yu migtutuk

kenagdi diyà sa kayu igbugsud.  
 31Agulé, binatun i Nemula kagdi i dutu langit dò owoy pinepenuu di denu kuwanan di enù ka kagdi sa Tigtu Datù ta owoy sa tegealuk kenita denu sa salà ta, enù ka ungayà di ekedan ta sa salà ta anì ipeuloy di sa salà ta, kita i tugod i Islaél.  
 32Egtulonen ké sa langun nebaelan i Hésus enù ka hinaa ké iya wé, owoy iya ma sa egpetuu sa kagi ké sa Metiengaw Suguy i Nemula ibegay di diyà sa langun etaw egpangunut diyà kenagdi.”

33Na, egoh sa medoo ulu-ulu diyà Dalesan i Nemula migdineg iya wé sagbì i Pidelu, tigtu da egbulit owoy ungayà da imatayan da sa medoo salu i Hésus. 34Dodox duen dahiya sa etaw Palasiyu, si Gamaliél, sa tegetulù uledin igsugkow i Mosis, owoy netuuwan ma sa langun etaw diyà kenagdi. Egtigdeg anì mikagi, dodoo muna pelawà pinelaun di sa medoo salu i Hésus. 35Agulé guwaen di diyà sa medoo duma di nesetipon, "O medoo duma ku tugod i Islaél, tuliki yu sa kebael yu siini etaw. 36Ego anay, duen sa maama si Tudas. Ungayà di pedatù, owoy epat gatus kéen sa kedoo etaw eg-unut kenagdi. Dodoo neimatayan, agulé nesepalak sa medoo etaw eg-unut kenagdi owoy endà duen ketebowon sa penemdem di. 37Duen ma sa

sebaen maama, si Hudas tegeGaliliya. Egoh sa gibilenu mibilang sa kedoo etaw di, egkedatù hedem Hudas i owoy medoo ma sa etaw eg-unut kenagdi. Dodox neimatayan ma, huanan di nesepalak ma sa medoo eg-unut kenagdi. 38Na, ini sa eg-ikagiyen ku diyà keniyu. Mepion amuk endà pelihayen ta duu Pidelu i owoy sa medoo duma di. Pandayaen ta dé kagda, enù ka amuk beken si Nemula sa egpeangay kenagda, endà duen sa ketebowon sa egbaelan da. 39Dodox amuk si Nemula sa egpeangay kenagda dini, endà metabanan ta duu enù ka mebaluy si Nemula polo sa mekuntelà ta.”

40Na, neiyap sa medoo ulu-ulù sa kagi i Gamaliél. Agulé, pinedalem da dema sa medoo salu i Hésus, owoy igpetapes da ma kagda. Eghawidan da kagda anì endà dé tumulon da denu si Hésus. Hé, linengaan da dé kagda.

41Egoh sa medoo salu i Hésus miglaun, neangan da temù enù ka iya sa penemdem da hinemilì i Nemula kagda anì mepelihay da danà sa kepigtuu da diyà si Hésus. 42Agulé, eg-uman da doo egtulù uman agdaw diyà sa Dalesan i Nemula owoy diyà sa medoo liyu dalesan. Egtulon da sa Mepion Tegudon denu si Hésus sa Tigtu Datù sinugù i Nemula diyà tanà.

### Ini Sa Pitu Tegebulig Diyà Sa Salu I Hésus

**6** 1Na, egkedoo sa etaw egpigtuu diyà si Hésus. Dodox sebaen agdaw, egesigbolowy sa medoo Hudiyu egpigtuu eg-ikagi Geligu owoy sa medoo Hudiyu egpigtuu eg-ikagi Hibelu, enù ka guwaen sa etaw Geligu tukéey daa gaa sa pilak ibegay diyà sa medoo bayi balu da. 2Agulé, egsetiponen sa sepulù owoy duwa salu i Hésus sa langun etaw egpigtuu, owoy guwaen da, “Endà mepion di amuk sumabuh ké tumulù sa kagi i Nemula anì itukid ké sa pilak ibegay diyà sa medoo etaw pubeli. 3O medoo duma ké, mepion amuk hemilien yu sa pitu maama diyà keniyu, sa mepion etaw linuhub sa Suguy i Nemula owoy milantek ma. Amuk hediya, kagda sa tumukid megay pilak diyà sa medoo etaw pubeli, 4owoy kami sa umules sumimbà owoy takà ké ma tumulù diyà sa medoo etaw.”

5Egoh sa langun etaw egpigtuu migdineg iya wé, egkeiyap da. Huanan di, eghemilien da Estiban i, enù ka mebagel sa kepigtuu di owoy linuhub sa Metiengaw Suguy i Nemula. Ini sa medoo duma eghemilien da, si Pilipi, owoy si Pelokolo, owoy si Nikanol, owoy si Timon, owoy si

Palminas, owoy si Nikolas tegeAntiokiya egpangunut diyà sa adat Hudiyu apiya beken etaw Hudiyu. 6Agulé, pinetigdeg da sa pitu maama diyà sa taengan sa medoo salu i Hesus. Egssimbà sa medoo salu i Hesus egoh da egssabà kenagda.

7Agulé, egpekeseluh sa kagi i Nemula danà sa ketulù da. Egkedoo ma sa etaw egpigtuu diyà menuwa Hélusalém, owoy duen ma medoo tegesimbà diyà Dalesan i Nemula egpigtuu ma dé diyà si Hesus.

#### Ini Sa Egooh Da Migsigkem Si Estiban

8Na, tigtu tinunungan i Nemula Estiban i, huenan di egpekebael medoo egkegaipan etaw owoy medoo panduan eghauwen sa medoo etaw. 9Dodox duen ma medoo liyu etaw egssigbolow si Estiban. Kagda sa etaw egssimbà diyà sa simbaan pinengadanan da “Linengaan Udipen.” Kagda ma sa etaw Hudiyu tegeSilini owoy tegeAlihandeliya, owoy duen ma kedu uwang Silisiya owoy uwang Asiya. 10Dodox endà megaga da duu egssigbolow Estiban i, enù ka tigtu milantek sa eg-ikagiyen di diyà kenagda danà sa Suguy i Nemula egtabang kenagdi.

11Agulé, eg-enggat da sa liyu etaw anì tipuwen da Estiban i, guwaen da, “Dinineg ké sa kesumbung di diyà si Nemula

owoy diyà sa uledin igsugkow i Mosis egoh anay.” 12Huenan di, egpebuliten da sa medoo etaw owoy sa medoo kaunutan Hudiyu owoy sa medoo tegetulù uledin igsugkow i Mosis. Agulé, eg-angayen da egsigkem Estiban i, owoy eg-uwiten da dutu siedò medoo kaunutan Hudiyu diyà sa Dalesan i Nemula anì antangen da. 13Agulé, egtigdeg sa medoo etaw inenggat da egpebutbut denu sa inikagi i Estiban, owoy guwaen da, “Siini maama, egsumbung di takà siini mapulù Dalesan i Nemula owoy sa uledin igsugkow i Mosis sa tupù ta egooh anay.

14Owoy dinineg ké ma sa inikagi di, pedaetan i Hesus tegeNasalét gaa siini dakel dalesan kenà ta egssimbà, owoy sambian di ma gaa sa adat ta igtulù i Mosis.”

15Agulé, eg-inengtengen sa medoo kaunutan Hudiyu Estiban i, owoy hinaa da nehalì sa palas di nekeiling sa egsugìsuguen i Nemula.

#### Ini Sa Egooh I Estiban Mig-ikagi Diyà Sa Medoo Ulu-ulù

**7** 1Agulé, eg-igsaan sa Tigu Ulu-ulù Tegesimbà Estiban i, guwaen di, “Tuu pa sa inikagi da?”

2Egsagbì Estiban i, guwaen di, “O medoo momò ku owoy medoo loyuk ku, dinegdineg yu, hih, sa eg-ikagiyen ku. Egooh anay egoh sa tupù ta si

Ablaham mig-ugpà dutu Misopotamiya dò egoh di endà pa mig-edoh diyà menuwa Halan, migpehaa Nemula i diyà kenagdi kedu langit dò, <sup>j</sup> 3owoy mig-ikagi diyà kenagdi, guwaen di, ‘Legkà ka dé diyà sa malayan ko owoy sa menuwa ko. Angay ka diyà sa tanà itulù ku diyà keniko.’<sup>j</sup> 4Huenan di, miglegkà Ablaham i diyà sa menuwa di Kaldiya, owoy mig-angay eg-ugpà dutu Halan dò. Egoh sa emà di nematay, pineedoh i Nemula kagdi eg-angay dahini diyà sa tanà kenà ta eg-ugpà. 5Egoh iya, endà duen tanà igbegay i Nemula diyà si Ablaham, apiya tukéey. Dodox migpasad Nemula i diyà kenagdi mugpà Ablaham i owoy sa medoo tugod di taman melugay diyà sa tanà igbegay di diyà kenagdi, apiya di pa endà pa duen sa anak di. 6Ini sa kagi i Nemula diyà kenagdi egoh anay, guwaen di, ‘Mugpà daa sa tugod ko diyà sa sebaen ma tanà kenà da meudipen owoy mepasangan taman epat gatus gepalay. 7Dodox pigtamayan ku ma sa etaw eg-udipen kenagda. Agulé, lumegkà dema sa tugod ko diyà siedò tanà, owoy mangay da mugpà dahini diyà siini tanà anì sumimbà da diyà kenak.’<sup>k</sup> Iya sa igpasad i Nemula diyà si

Ablaham egoh anay. 8Agulé, sinugù i Nemula kagdi anì pekelaingen di sa ipat di owoy sa ipat sa langun tugod di maama anì metandaan sa igpasad i Nemula diyà kenagda. Huenan di, pinekelaing di sa anak di si Isak egoh di sakapadian dé miglesut. Hediya ma pinekelaing i Isak sa anak di si Hakob, owoy pinekelaing i Hakob ma sa sepulù owoy duwa anak di, sa medoo tupù ta.

9“Na, nesina sa medoo tupù ta anak i Hakob sa hadi da, si Hosé. Huenan di, dinagang da Hosé i anì meudipen dutu Igipu dò. Dodox binuligan i Nemula kagdi, 10huenan di netigkelan di sa kelikutan di. Tigtu milantek owoy mepion etaw ma, huenan di netuuwan si Datù Palo diyà kenagdi, owoy ginelal di kagdi gubilenu diyà sa langun tanà Igipu owoy kagdi ma sa sinaligan di sa langun taman di. 11Agulé duen sa dakel bitil dutu Igipu dò owoy diyà tanà Kanan ma. Nepasangan temù sa langun etaw owoy endà ma duen kaenen sa medoo tupù ta. 12Huenan di, egoh i Hakob neketig duen kaenen dutu Igipu dò, pineangay di sa anak di, sa tupù ta, egpebeli kaenen dutu. 13Agulé egoh da egsaup eg-angay Igipu dò, migpekilala

*j* 7:3 Basa ko Génesis 12:1. *k* 7:5-7 Basa ko Génesis 12:7; 15:13-14; Éxodo 3:12.

Hosé i diyà sa medoo kakay di, owoy igpekilala di ma sa medoo tigtu duma di diyà si Palo. 14Agulé igpeangay i Hosé sa emà di, si Hakob, owoy sa langun malayan da. Pitu pulù owoy lima sa kedoo da. 15Huenan di, mig-edoh Hakob i eg-angay eg-ugpà dutu Igipitu dò. Agulé neseinut-inut da nematay dahiya, si Hakob owoy sa medoo anak di. 16Inuwit da sa lawa da dutu menuwa Sikem dò, owoy iglebeng da dalem sa takub diyà sa tanà bineli i Ablaham diyà sa tugod i Hamol egoh anay.

17“Na, egoh di buyu meketuu sa igapasad i Nemula diyà si Ablaham egoh anay, migkedoo dé sa tupù ta dutu Igipitu dò. 18Egoh iya, duen sa sebaen Palo diyà Igipitu, owoy endà neketiig di denu si Hosé. 19Inakalan di sa medoo tupù ta owoy pinelihay di kagda. Tinegel di egpitas diyà tanà sa anak da magtu miglesut anì mematay da. 20Iya ma sa egoh di miglesut Mosis i sa tigtu mepion batà. Inunungan sa lukes di taman telu gebulan diyà sa dalesan da. 21Dodox egoh i Mosis tinangtang diyà sa ilis wayeg, hinaa sa anak i Palo bayi. Agulé, linomò di owoy inipat di lagà mendaa sa keipat di sa hagdi anak. 22Agulé, netulù Mosis i sa langun netiigan sa etaw Igipitu. Egoh di mipedu dé, tigtu milantek sa

keikagi di owoy sa langun egbaelan di.

23“Na, egoh i Mosis epat pulù gepalay dé, eg-angayen di egtelow sa medoo duma di tugod i Islaél. 24Dodox hinaa di sa duma di pinelihay sa etaw tegeIgipitu. Agulé binuligan di owoy sinulian di, owoy inimatayan di sa etaw tegeIgipitu. 25Iya sa binaelan di enù ka guwaen di dò netiigan sa medoo duma di Hudiyu kagdi sa hinemili i Nemula anì uwiten di kagda kedu diyà Igipitu. Dodox endà netiigan da duu iya wé. 26Agulé egoh di umenaw simag, hinaa di sa duwa duma di tugod i Islaél egseginaluway da. Ungayà di antangen di kagda, huenan di mikagi, guwaen di, ‘O Akay, anan yu tugod i Islaél. Yoko egsebulitay ya.’ 27Dodox sa etaw egribabà duma di, eghemagawan di Mosis i, owoy guwaen di, ‘Endà pineangay etaw kuna ya anì kumedatù ka owoy umantang kenami. 28Enù di ya, imatayan ko ma aken, iling sa kineimatay ko sa etaw tegeIgipitu egoh neaggdaw?’ 29Egoh i Mosis migdineg iya wé, migpelaguy kedu diyà Igipitu owoy eg-angay eg-ugpà dutu tanà Midyan dò. Migsawa dutu, owoy mig-anak duwa maama.

30“Na, egoh di neuma epat pulù gepalay, dutu siedò melabel tanà mediyù dalesan medapag diyà sa getan Sinay

Mosis i. Duen sa egsugùsuguen i Nemula migpehaa diyà kenagdi diyà sa tukéey kayu eglegleg.  
**31**Egoh i Mosis mighaa iya wé, tigtu negaip. Egoh di mig-angay egtelow sa kayu eglegleg, dinineg di sa kagi i Datù Nemula kedu diyà sa apuy,  
**32**guwaen di, ‘Aken sa Nemula sinaligan sa medoo tupù ko egoh anay, si Ablaham owoy si Isak owoy si Hakob.’ Agulé egoh i Mosis migdineg iya wé, endà inuman di duu eg-inengteng enù ka nelimedangan temù owoy miglukub ma. **33**Agulé mig-ikagi Nemula i diyà kenagdi, guwaen di, ‘Kedani ko dé sa talumpà ko anì adatan ko aken, enù ka egtigdeg ka diyà sa tanà kenà ku migpehaa diyà keniko.  
**34**Netiigan ku dé tigtu egkepelihay sa medoo etaw hinemilì ku dutu Igipu dò. Dinineg ku sa kesimbà da diyà kenak, huenan di alukan ku kagda. Na, kuna sa peangayen ku diyà Igipu anì mealukan da,’ guwaen i Nemula diyà si Mosis egoh anay.<sup>l</sup>

**35**“Na, egoh anay si Mosis sa inekedan sa medoo duma di tugod i Islaél, enù ka guwaen da, ‘Endà pineangay etaw kuna ya anì kumedatù ka owoy umantang kenami.’ Dodoo kagdi polo sa pineangay i

Nemula diyà kenagda anì kumedatù owoy umaluk kenagda danà sa ketabang sa egsugùsuguen i Nemula migpehaa diyà kenagdi diyà sa tukéey kayu eglegleg. **36**Huenan di, si Mosis sa mig-uwit sa medoo tupù ta egoh da miglegkà diyà tanà Igipu, owoy binaelan di sa medoo panduan owoy sa medoo tandà egkegaipan etaw diyà Igipu owoy diyà sa Melalegà Dagat, owoy diyà sa melabel tanà mediyù dalesan taman epat pulù gepalay. **37**Si Mosis ma sa mig-ikagi diyà sa medoo tugod i Islaél, guwaen di, ‘Peangayen i Nemula sa sebaen tegesugkow di diyà keniyu, éhê mendaa sa kinepeangay di kenak. Kagdi ma sa tugod yu.’<sup>m</sup> **38**Si Mosis ma sa mig-uwit sa medoo tugod i Islaél egoh da neselimud diyà sa melabel tanà mediyù dalesan. Kagdi ma sa inikagiyen sa egsugùsuguen i Nemula dutu Getan Sinay dò, owoy kagdi sa migsakem sa kagi i Nemula endà meelut di anì isugkow di diyà kenita.

**39**“Dodox tapay doo endà egpangunut sa medoo tupù ta diyà si Mosis. Eg-ekedan da polo enù ka ungayà da pelikù da Igipu dò. **40**Agulé egoh i Mosis dutu getan dò, migpegeni da diyà sa kakay i

<sup>l</sup> 7:31-34 Basa ko Éksodo 3:5-10. <sup>m</sup> 7:37 Basa ko Dutilonomiyu 18:15.

Mosis, si Alon, guwaen da,  
 ‘Baeli ko diyà kenita sa  
 egpenemulawen ta anì dumuen  
 sa umuwit kenita, enù ka endà  
 netiigan ké duu sa inangayan i  
 Mosis, sa mig-uwit kenita kedu  
 Igipu dò.’ **41**Agulé, binaelan  
 da sa inetaw éhê palas nati  
 sapì. Mig-imatay da hinagtay  
 anì sumimbà da diyà iya wé  
 binaelan da, owoy pinistawan  
 da. **42**Huenan di, ininiyugan i  
 Nemula kagda, owoy  
 pinandayà di sa kesimbà da  
 diyà sa agdaw owoy sa bulan  
 owoy sa bituen. Hediya ma sa  
 kagi i Nemula igsulat sa  
 tegesugkow di egoh anay,  
 guwaen di,

‘O medoo tugod i Islaél,  
 egoh yu mig-ipanaw diyà sa  
 melabel tanà mediyù  
 dalesan  
 taman epat pulù gepalay,  
 beken aken sa egsimbaan yu  
 egoh yu mig-imatay  
 hinagtay.

**43** Dodox migsimbà yu polo  
 diyà sa medoo inetaw  
 binaelan yu.  
 Takà yu eg-uwit sa éhê  
 simbaan sa nemula yu si  
 Molok,  
 owoy eg-uwit yu ma sa éhê  
 bituen sa nemula yu si  
 Lipan.  
 Huenan di, pigtamayan ku  
 kiyu

owoy ipeuwit ku kiyu dutu  
 dibaluy siedò mediyù  
 menuwa Babiloniya.’<sup>n</sup>

**44**“Na, egoh anay egoh sa  
 tupù ta mig-ipanawpanaw diyà  
 sa melabel tanà mediyù  
 dalesan, eg-uwit-uwiten da sa  
 dakel simbaan kemalig  
 hinabengan ginis anì  
 metandaan eg-upgà Nemula i  
 diyà kenagda. Igpebael i  
 Nemula diyà kenagda iya wé  
 kemalig iling sa igpehaa di diyà  
 si Mosis egoh anay. **45**Agulé,  
 egoh i Mosis nematay, si  
 Hosuwa sa migpesambì kenagdi  
 eg-uwit sa medoo Hudiyu  
 eg-angay diyà sa tanà igrasad i  
 Nemula diyà kenagda. Sumalà  
 dé sa inangayan da, takaan da  
 eg-uwit sa simbaan kemalig.  
 Tinabangan i Nemula kagda,  
 owoy eghemagawan di sa  
 medoo liyu etaw anì dumuen  
 kenà sa tupù ta mugpà. Nelugay  
 da egsimbà diyà iya wé kemalig  
 taman sa egoh i Dabid  
 migkedatù diyà kenagda.  
**46**Netuuwan Nemula i diyà sa  
 langun binaelan i Dabid.  
 Huenan di, migpegeni diyà si  
 Nemula amuk mebaluy kagdi sa  
 mael sa dakel dalesan kenà da  
 sumimbà diyà sa Nemula  
 sinaligan i Hakob. **47**Dodox sa  
 anak di si Salomon polo sa  
 migbael sa dakel Dalesan i  
 Nemula.

<sup>n</sup> 7:42-43 Basa ko Amos 5:25-27.

48“Na, tigtu mapulù Nemula i, huenan di endà mungpà di diyà sa dalesan binaelan ta, kita i etaw. Hediya ma sa igsulat sa tegesugkow i Nemula egoh anay, guwaen di,

49,50 ‘Sa langit sa kenà ku egpenuu,  
owoy sa tanà sa kinadalan  
lisem ku,  
guwaen i Datù.  
Aken sa migpeduen sa langun  
taman diyà tanà.  
Huenan di, endà mebaluy di  
egbaelan yu sa dalesan ku  
kenà ku eg-ugpà.’ ”<sup>o</sup>

51Eg-uman Estiban i eg-ikagi diyà sa medoo ulu-ulù etaw Hudiyu, guwaen di, “Tigtu metegas sa ulu yu, enù ka endà egpigtuu yu diyà si Nemula owoy meked yu dumineg sa kagi di. Meilingan yu sa medoo tupù ta, enù ka takà yu eg-eked sa Metiengaw Suguy i Nemula.

52Pinelihay sa medoo tupù ta sa langun tegesugkow i Nemula egoh anay, enù ka inimatayan da sa medoo tegesugkow i Nemula migtlon denu sa metiengaw etaw tumebow sinugù i Nemula. Agulé egoh di migtebow, igpesikem yu dé owoy inimatayan yu ma.

53Apiya di pa kiyu sa migsakem sa uledin i Nemula igsugkow sa egsugùsuguen di egoh anay, endà doo egpigtuu yu.”

### Ini Sa Egoh Da Egbuong Batu Diyà Si Estiban

54Na, egoh sa medoo ulu-ulù diyà Dalesan i Nemula migdineg sa inikagi i Estiban, tigtu egbulit da owoy egpekégeten da sa ngipen da danà sa kebulit da. 55Dodox linuhub sa Metiengaw Suguy i Nemula Estiban i. Agulé egoh di eglengag dutu langit dò, eghauwen di sa senang i Nemula owoy si Hésus egtigdeg denu kuwanan i Nemula.

56Eg-ikagi Estiban i, guwaen di, “Haa yu. Hinaa ku sa langit neukaan, owoy hinaa ku sa Kakay Langun egtigdeg denu kuwanan i Nemula.”

57Dodox egsagpengen sa medoo etaw sa telinga da anì endà dinegen da duu sa kagi di. Egkagkag da danà da egbulit. Hê, egletu da egseulingutan da kagdi i. 58Agulé eg-agaken da diyà sa dibaluy menuwa, owoy egbuungen da kagdi batu anì imatayan da. Duen sa maama, si Saulo, egbantay sa kawal sinalidan sa medoo etaw egbuong batu.

59Ligò da egbuong batu, egsimbà Estiban i, guwaen di, “O Hésus Datù ku, kuwa ko sa suguy ku enù ka buyu a dé egkematay.” 60Agulé egligkued owoy eg-umow, guwaen di, “O

<sup>o</sup> 7:49,50 Basa ko Isayas 66:1,2.

Datù, yaka egpigtamay duu kagda danà sa kebael da kenak.” Hê, egoh di mig-ikagi iya wé, nematay dé.

**Ini Sa Egoh I Saulo Egpelihay Sa Etaw Egpigtuu**

**8** 1,2Na, tigtu neiyap Saulo i egoh i Estiban neimatayan. Iglebeng sa medoo metiengaw etaw Estiban i, owoy tigtu egsinegawan da ma.

Na, edung sa egoh i Estiban nematay, nepelihay temù sa medoo egpigtuu diyà si Hésus diyà Hélusalém, huenan di nesepalak da diyà sa medoo menuwa diyà uwang Hudiya owoy uwang Samaliya. Dodoo eg-ugpà pelà sa medoo salu i Hésus diyà Hélusalém. 3Tigtu egpelihayen i Saulo sa medoo egpigtuu diyà si Hésus. Takà eggemow diyà sa medoo dalesan da anì sigkemen di kagda owoy egbilangguwen di ma, iling ka maama ataw ka bayi.

**Ini Sa Egoh I Pilipi Egtegudon Diyà Sa Uwang Samaliya**

4Na, egoh sa medoo etaw egpigtuu nesepalak, egtulù da denu si Hésus diyà sa medoo etaw sumalà dé sa inangayan da. 5Mig-angay Pilipi i diyà sa dakel menuwa diyà uwang Samaliya, owoy egtegudon diyà sa medoo etaw dariya, guwaen di, “Si Hésus sa Tigtu Datù sinugù i Nemula diyà tanà.”

6Na, egkeiyap sa langun etaw egdinegdineg diyà si Pilipi, enù ka dinineg da sa tegudon di owoy hinaa da sa medoo panduan binaelan di. 7Duen busaw nekelesing egoh i Pilipi migpelesut kenagda diyà sa medoo etaw, owoy nelikuhan ma dé sa medoo pikat owoy sa medoo egtodel. 8Huenan di, neanggan temù sa medoo etaw dariya.

9Na, duen sa maama, si Simon, eg-ugpà diyà iya wé menuwa. Nelugay dé eggaipen di sa medoo etaw tegeSamaliya danà sa medoo balitmata binaelan di, enù ka duen gaa sa tunung di dodox eg-akal.

10Egdinegdinegen sa medoo etaw sa kagi di, iling ka mapulù etaw ataw ka mepokò etaw, enù ka guwaen da dò duen sa dakel tunung i Nemula diyà kenagdi. 11Huenan di, egsaligan da kagdi enù ka nelugay ginaip di kagda danà sa balitmata di.

12Dodoo, egoh da migpigtuu sa Mepion Tegudon igtulù i Pilipi denu sa kedatù i Nemula owoy si Hésus Kelistu, egpebautis da ma, iling ka maama ataw ka bayi.

13Egpigtuu ma Simon i. Agulé egoh di migpebautis, eg-unut-unut ma diyà si Pilipi, owoy tigtu egkegaip egoh di mighaa sa medoo panduan binaelan i Pilipi.

14Na, egoh sa salu i Hésus diyà Hélusalém neketiig

migpigtuu dé sa medoo etaw tegeSamaliya diyà sa kagi i Nemula, egpeangayen da Pidelu i owoy si Huwan dutu Samaliya dò anì mulig da kenagda.

15Egoh da migtebow dutu, egsimbà da anì mekesakem sa etaw egpigtuu tegeSamaliya sa Metiengaw Suguy i Nemula,

16enù ka apiya di pa migpebautis da egoh da egpigtuu diyà si Datù Hésus, endà pa lumuhub sa Metiengaw Suguy i Nemula diyà kenagda.

17Agulé, egoh i Pidelu owoy si Huwan migsabà kenagda, linuhub dé sa Metiengaw Suguy i Nemula kagda.

18Egoh i Simon mighaa sa medoo etaw migsakem sa Metiengaw Suguy i Nemula danà sa salu i Hésus migsabà kenagda, ungayà di begayan di kagda pilak, 19owoy guwaen di, “Begayi yu aken siini tunung anì mekesakem da ma sa Metiengaw Suguy i Nemula sa medoo etaw egsabaan ku.”

20Dodo egsagbì Pidelu i, guwaen di, “Mepigtamayan ka owoy mekedan sa pilak ko, enù ka guwaen ko dò mebayadan ko sa ibegay i Nemula uloy.

21Endà mekeunut ka sa egbaelan ké, enù ka endà metiengaw sa pedu ko diyà sa kehaa i Nemula. 22Huenan di, ekedi ko dé sa salà ko, owoy simbà ka diyà si Datù anì ipeuloy di sa medaet penemdem ko. 23Netiigan ku tigtu egkesina

ka, owoy neudipen ka pelà danà sa salà ko.”

24Agulé, egpegeni Simon i diyà si Pidelu owoy si Huwan, guwaen di, “Simbai yu aken diyà si Datù anì endà meketuu sa inikagi ko denu kenak.”

25Na, tinulon i Pidelu owoy si Huwan sa kagi i Datù owoy sa binaelan di hinaa da. Agulé, eglikù da Hélusalém dò, dodox igtulù da ma sa Mepion Tegudon diyà sa medoo menuwa inukitan da diyà uwang Samaliya.

#### **Ini Sa Egoh I Pilipi Migtelabuk Sa Maama Kedu Tanà Itiyopiya Dò**

26Na, duen sa egsugùsuguen i Nemula egpehaa diyà si Pilipi, owoy eg-ikagi, guwaen di, “Angay ka dé dutu siedò dalan kedu Hélusalém eg-angay dutu menuwa Gasa dò. Iya sa dalan eg-ukit diyà sa melabel tanà mediyù dalesan.” 27Agulé migpangunut Pilipi i owoy mig-angay dutu siedò dalan. Na, duen sa maama tegeItiyopiya miglikù kedu Hélusalém dò, sa keduwan di egsimbà. Dakel sa gelal di enù ka kagdi sa tegeipat pilak sa bayi booy diyà tanà Itiyopiya, kepengadan da si Kandasi. 28Miglikù iya wé maama kedu Hélusalém dò. Ligò di eg-edà sa kalisa di, egbasawen di sa libelu igsulat i Isayas sa tegesugkow i Nemula egoh anay. 29Agulé, eg-ikagi sa

Metiengaw Suguy i Nemula diyà si Pilipi, guwaen di, "Lohot ka owoy peunut ka diyà sa kalisa."

30Agulé egletu Pilipi i, owoy egdinegen di sa maama épê gelal egbasa diyà sa libelu igsulat i Isayas sa tegesugkow i Nemula egoh anay. Eg-igsà Pilipi i, guwaen di, "Netiigan ko pa sa egbasawen ko?"

31Egsagbì sa maama épê gelal, guwaen di, "Endà netiigan ku duu, enù ka endà duen etaw egtulù kenak." Agulé, pineedà di Pilipi i diyà sa kalisa di.

32Na, ini sa kagi i Nemula egbasawen sa maama épê gelal, guwaen di,

"Kagdi lagà sa kebilibili endà mulit di amuk sapuen etaw, owoy lagà ma anak kebilibili endà mikagi di amuk guntingen etaw sa bulbul di, enù ka apiya di pa medaet sa egbaelan etaw diyà kenagdi, endà doo duen kagi di.

33 Apiya di pa endà duen salà di, peumàumaan da doo owoy pigtamayan da.

Endà duen tugod di, enù ka imatayan da kagdi."<sup>p</sup>

34Agulé, eg-igsà sa maama épê gelal diyà si Pilipi, guwaen

di, "Ngadan di etaw tinulon sa tegesugkow i Nemula migsulat ini i, iling ka kagdi ataw ka sa sebaen ma etaw? Tuloni ko aken, hih."

35Agulé, eg-edung Pilipi i egselepang iya wé kagi i Nemula igsulat i Isayas, owoy egtulonen di diyà kenagdi sa Mepion Tegudon denu si Hésus. 36Agulé egoh da eg-ipanaw, migtebow da diyà sa lawa't wayeg. Eg-ikagi sa maama épê gelal, guwaen di, "Duen sa wayeg dini. Mebaluy pa amuk bautisan ko aken?"

37[Egsagbì Pilipi i, guwaen di, "Mebaluy doo amuk tigtu ka dé egpigtuu."]

Guwaen sa maama,  
"Egpigtuu a dé Anak i Nemula Hésus Kelistu i."]

38Agulé egpeugpaen di sa kalisa di. Eg-angay da dalem sa wayeg owoy egbautisan i Pilipi. 39Egoh da miglaun kedu diyà sa wayeg, kinedanan sa Suguy i Nemula Pilipi i. Endà dé hinaa sa maama épê gelal Pilipi i, dodox mepion doo sa pedu di egoh di eg-uman eg-ipanaw. 40Agulé, hinaa polo Pilipi i dutu menuwa Asoto dò. Eglagbas dutu Sisaliya dò, dodox egoh di eg-ipanaw, takà egtulù sa Mepion Tegudon diyà sa langun menuwa inukitan di.

**Ini Sa Egoh I Saulo Migpigtuu  
Diyà Si Hésus**  
*(Binaelan 22:6-16; 26:12-18)*

**9** 1Na, takà eglimedangan i Saulo sa medoo etaw egpigtuu diyà si Datù enù ka ungayà di imatayan di kagda. Mig-angay diyà sa Tigtu Ulu-ulù Tegesimbà, 2owoy kinuwa di sa sulat uwiten di diyà sa medoo simbaan Hudiyu diyà menuwa Damasko anì mebaluy sigkemen di sa medoo etaw egpigtuu diyà si Datù, iling ka maama ataw ka bayi, anì agaken di kagda dutu Hélusálém dò anì bilangguwen di.

3Dodox ego i Saulo medapag diyà Damasko, petow dé nelegdawan sa dakel legdaw kedu langit dò. 4Agulé nekelagkeb diyà tanà, owoy dinineg di sa eg-ikagi kedu diyà langit, guwaen di, “O Saulo, maen di ya egpelihayen ko aken?”

5Eg-igsà Saulo i, guwaen di, “Ngadan ko ya etaw?”

Guwaen di egsagbì, “Aken si Hésus sa egpelihayen ko.  
6Tigdeg ka dé, lagbas ka dutu Damasko dò kenà ko metulonon sa baelan ko.”

7Na, tigtu nelimedangan sa medoo duma i Saulo owoy neiyem da ma, enù ka uloy dé dinineg da sa eg-ikagi, endà duen etaw hinaa da. 8Agulé egtigdeg Saulo i, dodox ego i eglimata, endà dé eg-ilag di.

Huenan di, egsabaan da sa belad di owoy eg-agaken da diyà Damasko. 9Telu agdaw sa lugay di endà eg-ilag, owoy endà ma nekekaen di owoy endà ma nekeinem di.

10Duen sa sebaen etaw egpigtuu eg-ugpà diyà Damasko, si Ananiyas. Egpehaa Datù i diyà kenagdi, owoy guwaen di, “O Ananiyas.”

Egsagbì Ananiyas i, guwaen di, “O Datù, ngadan sa ungayà ko diyà kenak?”

11Guwaen i Datù diyà kenagdi, “Angay ka diyà sa dalan kepengadan da Metudà, owoy lagbet ko sa dalesan i Hudas enù ka iya sa kenà i Saulo tegeTalesu eg-ugpà. Egsimbà diyà kenak. 12Duen ma sa igpehaa ku diyà kenagdi sa ego ko migtebow owoy egsabà kenagdi anì umilag dema.”

13Dodox egsagbì Ananiyas i, guwaen di, “O Datù, medoo sa etaw migtulon diyà kenak denu kenagdi owoy denu sa medaet binaelan di diyà sa medoo etaw egpigtuu dutu Hélusálém dò. 14Mig-angay ma dahini diyà Damasko owoy inuwit di sa sulat kedu sa medoo ulu-ulù tegesimbà diyà Hélusálém anì mebaluy sigkemen di sa langun etaw egsimbà diyà keniko.”

15Dodox eg-ikagi Datù i diyà si Ananiyas, guwaen di, “Angay ka dutu, enù ka hinemili ku kagdi i anì tumulon denu kenak

diyà sa medoo etaw beken Hudiyu owoy diyà sa medoo datù owoy diyà keniyu i tugod i Islaél. 16Owoy ipetiig ku diyà kenagdi sa kelikutan mehaa di danà di egpangunut diyà kenak.”


17Agulé, eg-angay Ananiyas i diyà sa dalesan kenà i Saulo eg-ugpà. Egoth di miggemow, egsabaan di Saulo i owoy guwaen di, “O Akay, si Datù Hésus sa hinaa ko diyà dalan egoth ko mig-angay dini. Pineangay di aken diyà keniko anì umilag ka dema owoy anì lumuhub sa Metiengaw Suguy i Nemula diyà keniko.” 18Hê, petow dé duen sa éhê enil sedà nekedan diyà sa mata i Saulo owoy mig-ilag dé. Agulé egpebautis dé. 19Egoth di migkaen, egkepion dé sa nanam di.

Na, nelugaylugay eg-ugpà Saulo i diyà sa medoo etaw egpigtuu diyà Damasko. 20Agulé eg-angay diyà sa medoo simbaan Hudiyu, owoy itulù di diyà sa medoo etaw Anak i Nemula Hésus i. 21Tigtu negaip sa langun etaw migdineg sa kagi di, owoy egseolomoy da, guwaen da, “Tuu ataw ka endà, kagdi sa takà egpelihay sa medoo etaw egpigtuu dutu Hélusalém dò? Mig-angay dini gaa anì sigkemen di sa etaw egpigtuu diyà si Hésus anì agaken di kagda diyà sa medoo ulu-ulu tegesimbà.”

22Dodox egkebagel sa ketegudon i Saulo egoth di egtulù denu si Hésus sa Tigtu Datù sinugù i Nemula. Endà mekeatu sa medoo Hudiyu tegeDamasko kenagdi, enù ka tigtu mepion sa kagi di. 23Agulé nelugaylugay, duen etaw Hudiyu endà egpigtuu egseolomoy da denu sa keimatay da si Saulo. 24Agdaw owoy sigep, egbantayan da sa bengawan sa kutà menuwa Damasko anì imatayan da kagdi. Dodox duen sa etaw migtulon diyà si Saulo sa ungayà da. 25Huenan di, ebuligan sa medoo etaw egpigtuu kagdi i. Hê, egoth di teliwadà sigep, egdalemen da kagdi diyà sa amayan alat owoy egtuntunen da kedu sa tatawan diyà sa kutà menuwa Damasko anì melaguy.

#### **Ini Sa Egoth I Saulo Diyà Sa Menuwa Hélusalém**

26Na, egoth i Saulo migtebow dutu Hélusalém dò, ungayà di eg-unut sa medoo etaw egpigtuu dahiyia. Dodox egkelimedangan da enù ka guwaen da dò endà pa egpigtuu di. 27Dodox eg-uwiten i Bilnabi Saulo i diyà sa medoo salu i Hésus, owoy egtulonen di diyà kenagda denu sa egoth i Datù migpehaa owoy mig-ikagi diyà si Saulo diyà sa dalan. Egtulonen di ma diyà kenagda mebagel sa ketegudon i Saulo



*Egdalemen da kagdi diyà sa amayan alat owoy egtuntunen da kedu sa tatawan  
diyà sa kutà menuwa. (Binaelan 9:25)*

denu si Hésus diyà Damasko.  
28Agulé, eg-unut-unut Saulo i  
diyà sa medoo etaw  
tegeHélusalém eppigtuu.  
29Mebagel ma sa ketegudon di  
enù ka pineangay i Datù kagdi  
i. Egtulù ma diyà sa medoo  
Hudiyu eg-ikagi Geligu, owoy  
egseolomoy da. Dodoo ungayà  
da polo imatayan da. 30Agulé  
egoh sa medoo duma di  
neketig iya wé, eg-uwiten da  
dutu Sisaliya dò, owoy pineedà  
da diyà sa dakel kumpit mangay  
dutu Talesu dò.

31Huenan di, migkelanh dé  
sa keugpà sa medoo etaw  
eppigtuu diyà sa langun  
menuwa diyà uwang Hudiyu  
owoy uwang Galiliya owoy  
uwang Samaliya. Migkebagel sa  
kepigtuu da owoy migkedoo da

ma danà sa ketabang sa  
Metiengaw Suguy i Nemula  
kenagda, owoy egpangunut da  
ma dé diyà si Datù.

**Ini Sa Egoh I Pidelu Mig-angay  
Diyà Sa Menuwa Lida Owoy Hopi**

32Na, egtukiden i Pidelu  
eglengenan sa medoo menuwa  
etaw eppigtuu. Na, sebaen  
agdaw migtebow diyà sa  
menuwa Lida, 33owoy duen sa  
maama pikat hinaa di, si Iniyas,  
takà daa eg-idegà taman walu  
gepalay. 34Eg-ikagi Pidelu i  
diyà kenagdi, guwaen di, “O  
Akay Iniyas, enaw ka dé, enù ka  
bulungan i Hésus Kelistu kuna.  
Dilin ko dé sa ikam ko.”

Hê, petow dé mig-enaw  
Iniyas i. 35Hinaa sa langun etaw  
tegeLida iya wé owoy sa medoo

etaw diyà sugud Salon. Huenan di, tinuing da dé sa pedu da diyà si Datù.

**36**Na diyà menuwa Hopi, duen sa bayi eppigtuu, si Tabita. Pinengadanan ma si Dolekas diyà sa kagi Geligu, owoy iya sa selepangan di, seladeng. Tigtu mepion etaw enù ka egbuligan di takà sa medoo etaw pubeli. **37**Egoh iya, eglinadu Tabita i, hê nematay dé. Pinedigus da sa lawa di owoy itagù da diyà sa bilik di diatas. **38**Egoh sa medoo etaw eppigtuu neketiig dutu Lida dò Pidelu i, sinugù da sa duwa etaw anì ipeangay da Pidelu i, enù ka medapag sa menuwa Lida diyà sa menuwa da. Egpegeni da diyà kenagdi, guwaen da, “O Akay, téteél ka, hih. Angay ka Hopi dò.”

**39**Agulé, eg-unut Pidelu i diyà kenagda. Egoh da migtebow dutu, inuwit da kagdi diyà sa bilik diatas kenà sa medoo bayi balu egdelawit, owoy egkesetipon da diyà kenagdi anì ipehaa da sa medoo kawal owoy sa medoo ginis tinebil i Tabita egoh di endà pa nematay. **40**Dodoo egpeliyuwen i Pidelu kagda. Agulé egligkued owoy egsimbà diyà si Nemula. Eg-isalu diyà sa nematay owoy guwaen di, “O Tabita, enaw ka dé.” Hê, eglimata dé Tabita i. Egoh di mighaa si Pidelu, mig-enaw dé egpenuu. **41**Egsabaan i Pidelu

sa belad di owoy egpetigdegen di. Agulé, eg-umowen i Pidelu sa medoo etaw eppigtuu owoy sa medoo bayi balu ma, owoy ipehaa di diyà kenagda Tabita i nehagtay dé. **42**Miglalag sa egoh di mig-enaw diyà sa langun etaw diyà menuwa Hopi, huenan di eppigtuu dé sa medoo etaw diyà si Datù. **43**Agulé, nelugaylugay eg-ugpà Pidelu i diyà menuwa Hopi diyà sa dalesan i Simon, sa tegegalebek kunul hinagtay.

#### Ini Sa Egoh I Pidelu Mig-angay Diyà Si Kolniliyo

**10** **1**Na, diyà menuwa Sisaliya, duen sa kapitan sundalu, si Kolniliyo. Kagdi sa ulu-uluh sa magatus sundalu, kepengadan da sa Umpungan tegeItaliya. **2**Apiya beken etaw Hudiyu, metiengaw doo owoy eppigtuu ma diyà si Nemula lapeg sa malayan di. Egbegayan di ma pilak sa pubeli etaw Hudiyu enù ka eghiduwan di kagda, owoy takà egsimbà ma diyà si Nemula. **3**Na, sebaen agdaw egoh di alas telu mahapun, duen sa nehauwan i Kolniliyo. Tigtu hinaa di sa egsugusuguen i Nemula migtebow diyà kenagdi, owoy guwaen di, “O Kolniliyo.”

**4**Hê, eg-inengtengen i Kolniliyo apiya di pa tigtu egkelimedangan. Egsagbì, guwaen di, “O Datù, ngadan sa ungayà ko diyà kenak?”

Eg-ikagi sa egsugùsuguen i Nemula, guwaen di, “Dinineg i Nemula sa kesimbà ko diyà kenagdi. Netiigan di ma sa kehidu ko sa medoo etaw egkepasangan, owoy netuuwan ma. 5Na, sugù ko sa etaw ko mangay Hopi dò anì angayen da Simon i pinengadanan da ma si Pidelu. 6Eg-ugpà dutu medapag dagat dò diyà sa dalesan sa sebaen Simon, sa tegegalebek kunul hinagtay.”

7Egoh sa egsugùsuguen i Nemula miglikù dutu langit dò, inumow i Kolniliyo sa duwa udipen tegegalebek diyà kenagdi owoy sa sebaen sundalu metiengaw kesaligan di. 8Agulé migtulon diyà kenagda denu sa hinaa di, owoy egpeangayen di kagda dutu menuwa Hopi dò.

9Agulé eg-ipanaw da dé. Egoh di nekebugsang sa umenaw simag, buyu da dumagpak diyà sa menuwa Hopi. Iya ma sa egoh i Pidelu eggemow diyà sa atep sa dalesan kenà di eg-ugpà anì eglebù egsimbà diyà si Nemula, enù ka mepatag sa atep iya wé dalesan.

10Egpeketues Pidelu i owoy ungayà di kumaen. Dodoo egoh da eglabung pelawà, duen sa ipehaa i Nemula diyà kenagdi. 11Eghauwen di sa langit neukaan, owoy duen sa egketuntun kedu langit dò eg-angay diyà kenagdi éhê sa

dakel kayab nesabaan diyà sa epat sulung di. 12Duen sa medoo balangan hinagtay owoy uled tanà owoy manuk tanà dalem sa kayab. 13Agulé, duen sa eg-ikagi diyà si Pidelu kedu langit dò, guwaen di, “O Pidelu, tigdeg ka dé owoy sumbalì ko sa duma dalem kayab anì mekesedà ka.”

14Dodox egsagbi Pidelu i, guwaen di, “O Datù, meked a iya wé, anì endà meketipay a sa uledin igsugkow i Mosis denu sa kaenen melhi.”

15Duen dema sa eg-ikagi dinineg di, guwaen di, “Yaka eg-eked duu egkaen, enù ka pinepion i Nemula iya wé.”

16Taman telu gulê anan hediya iya wé binaelan di. Agulé nebatun iya wé kayab dutu langit dò.

17Egoh i Pidelu egpenemdem pelà denu sa selepangan sa hinaa di, migtebow sa medoo etaw sinugù i Kolniliyo, owoy eg-igsaen da sa kenà sa dalesan i Simon. Egoh da migtebow diyà sa dalesan di, 18eg-umow da eg-igsà, guwaen da, “Dahini pa sa kenà i Simon Pidelu eg-ugpà?”

19Egoh i Pidelu pelà egpenemdem denu sa hinaa di, eg-ikagi sa Suguy i Nemula diyà kenagdi, guwaen di, “Taa ko, hih. Migtebow dé sa telu etaw eglagbet keniko.

20Penaug ka dé. Yaka egkesemek ka eg-unut

kenagda, enù ka pineangay ku kagda diyà keniko.”

21Agulé, egpenaug Pidelu i owoy eg-ikagi diyà kenagda, guwaen di, “Aken sa maama eglagbeten yu. Ngadan sa ungayà yu diyà kenak?”

22Guwaen da egsagbì, “Si Kapitan Kolniliyo ulu-ulù sa magatus sundalu, kagdi sa migpeangay kenami dahini. Metiengaw etaw owoy epgigtuu ma diyà si Nemula owoy netuuwan ma sa medoo Hudiyu diyà kenagdi. Duen gaa sa egsugùsuguen i Nemula migsugù kenagdi anì ipeangay di kuna anì tumulù ka kenagdi.”

23Agulé, eg-ikagi Pidelu i diyà kenagda, guwaen di, “Tudug yu pelawà segdu dahini.”

Hê, egoh di umenaw simag, eg-unut Pidelu i diyà kenagda, owoy eg-unut ma sa medoo Hudiyu epgigtuu kedu diyà menuwa Hopi. 24Egoh sa keduwa di agdaw, egtebow da dutu Sisaliya dò. Eg-angat-angatan i Kolniliyo kagda, owoy tapay dé sinetipon di sa medoo tigtu duma di owoy sa medoo loyuk di. 25Egoh i Pidelu migtebow dahiya, egtelabuk Kolniliyo i kenagdi owoy egligkued anì datuen di.

26Dodoo eg-ikagi Pidelu i, guwaen di, “Tigdeg ka dé. Aken sa etaw daa, beken a si Nemula. Yaka egdatù ya kenak.” Huenan di, egpetigdegen di Kolniliyo i.

27Agulé egseolomoy da, owoy eggemow da diyà sa dalesan kenà sa medoo etaw nesetipon. 28Eg-ikagi Pidelu i diyà kenagda, guwaen di, “Netiigan yu doo endà mepion di diyà sa adat ké amuk eglengen sa etaw Hudiyu diyà sa etaw beken Hudiyu. Hediya ma, endà mepion di amuk dumuma sa etaw Hudiyu diyà sa etaw beken Hudiyu. Aken sa etaw Hudiyu, owoy kiyu sa etaw beken Hudiyu. Dodoo igpetiig i Nemula diyà kenak anì endà dé umeked a lumoyuk sa etaw beken Hudiyu.

29Huenan di, egoh ko migpeangay kenak, migpangunut a owoy mig-angay a dini. Na, Akay, ngadan sa pesuwan ko egpeangay kenak?”

30Egsagbì Kolniliyo i, guwaen di, “Egoh di telu dé agdaw alas telu mahapun, egsimbà a diyà sa dalesan ku. Petow dé migpehaa diyà kenak sa egsugùsuguen i Nemula migkawal mebulà, 31owo y guwaen di diyà kenak, ‘O Kolniliyo, dinineg i Nemula sa kesimbà ko diyà kenagdi. Netiigan di ma sa kehidu ko sa medoo etaw egkepasangan.

32Sugù ko sa etaw ko mangay Hopi dò anì angayen da Simon i pinengadanan da ma si Pidelu. Eg-ugpà dutu medapag dagat dò diyà sa dalesan sa sebaen Simon, sa tegegalebek kunul hinagtay.’ 33Huenan di,

medelamet a migpeangay keniko. Mepion enù ka dini ka dé. Na Akay, nesetipon ké langun anì dinegen ké sa kagi i Nemula isugkow ko diyà kenami.”

**Ini Sa Igtulù I Pidelu  
Diyà Si Kolniliyo**

34Na, eg-edung Pidelu i egtulù, guwaen di, “Netiigan ku doo endà tuu di amuk iya daa sa eghiduwan i Nemula sa etaw Hudiyu. 35Dodoo egketuuwan ma diyà sa langun etaw egpangunut diyà kenagdi owoy sa egbael mepion, iling ka etaw Hudiyu ataw ka beken etaw Hudiyu. 36Netiigan yu ma doo pineangay i Nemula Hésus i diyà kenami i tugod i Islaél anì tumulù kenita sa Mepion Tegudon denu sa melanih pedu ibegay di diyà sa langun etaw epigittuu diyà si Hésus Kelistu, sa Datù ta langun. 37Netiigan yu ma doo sa binaelan di diyà tanà Hudiya, enù ka egoh i Huwan neubus migtulù denu sa kebautis di, eg-edung Hésus i egtulù diyà uwang Galiliya. 38Netiigan yu ma doo pineluhban i Nemula Hésus i tegeNasalét sa Metiengaw Suguy di owoy tinunungan di kagdi. Sumalà dé sa inangayan di, egbaelan di sa mepion owoy egbulungan di ma sa medoo etaw kinudi i Satanas, enù ka egtabangan i Nemula kagdi. 39Hinaa ké sa langun binaelan

di dutu Hélusalém dò owoy diyà sa medoo menuwa diyà uwang Hudiya. Agulé, inimatayan da kagdi danà da migtutuk diyà sa kayu igbugsud. 40Dodoo inenaw i Nemula mendaan diyà sa ketelu di agdaw, owoy igpehaa di diyà kenami. 41Endà langun di etaw sa mighaa kenagdi, dodoo kami daa sa mighaa kenagdi sa hinemilì i Nemula anì tumulon ké denu kenagdi, owoy mig-unut ké kenagdi egkaen owoy eg-inem egoh di mig-enaw dé. 42Owoy sinugù di kami anì tumulù ké diyà sa medoo etaw sa Mepion Tegudon, owoy egtulonen ké si Hésus sa hinemilì i Nemula anì tepengan di sa langun etaw, iling ka nematay dé ataw ka nehagtay pelà, anì ipetiig di ma sa ketamanan da. 43Migsulat sa langun tegesugkow i Nemula egoh anay denu kenagdi, enù ka tinulon da sumalà dé sa etaw epigittuu, ipeuloy i Nemula sa salà da danà i Hésus.”

**Migtenà Sa Suguy I Nemula Diyà  
Sa Medoo Etaw Beken Hudiyu**

44Na, egoh i Pidelu eg-ikagi pelà, egtenà sa Metiengaw Suguy i Nemula diyà sa medoo etaw egdineg sa tegudon di. 45Tigtu negaip sa langun etaw Hudiyu epigittuu mig-unut si Pidelu kedu Hopi dò, enù ka igpeluhub i Nemula ma sa Metiengaw Suguy di diyà sa

etaw beken Hudiyu. 46Negaip da enù ka dinineg da sa medoo etaw beken Hudiyu eg-ikagi sa medoo balangan kagi endà netigan da duu owoy eg-oldò da ma si Nemula. Agulé, eg-ikagi Pidelu i diyà sa medoo duma di Hudiyu, guwaen di, 47“O medoo loyuk ku, migtenà ma sa Metiengaw Suguy i Nemula diyà kenagda éhè mendaa sa kinetenà di diyà kenita. Endà dé mehawidan ta kagda egpebautis diyà wayeg.”

48Agulé, migsasà Pidelu i anì pebautis da enù ka epgigtuu da ma dé diyà si Hésus Kelistu. Agulé, egpegeni da diyà si Pidelu anì melugayluguay pelawà mugpà diyà kenagda.

#### Ini Sa Tinulon I Pidelu Diyà Menuwa Hélusalém

**11** 1Na, dinineg ma dé sa medoo salu i Hésus owoy sa medoo etaw epgigtuu diyà uwang Hudiya sa egoh sa etaw beken Hudiyu epgigtuu dé diyà sa kagi i Nemula. 2Huenan di, egoh i Pidelu miglikù diyà Hélusalém, duen etaw Hudiyu egsigbolow kenagdi, enù ka ungayà da mekepangunut sa etaw beken Hudiyu diyà sa uledin igsugkow i Mosis. 3Egsigbolowen da, guwaen da, “Medaet iya wé binaelan ko, enù ka mig-ugpà ka gaa diyà sa dalesan etaw beken Hudiyu owoy mig-unut ka ma kenagda

egkaen, apiya di pa endà pinekelaingan da ipat.”

4Huenan di, sinelepang i Pidelu diyà kenagda sa langun nebaelan di kedu diyà sa edungan di. 5Guwaen di, “Egoh ku egsimbà dutu Hopi dò, duen sa igpehaa i Nemula diyà kenak. Duen sa netuntun kedu langit dò mig-angay diyà kenak éhè sa dakel kayab nesabaan diyà sa epat sulung di. 6Eghahauwen ku dalem sa kayab, owoy hinaa ku sa medoo balangan hinagtay owoy uled tanà owoy manuk tanà. 7Agulé duen sa mig-ikagi diyà kenak, guwaen di, ‘O Pidelu, tigdeg ka dé owoy sumbalì ko sa duma dalem kayab anì mekesedà ka.’ 8Dodox migsagbì a, guwaen ku, ‘O Datù, meked a kumaen iya wé anì endà meketipay a sa uledin igsugkow i Mosis denu sa kaenen melihi.’ 9Dodox mig-ikagi dema diyà kenak, guwaen di, ‘Yaka eg-eked duu egkaen, enù ka pinepion i Nemula iya wé.’ 10Taman telu gulê anan hediya iya wé binaelan di. Agulé nebatun sa kayab dutu langit dò.

11“Egoh sa kayab nebatun, dahiya dé sa telu etaw kedu Sisaliya dò migtebow diyà sa dalesan kenà ku eg-ugpà, enù ka eg-angayen da aken. 12Agulé mig-ikagi sa Suguy i Nemula diyà kenak, guwaen di, ‘Yaka egkesemek ka eg-unut kenagda.’ Agulé, duen sa enim etaw

egpigtuu kedu diyà Hopi  
mig-unut kenak eg-angay  
Sisaliya dò, owoy miggemow ké  
diyà sa dalesan i Kolniliyo sa  
etaw beken Hudiyu. 13Tinulon i  
Kolniliyo ma diyà kenami  
migpehaa sa egsugùsuguen i  
Nemula diyà kenagdi diyà sa  
dalesan di. Mig-ikagi gaa sa  
egsugùsuguen i Nemula,  
guwaen di, ‘Sugù ko sa etaw ko  
mangay Hopi dò anì angayen da  
Simon i pinengadanan da ma si  
Pidelu. 14Tuluen di kuna owoy  
sa medoo etaw eg-ugpà diyà sa  
dalesan ko anì mealukan yu  
langun denu sa salà yu.’  
15Agulé, egoh ku mig-edung  
egtulù kenagda, migtenà sa  
Metiengaw Suguy i Nemula  
diyà kenagda lagà mendaan sa  
kinetenà di diyà kenita egoh  
anay. 16Agulé netulengan ku sa  
kagi i Datù, guwaen di, ‘Egoh  
anay migbautis si Huwan sa  
medoo etaw diyà wayeg anì  
tandaan da sa kepigtuu da,  
dodox iya sa ibautis i Nemula  
keniyu sa Metiengaw Suguy di  
lumuhub diyà keniyu.’  
17Huanan di, nesetepeng doo sa  
igbegay di diyà sa etaw beken  
Hudiyu owoy sa igbegay di diyà  
kenita i etaw Hudiyu egoh ta  
migpigtuu diyà si Datù Hésus  
Kelistu. Huanan di, endà  
mealang ku duu sa egbaelan i  
Nemula.”  
18Na, egoh da migdineg sa  
inikagi i Pidelu, endà dé  
egsigbolowen da duu, dodoo

eg-looen da Nemula i, guwaen  
da, “Apiya sa etaw beken  
Hudiyu, mebegayan i Nemula  
doo kagda sa lalù endà meelut  
di amuk eg-ekedan da sa salà  
da.”

**Ini Sa Egoh Sa Medoo Etaw  
Migpigtuu Diyà  
Menuwa Antiokiya**

19Na, edung sa egoh i  
Estiban nematay, tigtu  
nepelihay sa medoo etaw  
egpigtuu. Egoh da migpelaguy,  
nesepalak da diyà sa uwang  
Ponisiya owoy diyà sa pungul  
Sipeli owoy diyà sa menuwa  
Antiokiya diyà uwang Siliya.  
Egtulon da sa kagi i Nemula  
diyà sa medoo duma da Hudiyu  
daa. 20Dodox duen etaw  
egpigtuu tegeSipeli owoy  
tegeSilini mig-angay diyà sa  
menuwa Antiokiya, owoy  
egtulonen da ma sa Mepion  
Tegudon denu si Datù Hésus  
diyà sa medoo etaw beken  
Hudiyu. 21Egtabangan i Nemula  
kagda, huenan di duen medoo  
etaw tegeAntiokiya migting sa  
pedu da owoy egpigtuu da dé  
diyà si Datù.

22Na, egoh sa etaw  
tegeHélusalém egpigtuu  
neketiig iya wé, egpeangayen  
da Bilnabi i dutu Antiokiya dò.  
23,24Mepion etaw Bilnabi i  
owoys mebagel sa kepigtuu di  
danà di linuhub sa Metiengaw  
Suguy i Nemula. Egoh di  
migtebow diyà Antiokiya,

neanggan temù enù ka hinaa di sa egoh i Nemula tigtu egtabang kenagda. Agulé, egtulù diyà kenagda anì endà egkeduwa sa pedu da anì peelesen da sa kepigtuu da diyà si Datù. Egoh da migdineg sa kagi di, egkedoo ma dé sa etaw epgigtuu diyà si Datù.

25Agulé, eg-angay Bilnabi i diyà menuwa Talesu anì lagbeten di Saulo i. 26Egoh di mighaa kenagdi, inuwit di dutu Antiokiya dò kenà da eg-ugpà taman segepalay, owoy egtuluen da sa medoo etaw. Na, sa medoo etaw epgigtuu diyà Antiokiya, iya sa anay pinengadanan da Etaw i Kelistu.

27Na, egoh da pelà diyà Antiokiya, duen duma tegesugkow i Nemula migtebow kedu Hélusalém dò. 28Iya sa sebaen tegesugkow i Nemula diyà kenagda, si Agabu. Egtigdeg owoy pinetulon sa Metiengaw Suguy i Nemula kagdi denu sa dakel bitil tumebow diyà sa langun menuwa diyà tanà. Na, mig-ukit iya wé egoh i Keladiyo sa sulutan diyà Loma. 29Agulé, nesesebaen sa penemdem sa medoo etaw tegeAntiokiya epgigtuu anì mulig da sa medoo duma da epgigtuu dutu Hudiya dò. Ipeuloy sa uman sebaen etaw sa hagdi mekebegay. 30Egoh da migtipoh sa igtabang da, egpeangayen da Bilnabi i owoy si Saulo anì uwiten da

diyà sa medoo kaunutan etaw epgigtuu dutu Hélusalém dò.

**Ini Sa Egoh I Pidelu Nelaun Kedu  
Diyà Bilangguwan**

**12** <sup>1</sup>Na egoh iya, eg-edung si Datù Hélod egpelihay sa medoo etaw epgigtuu diyà si Hésus. <sup>2</sup>Igpeimatay di Santiyago i kakay i Huwan egpetigbas sundang. <sup>3</sup>Agulé, neanggan sa medoo Hudiyu endà epgigtuu. Egoh i Hélod neketiig neanggan da, igpesikem di ma Pidelu i. Iya sa binaelan di egoh sa pista Hudiyu egoh da egkaen sa epan endà duen ipelenuk di. <sup>4</sup>Egoh da migsikem si Pidelu, egbilangguwen da owoy egbantayan sa sepulù owoy enim sundalu. Tig-epatay da egsesambisambiy egbantay, enù ka ungayà i Hélod ipeimatay di Pidelu i amuk meubus sa pista da anì hauwen sa langun etaw. <sup>5</sup>Dodoo egoh i Pidelu nebilanggu, tigtu da isimbà diyà si Nemula sa medoo etaw epgigtuu.

<sup>6</sup>Na, egoh sa sigep egoh di umenaw simag sa atas i Hélod egpeimatay si Pidelu, egtudug Pidelu i teliwadà sa duwa etaw egbantay. Nesebalà sa belad di pinolot duwa sangkali, owoy duen ma sa duwa sundalu egbantay bengawan sa bilangguwan. <sup>7</sup>Petow dé nelegdawan sa dalem bilangguwan enù ka duen sa

egsugùsuguen i Nemula egtingdeg dahiya. Egkugowen di Pidelu i anì enawen di, owoy guwaen di, “Téél ka. Enaw ka dé.” Hê, nelengà sa sangkalì diyà sa belad di. 8Agulé, eg-ikagi sa egsugùsuguen i Nemula diyà kenagdi, guwaen di, “Eles ko sa ginis ko owoy talumpà ka dé.”

Egoh i Pidelu migpangunut, eg-ikagi dema sa egsugùsuguen i Nemula, guwaen di, “Kawal ka dé owoy unut ka kenak.” 9Huanan di, mig-unut Pidelu i diyà sa egsugùsuguen i Nemula, dodox endà netiigan di duu amuk tuu sa egbaelan di, enù ka guwaen di dò tegeinep di daa. 10Egoh da migtalà diyà sa muna tegebantay owoy sa keduwa di, egtebow da diyà sa dakel pintù putow eg-angay diyà liyu sa bilangguwan. Petow dé neukaan peiges sa pintù, hê nekelaun da dé. Hê, egoh da eg-ipanaw diyà sa kalasada, petow dé nekedan sa egsugùsuguen i Nemula.

11Agulé, egoh i Pidelu neketiig sa nebaelan di, guwaen di, “Netiigan ku ini i. Pineangay i Datù sa egsugùsuguen di anì launen di aken kedu sa egkegaga i Hélod, anì endà meketuu di sa kepatay ku eg-angat-angatan sa medoo Hudiyu endà epgigtuu.”

12Egoh i Pidelu egpenemdem denu iya wé, mig-angay diyà sa dalesan i Maliya, sa inay i

Huhan pinengadanan da si Malkos. Nesi tipon dahiya sa medoo etaw anì isimbà da kagdi. 13Egoh di migtebow dahiya, egteguktuken di sa pintù diyà liyu sa dalesan. Agulé duen sa bayi udipen, si Loda, egtelenak kenagdi. 14Egoh di migdineg sa kagi i Pidelu, egkilalaen di kagdi owoy tigtu neanggan, dodox endà eg-ukaan di duu enù ka migpedelamet polo egpelikù diatas anì tulonen di diyà sa medoo duma di migtebow dé Pidelu i diyà sa liyu sa dalesan. 15Dodox guwaen da diyà kenagdi, “Egkeleng leng ka kéen.” Dodox takà eg-ikagi, guwaen di, “Tuu, dahiya Pidelu ya.” Huanan di, guwaen da, “Iya kéen sa egsugùsuguen i Nemula egtulik kenagdi.”

16Dodox takà egteguktuk Pidelu i taman endà eg-ukaan da duu. Agulé, egoh da mighaa kenagdi, tigtu negaip da. 17Binegeng i Pidelu sa belad di anì endà egséléken da, owoy egtulonon di kagda denu sa kelengà i Nemula kenagdi kedu diyà sa bilangguwan. Guwaen di ma, “Tuloni ko si Santiyago owoy sa medoo duma ta epgigtuu.” Agulé, eglekang Pidelu i eg-angay diyà sa sebaen ma dalesan.

18Egoh di umenaw simag, tigtu negaip sa medoo sundalu diyà sa bilangguwan enù ka endà netiigan da duu sa

inangayan i Pidelu. 19Agulé, sinugù i Hélod anì lagbeten da Pidelu i, dodox endà hinaa da duu. Sinugù di anì igsaan sa medoo tegebantay, dodox endà netiigan da duu sa kenà i Pidelu. Huenan di, igpeimatay di kagda langun.

Agulé, eglekang Hélod i kedu diyà uwang Hudiya, owoy eg-angay eg-ugpà dutu Sisaliya dò.

#### **Ini Sa Egoh I Hélod Nematay**

20Na sebaen agdaw, tigu egbulitan i Hélod sa medoo etaw tegeTilo owoy tegeSidon. Huenan di, neseunut da eg-angay diyà kenagdi anì seantangay da, enù ka kagdi sa Datù eg-ipat sa tanà kenà da egkuwa kaenen. Eglyouken da Belasto i, sa etaw tegebulig si Hélod, anì tabangan di kagda. 21Egoh di neuma sa agdaw da umantang, egkawal Hélod i sa metolol kawal datù owoy egpenuu diyà sa bangkù sa datù, owoy eg-ikagi diyà sa medoo etaw nesetipon. 22Agulé eg-oloen da, guwaen da, “Beken uloy etaw daa ini i eg-ikagi, dodox si Nemula dé polo.” 23Hê petow dé pinigtamayan sa egsugùsuguen i Nemula Hélod i, enù ka endà hinawidan di duu sa keolò da kenagdi. Agulé, nematay dé kinaen bitek.

24Na, nekeseluh uman sa kagi i Nemula, owoy egkedoo

dé sa etaw egyptuu. 25Agulé egoh i Bilnabi owoy si Saulo neubus da mighated pilak diyà menuwa Hélusalém, eglikù da dutu Antiokiya dò owoy pineunut da ma si Huwan Malkos.

#### **Ini Sa Egoh Da Migpeangay Si Bilnabi Owoy Si Saulo**

**13** 1Na, diyà sa umpedungan i Hésus diyà Antiokiya, duen sa etaw tegetulon sa kagi i Nemula egtebowtebow owoy duen ma sa tegetulù sa kagi i Nemula. Langun da si Bilnabi, owoy si Simiyon pinengadanan da si Meitem, owoy si Lusiyo tegeSilini, owoy si Saulo, owoy si Manain sa nekeunut si Gubilenu Hélod migkedakel egoh da batà pelà.

2Na, sebaen agdaw egpeulanen sa medoo etaw tegeAntiokiya egyptuu sa kekaen da anì sumimbà da diyà si Nemula. Ligò da egsimbà, mig-ikagi sa Metiengaw Suguy i Nemula diyà kenagda, guwaen di, “Hemili yu Bilnabi i owoy si Saulo, enù ka duen sa galebek ipebael ku diyà kenagda.”

3Agulé, egpeulanen da sa kekaen da anì isimbà da kagda diyà si Nemula owoy egsabaan da ma anì tandaan da kagda sa hinemilì i Nemula. Agulé egpeipanawen da kagda.

**Ini Sa Ego Da Egtulù Diyà Sa  
Pungul Sipeli**

4Na, pineangay sa Metiengaw Suguy i Nemula Bilnabi i owoy si Saulo, huenan di eglagbas da diyà sa menuwa Silusiya owoy eg-edà da sa dakel kumpit eg-angay dutu pungul Sipeli dò. 5Ego da migtebow diyà sa menuwa Salamis, egtulù da dahiya sa kagi i Nemula diyà sa simbaan Hudiyu. Mig-unut ma si Huwan Malkos anì egbuligan di kagda.

6Na, ego da migtukid sa medoo menuwa diyà siedò pungul, migtebow da diyà sa menuwa Papos. Hinaa da dahiya sa etaw Hudiyu, si Balhésus, sa tegebael balitmata, owoy uboubò kagdi gaa sa tegesugkow i Nemula.

7Egloyuken di sa gubilenu diyà siedò pungul, si Silgio Paulo. Tigtu milantek sa gubilenu, owoy igpeangay di Bilnabi i owoy si Saulo enù ka egkeiyap dumineg sa kagi i Nemula.

8Dodox egbogowen sa tegebael balitmata kagda, enù ka ungayà di endà migtuu sa gubilenu sa kagi i Nemula. Na, si Ilimas sa kepengadan da sa tegebael balitmata diyà sa kagi Geligu.

9Agulé, linuhub sa Metiengaw Suguy i Nemula Saulo i pinengadanan da si Pabelo. Eg-inengtengen di Ilimas i, 10owoy guwaen di, "Kuna sa etaw i Satanas, enù ka


egkuntelaen ko sa langun mepion owoy tegeakal ka etaw. Egpebutbuten ko hedem sa tuu kagi i Nemula anì endà pigtuuwen di etaw. 11Na, melangap ka dé ini ego di, enù ka pigtamayan i Nemula kuna. Endà umilag ka taman melugaylugay."

Hê petow dé linabunan sa mata di, owoy endà ma eg-ilag di. Huenan di, egpeakap-akap eglagbet sa etaw umagak kenagdi. 12Ego sa gubilenu mighaa iya wé, egpigtuu dé enù ka tigtu netuuwan diyà sa ketulù i Pabelo denu si Datù.

13Agulé, mig-edà Pabelo i owoy sa medoo duma di diyà sa dakel kumpit diyà menuwa Papos eg-angay dutu menuwa Pilga dò diyà uwang Pampiliya. Dodox ego da migtebow dahiya, sinalidan i Huwan Malkos kagda enù ka miglikù Hélusalém dò.

**Ini Sa Ketulù I Pabelo Diyà  
Antiokiya Diyà Uwang Pisidiya**

14Na, eglekang Pabelo i owoy si Bilnabi diyà sa menuwa Pilga, owoy eg-angay da dutu Antiokiya dò diyà uwang Pisidiya. Agulé, ego di neuma sa agdaw keetud etaw Hudiyu, eg-angay da dalem sa simbaan Hudiyu owoy egpennu da ma. 15Egbasawen sa ulu-ulù simbaan sa kagi i Nemula igsulat i Mosis owoy sa igsulat sa medoo tegesugkow i Nemula.



*Mig-edà da diyà sa dakel kumpit diyà menuwa Papos. (Binaelan 13:13)*

Agulé, igsasà sa ulu-ulú Pabelo i owoy si Bilnabi, guwaen di, “O Akay, meiyap ké amuk mikagi yu diyà sa medoo etaw nesetipon amuk duen sa itulù yu diyà kenami.”

16Agulé, egtigdeg Pabelo i owoy binegeng di sa belad di anì endà suméléken da. Guwaen di, “O medoo duma ku tugod i Islaél owoy langun yu etaw beken Hudiyu egssimbà diyà si Nemula, dinegdineg yu sa kagi ku. 17Si Nemula sa inunutan ta, kita i tugod i Islaél, kagdi sa mighemilì sa tupù ta egoh anay. Egoh da mig-upgà pelawà dutu Igipitu dò, tinabangan di kagda owoy migkedoo da ma dutu. Inuwit i Nemula kagda kedu diyà Igipitu danà sa dakel egkegaga di, 18owoy egbuligan

di kagda taman epat pulù gepalay egoh da diyà sa melabel tanà mediyù dalesan, apiya di pa endà egpigtuuwen da duu kagdi i. 19Agulé igpeimatay i Nemula sa pitu balangan etaw diyà sa tanà Kanan, owoy igbegay di sa tanà diyà sa etaw hinemilì di. 20Na, epat gatus owoy lima pulù gepalay sa lugay di egoh sa tupù ta mig-angay Igipitu dò taman sa egoh da migsakem sa tanà igbegay i Nemula.

“Agulé ginelal i Nemula sa medoo ulu-ulú da nesetugod-tugod taman sa egoh i Samuwéi sa tegesugkow i Nemula. 21Agulé, pinegeni da anì dumuen sa datù da. Huenan di, ginelal i Nemula Saulo i, sa anak i Kis tugod i Bénamin.

Epat pulù gepalay sa lugay sa kedadù i Saulo. 22Agulé egoh i Nemula migkedan si Saulo, hinemili di Dabid i anì egkedatù diyà kenagda. Guwaen i Nemula denu si Dabid,

‘Hinemili ku dé Dabid i, sa anak i Hési.  
Netuuwan a diyà kenagdi enù ka egpangunutan di sa langun igsugù ku kenagdi.’<sup>q</sup>

23Na, si Hésus sa sebaen tugod i Dabid. Kagdi sa pineangay i Nemula anì alukan di kita i tugod i Islaél, enù ka kagdi sa igpasad i Nemula diyà sa tupù ta egoh anay. 24Egoh i Hésus endà pa egtulù, egtegudon Huwan i diyà sa langun tugod i Islaél anì ekedan da sa salà da anì egpebautis da ma. 25Egoh di buyu dé neubus sa ketegudon i Huwan, guwaen di diyà sa medoo etaw, ‘Beken aken sa eg-angat-angatan yu, dodox duen polo sa etaw tumebow mekesambì kenak sa tigtu eglowon diyà kenak. Huenan di memala a amuk aken sa egsugùsuguen di egkeden talumpà di daa.’

26“O medoo duma ku tugod i Ablaham owoy langun yu etaw beken Hudiyu egssimbà diyà si Nemula, igpetiig dé i Nemula diyà kenita sa Mepion Tegudon denu sa kealuk di kenita.

27Dodox sa medoo etaw dutu Hélusalém dò owoy sa ulu-uluda, endà kinilala da duu Hésus i sa tegealuk etaw. Apiya di pa egbasawen da sa kagi i Nemula igsulat sa medoo tegesugkow di egoh anay diyà sa simbaan da uman agdaw keetud da, endà doo netiigan da duu. Dodoo neketuu dé sa kagi sa tegesugkow i Nemula danà da migpeimatay si Hésus. 28Apiya di pa endà duen salà di sa pesawan da mimatay kenagdi, egtemù da doo egpegeni diyà si Gubilenu Pilatu anì ipeimatay di. 29Huenan di, neketuu dé sa langun kagi i Nemula igpesulat egoh anay denu kenagdi. Agulé, kinuwa da sa lawa di diyà sa kayu ibrugsud owoy iglebeng da diyà sa batu tinosongon etaw. 30Dodox inenaw i Nemula doo sa egoh di nematay.

31Nelugaylugay takà migpehaa diyà sa medoo etaw mig-unut kenagdi mig-angay Hélusalém dò kedu uwang Galiliya.

Egtulonon da kita i tugod i Islaél sa hinaa da diyà kenagdi.

32“Huenan di, mig-angay ké dini anì tulonen ké diyà keniyu sa Mepion Tegudon denu si Hésus. Apiya di pa igpasad i Nemula diyà sa tupù ta egoh anay, 33neketuu doo ini egoh di diyà kenita i tugod da, enù ka inenaw i Nemula Hésus i sa

---

<sup>q</sup> 13:22 Basa ko 1 Samuwél 13:14.

egoh di nematay. Iya sa selepangan sa kagi i Nemula igpesulat diyà sa keduwa Isalem, guwaen di,  
 ‘Kuna sa Anak ku, owoy ipetiig ku ini egoh di aken sa emà ko.’<sup>r</sup>

**34**Na, si Hésus sa inenaw i Nemula owoy endà dé mematay di uman, enù ka iya sa kagi i Nemula igpesulat, guwaen di, ‘Begayan ku kiyu sa tigtu mepion igsasad ku diyà si Dabid.’<sup>s</sup> **35**Duen ma sa kagi i Nemula igsulat i Dabid egoh anay, guwaen di, ‘Endà mebaluy di diyà keniko amuk meledak sa lawa sa etaw hinemilì ko.’<sup>t</sup> **36**Na, netiigan ta migpangunut Dabid i diyà sa langun igsugù i Nemula taman egoh di nematay, agulé iglebeng da kagdi lagà mendaas sa tupù ta owoy neledak ma sa lawa di diyà lebeng. **37**Dodox si Hésus, endà neledak sa hagdi lawa, enù ka inenaw i Nemula egoh di nematay.

**38**“O medoo duma ku tugod i Islaél, ungayà ké metiigan yu ini i. Danà i Hésus, egtulonen ké diyà keniyu sa tegudon denu sa kepeuloy i Nemula sa salà ta. **39**Ipetiig ké diyà keniyu endà mekedan sa salà yu danà yu egpangunut diyà sa uledin igsugkow i Mosis, dodoo

mekedan polo sa salà ta danà ta epgigtuu diyà si Hésus.

**40**Huanan di, tulik yu anì endà mepigtamayan yu lagà sa medoo etaw tinulon sa tegesugkow i Nemula, guwaen di,

**41** ‘Taa yu, hih, kiyu i tegesumbung sa kagi i Nemula.

Megaip yu amuk pigtamayan ku kiyu, enù ka apiya di pa duen sa egbaelan ku diyà keniyu ini egoh di, endà doo migtuu yu, apiya ipetumàmà sa etaw diyà keniyu.’ ”<sup>u</sup>

**42**Na, egoh i Pabelo owoy si Bilnabi egpenaug diyà sa simbaan Hudiyu, igsasà da kagda anì pelikù da amuk meuma sa sebaen agdaw keetud anì manan da tumulù sa kagi i Nemula. **43**Agulé egoh da neseselab, eg-unut sa medoo etaw kenagda, sa medoo Hudiyu owoy etaw beken Hudiyu eg-unut sa adat Hudiyu. Egpebagelen da i Pabelo sa kepigtuu sa medoo etaw anì tigtu da epgigtuu diyà si Nemula sa egtabang kenagda.

**44**Na, egoh di neuma dema sa agdaw keetud, tigtu medoo temù sa etaw tegeAntiokiya egkesetipon anì dumineg da sa

**r** 13:33 Basa ko Isalem 2:7. **s** 13:34 Basa ko Isayas 55:3. **t** 13:35 Basa ko Isalem 16:10. **u** 13:41 Basa ko Habakuk 1:5.

kagi i Nemula itulù i Pabelo.  
**45**Dodoo tigtu egkesina sa medoo etaw Hudiyu endà epgiftuu egoh da mighaa sa medoo etaw nesetipon. Huenan di, egsigbolowen da sa itulù i Pabelo owoy egpeumàumaan da ma kagdi. **46**Dodoo endà nelimedangan Pabelo i owoy si Bilnabi eg-ikagi, guwaen da, “Kiyu i etaw Hudiyu sa nekehuna migdineg sa kagi i Nemula. Dodoo eg-eked yu epgiftuu iya wé, enù ka eg-ekedan yu sa lalù endà meelut di ibegay i Nemula. Huenan di, salidan ké kiyu anì tumegudom ké polo diyà sa medoo etaw beken Hudiyu.

**47**Iya sa baelan ké enù ka duen sa igsugù i Datù Nemula diyà kenami, guwaen di,

‘Hinemili ku kuna anì lagà ka sa palitaan lumegdaw diyà sa etaw beken Hudiyu, anì mealukan sa langun etaw diyà siini sinukub langit.’ ”<sup>v</sup>

**48**Na, egoh sa etaw beken Hudiyu migdineg iya wé, neanggan da temù owoy eg-loolen da Nemula i danà sa inikagi i Pabelo. Agulé, epgiftuu dé sa medoo etaw hinemili i Nemula anì melalù da taman melugay.

**49**Na, nekeseluh dé sa kagi i Datù diyà sa medoo menuwa medapag diyà Antiokiya.

**50**Dodoo sa medoo etaw Hudiyu endà epgiftuu, egpebuliten da polo sa medoo mapulù etaw owoy sa medoo mapulù bayi beken Hudiyu egsimbà diyà si Nemula. Huenan di, egpelihayen da Pabelo i owoy si Bilnabi, owoy eghemagawan da kedu diyà sa uwang Antiokiya. **51**Egoh da eglekang dahiya, egkedanan da sa kepung diyà lisen da anì metiigan sa etaw dahiya duen sa salà da danà da endà epgiftuu. Agulé, eg-angay da dutu menuwa Ikoniyo dò. **52**Dodoo tigtu neanggan polo sa medoo etaw epgiftuu diyà Antiokiya, owoy linuhub da ma sa Metiengaw Suguy i Nemula.

#### Ini Sa Egoh Da I Pabelo Dutu Menuwa Ikoniyo Dò

## 14

**1**Na, egoh i Pabelo owoy si Bilnabi migtebow diyà sa menuwa Ikoniyo, mig-angay da diyà sa simbaan Hudiyu owoy egtulù da denu si Hésus. Huenan di, epgiftuu dé sa medoo etaw Hudiyu owoy sa medoo etaw beken Hudiyu. **2**Dodoo duen etaw Hudiyu endà epgiftuu eg-engat sa medoo etaw beken Hudiyu anì bulitan da sa medoo etaw epgiftuu. **3**Na, nelugay

eg-ugpà Pabelo i owoy si Bilnabi dahiya, owoy endà nelimedangan da egtulù sa kagi i Nemula. Tinunungan i Nemula ma kagda anì mekebael da panduan egkegaipan etaw, huenan di netiigan sa langun etaw tuu sa kagi da denu sa ketabang i Nemula. 4Dodox tapay doo endà nesesebaen sa pedu sa medoo etaw dahiya. Duen etaw epigittuu diyà sa kagi sa salu i Hésus, owoy duen ma etaw eg-unut diyà sa kagi sa medoo Hudiyu endà epigittuu.

5Agulé, nesesebaen sa penemdem sa medoo etaw Hudiyu endà epigittuu owoy sa etaw beken Hudiyu owoy sa medoo ulu-ulù da. Ungayà da pelihayen da Pabelo i owoy si Bilnabi, owoy buungen da kagda batu hedem anì mematay da. 6,7Dodox egoh sa salu i Hésus neketiig iya wé, egpelaguy da mangay diyà sa menuwa Listela owoy menuwa Dilebi, sa duwa menuwa diyà uwang Likaoniya. Egtulù da sa Mepion Tegudon dahiya owoy diyà sa medoo menuwa medapag dahiya.

#### **Ini Sa Binaelan Da Diyà Menuwa Listela Owoy Menuwa Dilebi**

8Na, duen sa etaw pikat eg-ugpà diyà menuwa Listela. Inuwit di miglesut sa kepitakan di owoy endà mekebigkat di. 9Egoh di egpenuu dahiya, egdinegdinegen di sa ketulù i

Pabelo. Agulé, netiigan i Pabelo epigittuu dé sa pikat owoy mebulungan i Nemula. Agulé eg-inengtengen i Pabelo, 10owoy pinetaled di sa kagi di, guwaen di, “Tigdeg ka dé.” Hê, petow dé neketigdeg owoy nekebigkat ma dé.

11Egoh sa medoo etaw mighaa sa binaelan i Pabelo, eg-umow da eg-ikagi diyà sa kagi etaw tegeLikaoniya, guwaen da, “Migtebow dé diyà kenita sa medoo egpenemulawen ta, owoy egpegulilung da daa diyà sa duma ta maama.” 12Iya sa kagi da enù ka guwaen da dò si Bilnabi sa nemula da si Siyus, owoy si Pabelo sa salu di, si Hélmis, enù ka kagdi sa tegeikagi. 13Na, duen sa simbaan da diyà sa liyu sa menuwa Listela kenà da egsimbà diyà si Siyus sa nemula da. Huenan di, duen medoo tudu sapì binasakan da bulok inuwit sa ulu-ulù simbaan diyà sa bengawan kutà menuwa da anì imatayan da anì tandaan da sa kepenemula da si Pabelo owoy si Bilnabi.

14Dodox egoh i Bilnabi owoy si Pabelo neketiig sa ungayà sa medoo etaw, eglisien da sa kawal da danà da nebukul temù. Hê, egletu da diyà sa kenà sa medoo etaw nesetipon, owoy migpetaled da eg-ikagi, guwaen da, 15“O medoo etaw tegeListela. Yoko egpenemula

duu kami i. Kami sa etaw lagà mendaa keniyu, beken duu kami sa nemula yu. Mig-angay ké daa dini anì tumulù ké keniyu sa Mepion Tegudon, anì ekedan yu sa medoo uloy nemula yu anì migtuu yu diyà si Nemula, sa Nemula melalù sa migbael langit owoy tanà owoy dagat owoy sa langun taman.

**16**Egoh anay, pinandayà di sa langun etaw anì unutan da sa hagda pedu. **17**Dodox duen doo sa ukit ta meketiig kenagdi danà sa mepion egbaelan di diyà kenita, enù ka egbegay udan diyà kenita owoy sa langun egbunga uman palay anì duen sa kaenen ta owoy sa mepion pedu ta.” **18**Na, apiya di pa inikagi da iya wé, tigtu egkelikutan da doo eghawid sa medoo etaw egenemula kenagda.

**19**Agulé, duen medoo Hudiyu endà egpigtuu migtebow kedu menuwa Ikonio owoy menuwa Antiokiya diyà uwang Pisidiya. Eg-enggaten da sa medoo etaw tegeListela anì bulitan da Pabelo i, huenan di egbuungen da kagdi batu owoy eggodoyen da igpeliyu da sa menuwa enù ka guwaen da dò nematay dé. **20**Dodox egoh sa medoo etaw egpigtuu nesetipon diyà kenagdi, egtigdeg Pabelo i owoy egpelikù diyà sa menuwa Listela. Agulé, umenaw simag, eg-ipanaw dema Pabelo i owoy si Bilnabi eg-angay diyà sa menuwa Dilebi.

### **Ini Sa Egoh Da Migpelikù Diyà Antiokiya Diyà Uwang Siliya**

**21**Na, egtulù Pabelo i owoy si Bilnabi sa Mepion Tegudon diyà sa menuwa Dilebi, owoy medoo sa etaw egpigtuu diyà si Hésus dahiya. Agulé, egpelikù da dema diyà sa medoo menuwa inukitan da, sa menuwa Listela owoy menuwa Ikonio owoy menuwa Antiokiya diyà uwang Pisidiya. **22**Egtuluen da sa medoo etaw egpigtuu, owoy egpebagelen da sa pedu da anì endà mesemek da egpigtuu. Guwaen da, “Dumuen sa medoo lihay meukitan ta taman endà meuma ki sa kedadù i Nemula.” **23**Agulé, duen etaw hinemilì i Pabelo owoy si Bilnabi diyà sa uman sebaen menuwa anì gelalen da kagda kaunutan diyà sa umpsungan i Hésus. Egpeulanen da sa kekaen da anì egsimbà da diyà si Nemula anì isalig da kagda diyà sa Datù pinigtuu da.

**24**Agulé, eg-ukit da diyà sa medoo menuwa diyà uwang Pisidiya taman egoh da tumebow diyà sa medoo menuwa diyà uwang Pampiliya. **25**Egtugudon da sa kagi i Nemula diyà sa menuwa Pilga. Agulé eglagbas da diyà sa menuwa Ataliya. **26**Eg-edà da sa dakel kumpit dahiya, owoy eglikù da dé diyà sa sebaen menuwa Antiokiya sa tapay keduwan da. Egoh da endà pa

miglegkang diyà Antiokiya, igsimbà sa medoo etaw kagda anì tabangan i Nemula kagda diyà sa galebek da ubus dé binaelan da.

27Na, egoh da migtebow diyà Antiokiya, egsetiponen da sa langun etaw epgigtuu owoy egtulonen da sa langun binaelan i Nemula danà da egtulù, enù ka tinabangan i Nemula kagda migtulù diyà sa medoo etaw beken Hudiyu anì migtuu da ma. 28Agulé, nelugay eg-ugpà Pabelo i owoy si Bilnabi diyà sa medoo etaw epgigtuu dahiya.

**Ini Sa Egoh Da Neseiton  
Egseolomoy Dutu Hélusalém Dò**

**15** 1Na, duen etaw migtebow diyà Antiokiya kedu uwang Hudiya, owoy egtulù da diyà sa medoo etaw epgigtuu, guwaen da, “Endà mealukan yu diyà sa salà yu amuk endà egpekelaing yu ipat iling sa uledin igsugkow i Mosis.”

2Dodox tigtu egsigbolowen i Pabelo owoy si Bilnabi iya wé igtulù da. Egoh da pelà endà egkesepion, iya sa penemdem sa medoo etaw epgigtuu peangayen da Hélusalém dò Pabelo i owoy si Bilnabi owoy sa duma da anì seolomoy da owoy sa medoo salu i Hésus owoy sa kaunutan etaw epgigtuu denu iya wé ketulù egsigbolowen da. 3Agulé,

pineipanaw sa medoo etaw epgigtuu kagda. Egoh da eg-ukit diyà sa medoo menuwa diyà sa uwang Ponisiya owoy uwang Samaliya, egtulon da denu sa medoo etaw beken Hudiyu epgigtuu. Huenan di, tigtu neangan sa langun etaw epgigtuu egoh da migdineg iya wé.

4Na, egoh da i Pabelo migtebow dutu Hélusalém dò, sinaluan da kagda sa medoo salu i Hésus owoy sa medoo etaw epgigtuu owoy sa kaunutan da. Agulé, egtulonen i Pabelo owoy si Bilnabi sa langun binaelan i Nemula danà da egtulù. 5Dodox, duen dahiya etaw Palasiyu epgigtuu diyà si Hésus owoy egpangunut da temù diyà sa uledin igsugkow i Mosis. Egtigdeg da anì mikagi da, guwaen da, “Endà peunuten ta duu sa medoo etaw beken Hudiyu epgigtuu taman endà pekelaing da ipat owoy mangunut da ma diyà sa langun uledin igsugkow i Mosis.”

6Huenan di, egkesetipon sa medoo salu i Hésus owoy sa medoo kaunutan etaw epgigtuu anì egseolomen da sa mebaelan sa etaw beken Hudiyu, iling ka pekelaing da ipat ataw ka endà. 7Nelugay egsesigbolowoy da temù dahiya. Agulé egtigdeg Pidelu i, guwaen di, “O medoo duma ku, netiigan yu dé aken sa hinemilì i Nemula diyà kenita egoh anay anì tumulù a sa

Mepion Tegudon diyà sa medoo etaw beken Hudiyu, anì mekedineg da owoy mekepigtuu da ma. 8Owoy si Nemula egpeketiig sa pedu langun etaw, netuuwan ma diyà sa etaw beken Hudiyu. Netiigan ta iya wé danà di migbegay sa Metiengaw Suguy di diyà kenagda, lagà mendaan sa kinebegay di kenita egoh anay. 9Eg-amu yu amuk guwaen yu sa medoo Hudiyu daa sa pineuloyon i Nemula salà, dodox peuloyon di ma doo salà sa etaw beken Hudiyu danà da epgigtuu diyà kagdi. 10Huenan di, yoko eg-eked duu sa binaelan i Nemula diyà kenagda. Endà mepion di amuk egtegelen yu egpangunut sa etaw beken Hudiyu diyà sa langun uledin igsugkow i Mosis, enù ka endà negaga sa tupù ta duu epgangunut iya wé owoy endà ma negaga ta duu. 11Endà mebaluy di iya wé. Dodox netiigan ta nealukan ki danà sa dakel ketabang ipeuloy i Datù Hesus diyà kenita. Hediya ma sa kealuk di sa etaw beken Hudiyu.”

12Agulé, egpetemed sa langun etaw egoh da egdineg-dineg sa tinulon i Bilnabi owoy si Pabelo denu sa medoo panduan owoy sa medoo egkegaipan etaw igpebael i

Nemula diyà kenagda egoh da migtulù diyà sa medoo etaw beken Hudiyu. 13Egoh da neubus egtulon, eg-ikagi ma sa kaunutan da, si Santiyago, guwaen di, “O medoo duma ku epgigtuu, dinegdineg yu hih. 14Tinulon i Simon Pidelu diyà kenita denu sa kehidu i Nemula sa medoo etaw beken Hudiyu danà i Nemula mighemili kenagda anì kagda ma sa etaw di. 15Hediya ma sa kagi i Nemula igsulat sa medoo tegesugkow di egoh anay, guwaen di,

16 ‘Amuk meubus iya wé, pelikù a dema, guwaen i Datù.

Apiya di pa nepilay sa dalesan i Dabid, baelan ku dema.

Apiya di pa nekedan sa kedatù sa tugod i Dabid, umanan ku pa sa kedatù di.

17 Amuk hediya, umunut da diyà kenak sa langun etaw inumow ku, taman sa etaw beken Hudiyu.

18 Iya sa kagi i Datù Nemula igpetiig di egoh anay.’ ”<sup>w</sup>

19Na, eg-uman Santiyago i eg-ikagi, guwaen di, “Ini sa penemdem ku. Endà tegelen ta duu pekelaing ipat sa etaw beken Hudiyu epgigtuu diyà si

---

<sup>w</sup> 15:16-18 Basa ko Amos 9:11,12; Isayas 45:21.

Nemula. 20Dodoo mepion amuk sumulat ki daa diyà kenagda anì hawidan ta kagda kumaen sa igbegay diyà sa medoo inetaw penemulawen etaw owoy sa hinagtay pineleng owoy sa depanug, owoy anì endà ma ebgigà da. 21Mepion amuk pangunutan da iya wé, enù ka edung egoh anay sa uledin igsugkow i Mosis sa egbasawen etaw owoy itulù da uman Sapetu diyà sa simbaan Hudiyu diyà sa medoo menuwa.”

**Ini Sa Igsulat Da Diyà Sa Etaw  
Beken Hudiyu Egpigtuu**

22Agulé, nesesebaen sa penemdem sa medoo salu i Hésus owoy sa langun etaw egpigtuu owoy sa medoo kaunutan da. Hinemilì da sa duwa etaw diyà kenagda anì umunut da diyà si Pabelo owoy si Bilnabi mangay dutu Antiokiya dò. Iya sa hinemilì da si Silas owoy si Hudas pinengadanhan da ma si Balsabas, enù ka netuuwan sa medoo etaw egpigtuu diyà kenagda. 23Ini kagi sa sulat igpeuwit da diyà kenagda.

“O medoo duma ké etaw beken Hudiyu dutu Antiokiya dò owoy diyà uwang Siliya owoy uwang Silisiya. Iya sa egsulat ini i sa medoo salu i Hésus owoy sa medoo kaunutan etaw egpigtuu. Kami sa duma yu. 24Duen gaa etaw

kedu dini egbogo keniyu danà sa ketulù da. Egbogowen da gaa sa pedu yu. Dodoo endà pineangay ké duu kagda diyan. 25Huenan di, egoh ké neseton, nesesebaen sa penemdem ké owoy hinemilì ké sa etaw peangayen ké diyà keniyu, owoy munut da diyà sa loyuk ta eghiduwan ta, si Bilnabi owoy si Pabelo. 26Endà egsagipaen da duu sa hagtay da danà da egbael sa galebek i Hésus Kelistu sa Datù ta. 27Iya sa hinemilì ké peangayen ké diyà keniyu, si Hudas owoy si Silas, anì itulù da ma sa kagi igsulat ké diyà keniyu. 28Neseunut sa pedu ké sa Metiengaw Suguy i Nemula, huenan di endà tegelen ké duu kiyu egpepangunut diyà sa adat ké, dodoo ini daa sa itulù ké diyà keniyu. 29Yoko egkaen duu sa igbegay diyà sa medoo inetaw egpenemulawen etaw. Yoko ma egkaen duu sa depanug owoy sa hinagtay pineleng. Yoko ma ebgigà ya. Mepion amuk pangunutan yu iya wé kagi ké. Na, taman iya daa sa kagi ké.”

30Agulé, mig-ipanaw sa etaw pineangay da dutu Antiokiya dò. Egoh da migtebow dutu,

egsetiponen da sa langun etaw egpigtuu owoy ibegay da sa sulat diyà kenagda. 31Egoh da migbasa iya wé, neanganan da temù danà sa kagi iya wé sulat.

32Nelugay egtulù Hudas i owoy si Silas diyà sa medoo etaw egpigtuu, enù ka kagda ma tegesugkow sa kagi i Nemula. Egpebagelen da pedu sa etaw egpigtuu anì kumeeles sa kepigtuu da. 33Egoh di nelugaylugay sa keugpà da dahiya, pineipanaw sa medoo etaw egpigtuu kagda egoh da miggimbà anì kumelanh sa keipanaw da. Hê miglikù da Hélusalém dò. 34[Dodoo ungayà i Silas mugpà polo diyà sa menuwa Antiokiya.] 35Dodoo eg-ugpà da pelawà Pabelo i owoy si Bilnabi diyà Antiokiya. Egtulù da lapeg sa medoo duma da owoy egtegudon da ma sa kagi i Datù.

#### **Ini Sa Egoh I Pabelo Owoy Si Bilnabi Nesepalak**

36Na, egoh di nelugaylugay, eg-ikagi Pabelo i diyà si Bilnabi, guwaen di, “O Akay, pelikù ki diyà sa medoo menuwa kenà ta migtegudon sa kagi i Nemula anì metiigan ta amuk mepion sa kepigtuu da.”

37Ungayà i Bilnabi peunuten di si Huwan Malkos diyà kenagda. 38Dodoo meked Pabelo i iya wé, enù ka sinalidan i Malkos kagda egoh anay diyà uwang Pampiliya

owoy endà mig-uman di ebulig kenagda. 39Huenan di, egkesesigbolow da Pabelo i si Bilnabi, hê nesepalak da. Agulé, inuwit i Bilnabi Malkos i, owoy mig-edà da sa dakel kumpit mangay pungul Sipeli dò. 40Dodoo hinemili i Pabelo Silas i anì munut kenagdi. Isimbà sa medoo etaw egpigtuu kagda anì tabangan i Nemula kagda. Agulé, eg-ipanaw da dé. 41Tinukid da sa langun menuwa diyà uwang Siliya owoy uwang Siliya, owoy egpebagelen da sa kepigtuu sa medoo etaw.

#### **Ini Sa Egoh I Timotiyu Mig-unut Diyà Si Pabelo Owoy Si Silas**

**16** 1Na, mig-angay Pabelo i diyà sa menuwa Dilebi owoy menuwa Listela. Duen sa etaw egpigtuu eg-ugpà dahiya, si Timotiyu. Egpigtuu ma sa inay di etaw Hudiyu, dodoo etaw Geligu sa emà di. 2Mepion etaw Timotiyu i, owoy netiuwan da diyà kenagdi sa medoo etaw egpigtuu diyà menuwa Listela owoy menuwa Ikoniyo. 3Ungayà i Pabelo peunuten di Timotiyu i anì buligan di kagda. Agulé pinekelaing di sa ipat i Timotiyu anì endà ekedan di etaw Hudiyu diyà sa medoo angayan da, enù ka netiigan da endà nekelaingan sa ipat di enù ka etaw Geligu sa emà di. 4Egoh da eg-ukit diyà sa medoo

menuwa, egtuluuen da sa medoo etaw egpigtuu anì mangunut da diyà sa uledin binaelan sa medoo salu i Héesus owoy kaunutan etaw egpigtuu diyà Hélusalém. 5Huenan di, egkebagel sa kepigtuu sa medoo etaw, owoy uman agdaw egkeumanan sa kedoo da egpigtuu.

**Ini Sa Egoh Sa Etaw  
TegeMasidoniya Migpehaa Diyà  
Si Pabelo**

6Agulé, egtulù da Pabelo i sa kagi i Nemula diyà sa medoo menuwa diyà sa uwang Peligiya owoy uwang Galatiya, enù ka hinawidan sa Metiengaw Suguy i Nemula kagda anì endà tumegudon da diyà sa uwang Asiya. 7Egoh da medapag diyà sa uwang Misiya, ungayà da mangay diyà sa uwang Bitiniya, dodox hinawidan dema sa Suguy i Nemula kagda. 8Agulé, tinalà da sa uwang Misiya owoy miglagbas da dutu menuwa Teloas dò. 9Egoh da migtebow dutu, duen sa igpehaa i Nemula diyà si Pabelo egoh sa sigep. Hinaa di sa palas etaw tegeMasidoniya egsasà, guwaen di, “Téél yu dé. Angay yu Masidoniya dò anì mulig yu kenami.”

10Egoh i Pabelo mighaa iya wé, eglagbeten ké sa ukit keangay ké Masidoniya dò, enù ka netiigan ké egpeangayen i Nemula kami dutu anì tumulù

ké sa Mepion Tegudon diyà sa medoo etaw dahiya.

**Ini Sa Egoh I Lidiya Migpigtuu**

11Agulé, eg-edà ké sa dakel kumpit diyà menuwa Teloas, owoy egbatas ké diyà sa pungul Samotelasiya. Egoh di umenaw simag, eg-ipanaw ké uman mangay dutu menuwa Niapolis dò. 12Kedu dahiya, eg-ipanaw ké tanà mangay Pilipos dò, sa dakel menuwa diyà uwang Masidoniya kenà sa medoo etaw Loma eg-ugpà. Nelugaylugay ké eg-ugpà diyà Pilipos. 13Egoh di neuma sa agdaw keetud, mig-angay ké diyà sa lawa't wayeg diyà sa liyu sa menuwa Pilipos, enù ka duen gaa dahiya sa kenà sa medoo etaw egkesetipon anì sumimbà da. Egpenuu ké diyà sa keba't wayeg, owoy egkeseolom ké sa medoo bayi nesetipon dahiya. 14Duen sa bayi dahiya, si Lidiya kedu diyà menuwa Tiyatila. Kagdi sa tegedagang sa melalegà bulusan diyà menuwa Pilipos. Egpigtuu diyà si Nemula, owoy egtabangan i Datù anì tigtu meketiig sa ketulù i Pabelo. 15Egpebautis Lidiya i lapeg sa medoo etaw eg-ugpà diyà sa dalesan di. Agulé egsasà diyà kenami, guwaen di, “Angay yu ugpà diyà sa dalesan ku amuk tuu egketuuwan yu egpigtuu a diyà si Datù.” Na, tigtu egpegeni

diyà kenami, huenan di mig-unut ké diyà sa kagi di.

**Ini Sa Ego Da Nebilanggu Diyà  
Menuwa Pilipos**

16Na, sebaen agdaw egoh ké eg-angay diyà sa kenà etaw egsimbà, netelabukan ké sa bayi udipen linahuk busaw sa tegetulon sa endà pa tumebow di. Medoo sa pilak nekuwa sa épê di danà di egtulon sa endà pa tumebow di. 17Takà egsetugdug sa bayi diyà kenami owoy eg-umow, guwaen di, “Kagda sa etaw sinugù sa tigtu mapulù Nemula anì itulù da keniyu sa ukit kealuk i Nemula etaw.”

18Anan dé hediya sa egbaelan di uman agdaw. Agulé, egoh i Pabelo endà egpeketigkel di uman, egtaengen di kagdi owoy guwaen di diyà sa busaw, “Pineangay i Hésus Kelistu aken, huenan di eg-ikagi a diyà keniko, laun ka dé diyà kenagdi.”

Hê, petow dé miglaun sa busaw diyà kenagdi. 19Dodoo egoh sa épê di neketiig nedaelan dé sa kenà da egkuwa pilak, egsigkemen da Pabelo i owoy si Silas, owoy eg-agaken da kagda diyà sa teliwadà menuwa atung kenà da eg-antang. 20Eg-uwiten da kagda diyà sa uwis etaw Loma, owoy guwaen da, “Kaini sa etaw Hudiyu ebgogo kenita

dahini, 21owoy itulù da sa adat endà mebaluy di diyà sa uledin ta, enù ka kita sa etaw Loma.”

22Agulé, tigtu egbulitan sa medoo etaw Pabelo i owoy si Silas. Eglisien sa uwis sa kawal da i Pabelo si Silas anì egtapesen da kagda. 23Ego da neubus tinapes, egbilangguwen da kagda. Igsasà sa uwis diyà sa tegebantay anì tigtu bantayan di kagda anì endà mekepelaguy da. 24Huenan di, dinalem sa tegebantay kagda diyà sa bilik teliwadà sa bilangguwan, owoy pinetung di ma sa lisen da anì endà mekepelaguy da.

25Dodox egoh sa teliwadà sigep, egsimbà Pabelo i owoy si Silas, owoy egduuy da ma eg-olò si Nemula. Egdinegen sa medoo liyu etaw nebilelanggu kagda. 26Petow dé duen sa tigtu mebagel linug, owoy nekayung sa medoo bugsud sa bilangguwan. Hê, neukaan sa langun pintù di, owoy nelengà sa medoo sangkali igpolot diyà sa medoo nebilelanggu. 27Ego sa tegebantay mig-enaw, hinaa di neukaan dé sa pintù, huenan di eghuguten di sa sundang di anì egpetoyò enù ka guwaen di dò nekepelaguy dé sa medoo nebilelanggu. 28Dodox egpetaled eg-umow Pabelo i, guwaen di, “Yaka egpetoyò ya. Kaini ké doo langun.”

29Agulé, igpeangay sa tegebantay sa sulù, owoy medelamet eg-angay diyà si

Pabelo. Egligkued diyà sa taengan i Pabelo owoy si Silas, owoy eglukub danà di nelimedangan. 30Agulé eg-uwiten di kagda diyà sa liyu sa bilangguwan, owoy eg-igsà, guwaen di, "O Akay, ngadan sa baelan ku anì mealukan a?"

31Egsagbì da, guwaen da, "Pigtuu ka dé diyà si Datù Hésus anì mealukan ka owoy sa medoo duma ko ma." 32Agulé egtegudon da sa kagi i Nemula diyà kenagdi lapeg sa langun etaw eg-ugpà diyà sa dalesan di. 33Apiya di pa teliwadà sigep, egpegeuséen sa tegebantay sa medoo palì i Pabelo owoy si Silas. Agulé egpebautis lapeg sa medoo etaw diyà sa dalesan di. 34Agulé, egpegemowen di Pabelo i owoy si Silas diyà sa dalesan di owoy egpekaenen di kagda. Neanggan da langun danà da migpigtuu dé diyà si Nemula.

35Egoh di umenaw simag, sinugù sa uwis sa medoo sundalu mangay diyà sa tegebantay, owoy guwaen da, "Pelaun ko dé kagda." 36Huenan di, guwaen sa tegebantay diyà si Pabelo, "Duen sa sinugù sa uwis anì melaun yu. Mebaluy dé amuk mipanaw yu, owoy kumelanh sa keipanaw yu."

37Dodox endà neiyap Pabelo i, owoy guwaen di diyà sa sundalu, "Apiya di pa kami sa etaw Loma, tinapes da doo kami

diyà sa kehaa sa medoo etaw, owoy nebilanggu ké apiya di pa endà duen salà ké. Ungayà da endà metiigan di etaw sa kelaun ké. Dodox endà mipanaw ké taman endà mangay da dini anì launen da kami."

38Agulé, igsugkow sa sundalu diyà sa uwis sa inikagi i Pabelo. Egoh sa medoo ulu-ulu neketig etaw Loma Pabelo i owoy si Silas, tigtu da nelimedangan. 39Huenan di, eg-angay da diyà sa bilangguwan anì launen da kagda. Egpepasinsiya da diyà si Pabelo owoy si Silas, owoy isasà da kagda anì lumegkang da kedu diyà Pilipos. 40Agulé, egoh da nekelaun kedu diyà bilangguwan, eg-angay da diyà sa dalesan i Lidiya. Egseolomoy da sa medoo etaw epgituu dahiya, owoy egtulù da ma anì kumebagel sa kepigtuu da. Agulé eg-ipanaw da dema.

#### Ini Sa Egoh I Pabelo Diyà Menuwa Tésalonika

**17** 1Na, egoh i Pabelo owoy si Silas mig-ukit diyà sa menuwa Ampipolis owoy menuwa Apoloniya, egtebow da diyà sa menuwa Tésalonika. Duen ma sa simbaan Hudiyu dahiya. 2Mig-angay egssimbà Pabelo i diyà sa simbaan da, enù ka iya sa hagdi adat. Egtulù dahiya taman telu kasapetu sa agdaw keetud da. 3Sinelepang di ma

diyà kenagda sa kagi i Nemula igpesulat anì tigtu metiigan da nepelihay sa Tigtu Datù sinugù i Nemula owoy neimatayan ma, dodox neenaw doo egoh di nematay. Guwaen i Pabelo, "Si Hésus sa tinulon ku diyà keniyu, kagdi si Kelistu sa Tigtu Datù sinugù i Nemula." 4Agulé, duen etaw Hudiyu epgiftuu dé owoy eg-unut-unut da diyà si Pabelo owoy si Silas. Epgiftuu ma sa medoo etaw beken Hudiyu egsimbà diyà si Nemula owoy sa medoo mapulù bayi ma.

5Dodox egkesina sa medoo Hudiyu endà epgiftuu, huenan di egsetiponen da sa medoo medaet etaw pauken. Egoh da migkedoo dé, ebgogowen da sa medoo etaw tegeTésalonika. Eg-angay da peula-ula diyà sa dalesan i Hason, enù ka ungayà da sigkemen da Pabelo i owoy si Silas anì uwiten da diyà sa taengan sa medoo etaw. 6Dodox endà hinaa da duu kagda, huenan di eg-uwiten da polo Hason i owoy sa medoo liyu etaw epgiftuu mangay diyà sa medoo ulu-ulù menuwa. Egpetaled da eg-ikagi, guwaen da, "Migtebow ma dé dahini siini medoo etaw ebgogo sa langun etaw diyà tanà. 7Pinegemow i Hason kagda diyà sa dalesan di. Migtipay da langun diyà sa uledin i Sulutan Sisal, enù ka guwaen da duen ma sa sebaen Sulutan, si Hésus gaa."

8Na, egkebukul temù sa medoo etaw owoy sa medoo ulu-ulù menuwa egoh da migdineg iya wé. 9Agulé, egpebayaden da Hason i owoy sa medoo duma etaw epgiftuu anì ipasad da endà dé uman da mogo Pabelo i owoy si Silas. Agulé nekelaun da dé.

#### **Ini Sa Egoh I Pabelo Diyà Sa Menuwa Biliya**

10Na egoh sa sigep, egpeangayen sa medoo etaw epgiftuu Pabelo i owoy si Silas dutu menuwa Biliya dò. Egoh da migtebow dahiya, eg-angay da diyà sa simbaan Hudiyu. 11Uman pa mepion sa medoo Hudiyu dahiya diyà sa etaw Hudiyu tegeTésalonika, enù ka tigtu egkeiyap da egdinegdineg sa kagi i Nemula. Uman agdaw, eg-inau da sa kagi i Nemula igpesulat anì metiigan da amuk tuu sa igtulù i Pabelo. 12Agulé, medoo dé sa etaw Hudiyu epgiftuu, owoy duen ma medoo etaw beken Hudiyu epgiftuu, medoo maama owoy medoo mapulù bayi.

13Dodox egoh sa medoo Hudiyu tegeTésalonika neketiig egtulù ma Pabelo i sa kagi i Nemula diyà menuwa Biliya, eg-angay da ma diyà Biliya anì pebuliten da sa medoo etaw diyà si Pabelo. 14Huenan di, egkebugbug sa medoo etaw egpeangay si Pabelo dutu dagat dò. Dodox eg-ugpà daa Silas i

owoy si Timotiyu diyà sa menuwa Biliya. 15Duen ma etaw eg-unut si Pabelo taman sa menuwa Atinas. Agulé egoh da miglikù diyà Biliya, egtulonen da diyà si Silas owoy si Timotiyu sa igsasà i Pabelo diyà kenagda anì petéél da lumohot kenagdi dutu Atinas dò.

**Ini Sa Egoh I Pabelo Migtulù  
Diyà Sa Menuwa Atinas**

16Na, egoh i Pabelo eg-angat si Silas owoy si Timotiyu diyà menuwa Atinas, tigtu egkebukul sa pedu di egoh di mighaa sa medoo inetaw egpenemulawen da dahiya. 17Huanan di, egdalem diyà sa simbaan Hudiyu owoy eg-olomon di sa medoo etaw Hudiyu owoy sa medoo etaw beken Hudiyu egsimbà diyà si Nemula. Uman agdaw, eg-olomon di ma sumalà dé sa etaw eghauwen di diyà sa padian. 18Duen ma sa tegetulù sa tegudon i Ipikulus owoy sa tegetulù sa tegudon i Sinos. Egsesigbolowoy da si Pabelo. Duen ma etaw eg-igsà, guwaen da, “Ngadan iya wé igtulù siedò tegeikagi uloy?”

Dodoo guwaen sa liyu etaw, “Sa sebaen ma nemula kéen sa igtulù di.” Iya sa inikagi da enù ka migtegudon Pabelo i denu si Hésus owoy sa keenaw di. 19Agulé, inuwit da Pabelo i diyà sa Aliycopago kenà sa medoo ulu-ulü nesetipon. Egsasà da diyà kenagdi,

guwaen da, “Tulon ko diyà kenami sa magtu igtulù ko, 20enù ka duen sa igtulù ko nemagtawan ké egdineg. Huanan di, ungayà ké dumineg sa selepangan di.” 21Na, iya sa inikagi da, enù ka sa langun etaw tegeAtinas owoy sa medoo liyu etaw eg-ugpà dahiya, egkeiyapan da eg-olom owoy egdinegdineg sa magtu igtulù enù ka iya sa hagda adat.

22Agulé, egtingdeg Pabelo i diyà sa taengan sa medoo ulu-ulü nesetipon dahiya, owoy eg-ikagi, guwaen di, “O medoo etaw tegeAtinas, netiigan ku dé tigtu eg-udes yu egsimbà diyà sa medoo egpenemulawen yu, 23enù ka egoh ku migtimbul dahini diyà Atinas, hinaa ku sa medoo simbaan yu. Duen ma sa simbaan tinaguan yu sulat, guwaen di, ‘Sa Simbaan Sa Nemula Endà Netiigan Ta Duu.’ Na, sa Nemula egsimbaan yu apiya di pa endà netiigan yu duu, kagdi sa itulù ku diyà keniyu ini egoh di. 24Kagdi si Nemula sa migbael tanà owoy langun taman diyà tanà, owoy kagdi sa Datù diyà langit owoy dahini ma diyà tanà. Huanan di, endà egpekeugpà di dalem sa simbaan binaelan etaw. 25Endà duen sa kulang di kenà ta meketabang kenagdi, enù ka kagdi polo sa egbegay langun diyà kenita lapeg sa ginawa ta owoy sa lalù ta. 26Egoh anay

binaelan di sa sebaen etaw, si Adam, sa tupù sa langun etaw egpeugpaen di diyà siini sinukub langit. Egoх anay tapay dé netiigan di sa lugay etaw mekeugpà diyà tanà owoy sa kenà da mugpà diyà tanà.

27Binaelan i Nemula iya wé anì lagbeten ta langun kagdi i owoy hauwen ta kagdi, enù ka endà mediyù di diyà kenita, 28enù ka guwaen sa etaw,

‘Kagdi sa eghagtay kenita owoy sa egpebael kenita owoy sa egpepenemdem kenita.’

Hediya ma sa igsulat sa etaw milantek diyà keniyu, guwaen di, ‘Anan ki anak i Nemula.’

29“Na, amuk tuu kita sa anak i Nemula, endà mepion di amuk penemdem ta si Nemula sa inetaw daa binaelan bulawan ataw ka pilak ataw ka batu pinetolol sa etaw neketiig. 30Egoх anay, pinandayà i Nemula sa etaw egbael medaet, enù ka endà pa netiigan da duu kagdi i. Dodoо ini egoх di igsasà di diyà sa langun etaw diyà siini sinukub langit anì ekedan da sa salà da, 31enù ka tapay dé hinemili di sa agdaw egoх di metulon sa ketamanan sa langun etaw diyà tanà. Duen ma sa etaw hinemili di anì tumulon iya wé, owoy metudà sa ketulon di. Meketuu doo iya wé, enù ka inenaw i Nemula kagdi i egoх di nematay.”

32Na, egoх da migdineg sa inikagi i Pabelo denu sa keenaw etaw nematay, duen etaw egpeumàumà kenagdi. Dodoо guwaen ma sa liyu etaw, “Tulù ko kami amuk sebaen agdaw pa.” 33Agulé, sinalidan i Pabelo kagda. 34Dodoо duen ma duma etaw egpigtuу dé diyà si Hésus owoy eg-unut-unut da diyà si Pabelo. Duen diyà kenagda si Dionisiyo sa sebaen ulu-ulu da, owoy sa bayi si Damalis, owoy duen ma sa medoo duma etaw egpigtuу.

#### Ini Sa Egoх I Pabelo Migtegudon Diyà Menuwa Kolintu

**18** 1Na, egoх di neubus iya wé, eglekang Pabelo i diyà menuwa Atinas eg-angay diyà Kolintu.  
 2Netelabuk di dahiya sa etaw Hudiyu tegePonto, si Akila. Magtu da migtebow kedu uwang Italiya dò lapeg sa sawa di si Pelisila, enù ka hinemagawan i Sulutan Keladiyo sa langun etaw Hudiyu kedu menuwa Loma diyà uwang Italiya. Na, eg-angay Pabelo i eglengen diyà kenagda.  
 3Eg-ugpà diyà kenagda owoy egsebuligay da, enù ka nesetepeng sa galebek da egbael kemalig. 4Uman agdaw keetud etaw Hudiyu, egseolomoy da Pabelo i sa medoo etaw diyà simbaan Hudiyu anì dumuen etaw Hudiyu migtuu diyà si

Héesus taman sa etaw beken Hudiyu ma.

5Na, egoh i Silas owoy si Timotiyu migtebow kedu uwang Masidoniya dò, takà egtulù Pabelo i sa kagi i Nemula uman agdaw anì migtuu sa medoo Hudiyu si Héesus sa Tigtu Datù sinugù i Nemula diyà tanà. 6Dodox egkuntelaen sa liyu etaw Hudiyu Pabelo i, owoy egsumbungun da sa igtulù di. Agulé, egtepungen i Pabelo sa kawal di anì tandaan di duen sa salà da enù ka endà egpigtuu da. Guwaen di, “Amuk mepigtamayan yu, muni dé diyà keniyu amuk iya sa uyot yu. Endà dé duen sa naken dahiya. Edung ini egoh di, mangay a tumulù diyà sa etaw beken Hudiyu.”

7Agulé, sinalidan di kagda, owoy mighalì diyà sa dalesan i Titus Husto, sa etaw beken Hudiyu egisimbà diyà si Nemula. Neseabay sa dalesan di sa simbaan Hudiyu. 8Na, si Kelispú sa ulu-ulù diyà sa simbaan Hudiyu. Egpigtuu ma diyà si Datù lapege sa medoo etaw eg-ugpà diyà sa dalesan di. Duen ma medoo liyu etaw tegeKolintu migdineg sa kagi i Nemula, egpigtuu da owoy migpebautis da ma.

9Na sebaen sigep, egpehaa Datù Héesus i diyà si Pabelo, owoy guwaen di, “Yaka egkelimedangan na. Yaka ma egsabuh ha egtulù, dodox uman

ka tulù, 10enù ka aken sa tumabang keniko. Endà duen etaw mekepesakit keniko, enù ka duen pa sa medoo etaw migtuu diyà kenak dahini diyà Kolintu.”

11Agulé, eg-ugpà Pabelo i diyà menuwa Kolintu taman segepalay owoy enim gebulan, owoy itulù di sa kagi i Nemula diyà sa medoo etaw dahiya.

12Dodox egoh i Galiyu sa gubilenu diyà uwang Akaya, nesesebaen sa penemdem sa medoo Hudiyu endà egpigtuu. Sinigkem da Pabelo i owoy inuwit da diyà si Gubilenu Galiyu anì igsaan di. 13Egtipu da, guwaen da diyà si Galiyu, “Egtulù siini etaw sa sebaen ma ukit kesimbà ta diyà si Nemula, dodox meked ké iya wé enù ka tipayen di sa uledin denu sa kesimbà ké.”

14Egsagbì hedem Pabelo i, dodox eg-ikagi polo Gubilenu Galiyu i diyà sa medoo Hudiyu, guwaen di, “Amuk duen sa dakel salà binaelan siini etaw, mepion amuk unutan ku sa kagi yu, kiyu i etaw Hudiyu.

15Dodox amuk egsesigbolowoy yu daa denu sa ketulù yu owoy sa tupù yu owoy sa uledin yu, kiyu polo sa umantang denu iya wé, enù ka meked a umantang amuk hediya.” 16Agulé eghemagawan di sa medoo etaw Hudiyu kedu diyà sa kenà da eg-antang. 17Agulé, egsabaan sa medoo etaw beken Hudiyu

Sostinis i, sa ulu-ulu diyà sa simbaan Hudiyu. Egbalbalen da kagdi diyà sa liyu sa kenà da eg-antang, dodoo egpandayaen i Galiyu sa egbaelan da.

**Ini Sa Egoh I Pabelo Miglikù  
Dutu Antiokiya Dò**

18Nelugay eg-ugpà Pabelo i diyà sa medoo etaw egpigtuu diyà menuwa Kolintu. Agulé egoh di eglekang, eg-unut kenagdi Akila i owoy sa sawa di, si Pelisila. Egoh da nekeuma diyà sa menuwa Séngkeliya, migpegunting Pabelo i anì tandaan di pinetuu di sa pasad di diyà si Nemula. Agulé, mig-edà da dakel kumpit mangay dutu uwang Siliya dò. 19Egoh da migtebow Épéso dò, sinalidan i Pabelo Akila i owoy si Pelisila, enù ka mig-angay diyà sa simbaan Hudiyu owoy egtulù dahiya. 20Ungayà da melugay Pabelo i mugpà diyà kenagda, dodoo eg-eked. 21Agulé egoh di buyu dé mipanaw dema, eg-ikagi diyà kenagda, guwaen di, “Amuk ungayà i Nemula, pelikù a dema diyà keniyu.”

Agulé, mig-edà Pabelo i sa dakel kumpit diyà Épéso mangay dutu Siliya dò. 22Egoh di migtebow dutu Sisaliya dò, eglagbas dutu Hélusalém dò anì lumengen diyà sa medoo etaw egpigtuu dahiya. Agulé, egpelikù Antiokiya dò diyà sa uwang Siliya. 23Egoh di

nelugaylugay eg-ugpà dahiya, eg-ipanaw dema owoy egtukiden di sa medoo menuwa diyà uwang Galatiya owoy uwang Peligiya anì pebagelen di sa kepigtuu sa medoo etaw.

**Ini Sa Egoh I Apolos Migkulù  
Diyà Épéso Owoy Diyà Kolintu**

24Na egoh iya, duen ma sa etaw Hudiyu, si Apolos tegeAlihandeliya, migtebow diyà menuwa Épéso. Mepion sa ketulù di owoy tigtu netiigan di sa kagi i Nemula igpesulat, 25owoy igtulù di denu sa kepigtuu etaw diyà si Datù. Apiya di pa megelol egtulù owoy metudà ma sa ketulù di denu si Hésus, iya daa sa netiigan di sa kepebautis igtulù i Huwan Tegebautis. 26Endà egkelimedangan Apolos i egtulù diyà sa simbaan Hudiyu diyà menuwa Épéso. Dodoo egoh i Akila owoy si Pelisila migdineg sa ketulù di, inuwit da kagdi diyà sa dalesan da anì selepangen da diyà kenagdi sa kagi i Nemula denu si Hésus sa endà pa netiigan di duu.

27Agulé, ungayà i Apolos mangay dutu uwang Akaya dò, huenan di ebuligan sa medoo etaw tegeÉpéso egpigtuu danà da egsulat diyà sa medoo etaw egpigtuu dutu Akaya dò anì egsaluan da kagdi. Agulé egoh di migtebow diyà Akaya, mepion sa ketabang di sa medoo etaw egpigtuu diyà si

Hésus danà sa ketabang igpeuloy i Nemula diyà kenagda. 28Egoh di egtulù kenagda, sinelepang di sa kagi i Nemula igpesulat anì metiigan sa medoo etaw Hudiyu si Hésus sa Tigtu Datù sinugù i Nemula diyà tanà. Huenan di, inatuwan di sa medoo Hudiyu egsigbolow kenagdi diyà sa taengan sa medoo etaw.

**Ini Sa Egoh I Pabelo Migtulù  
Diyà Menuwa Épéso**

**19** 1Na, egoh i Apolos pelà diyà Kolintu, eg-ipanaw Pabelo i diyà uwang Akaya taman egoh di migtebow diyà menuwa Épéso. Hinaa di sa etaw epgigtuu dahiya, 2owoy eg-igsà diyà kenagda, guwaen di, “Egoh yu migpigtuu, linuhub yu pa sa Metiengaw Suguy i Nemula?”

Egsagbì da, guwaen da, “Endà, enù ka endà tinulù ké denu sa Suguy i Nemula.”

3Eg-igsà Pabelo i, guwaen di, “Egoh yu migpebautis, ngadan sa selepangan sa kebautis yu?”

Guwaen da egsagbì, “Sa kepebautis igtulù i Huwan.”

4Agulé guwaen i Pabelo, “Binautis i Huwan sa medoo etaw mig-eked sa salà da. Dodoo igtulù di ma diyà sa medoo Hudiyu anì pigtuwen da sa etaw mekesambì kenagdi, si Hésus.”

5Egoh da migdineg iya wé, egpebautis da dema danà sa

kepigtuu da si Datù Hésus. 6Agulé egoh i Pabelo migsabà kenagda, egluhuben sa Metiengaw Suguy i Nemula kagda, owoy egpekeikagi da sa medoo balangan kagi endà netiigan da duu, owoy egtulon da ma sa kagi i Nemula egtebowtebow. 7Sepulù owoy duwa sa kedoo da.

8Na, taman telu gebulan, takà eggemow Pabelo i diyà sa simbaan Hudiyu diyà Épéso. Endà nelimedangan di egtulù kenagda denu sa kedadù i Nemula anì migtuu da diyà si Hésus. 9Dodox duen ma etaw meked da migtuu enù ka metegas sa ulu da, owoy egsumbungun da sa kagi i Nemula igtulù i Pabelo diyà sa medoo etaw nesetipon. Huenan di, sinalidan i Pabelo kagda owoy inuwit di sa medoo etaw epgigtuu diyà sa pangagian kenà i Tilano egtulù. Uman agdaw takà egtegudon Pabelo i dahiya 10taman duwa gepalay. Huenan di, nekedineg sa langun etaw diyà uwang Asiya sa tegudon denu si Datù Hésus, iling ka etaw Hudiyu ataw ka beken Hudiyu.

**Ini Sa Egoh Sa Pitu Anak I Iskiba  
Inatuwan Busaw**

11Na, igpebael i Nemula diyà si Pabelo sa medoo panduan egkegaipan etaw. 12Apiya sa ules di ataw ka sa ginis di inuwit da diyà sa etaw

eglinadu, melikuan da doo. Hediya ma amuk inuwit da diyà sa etaw linahuk busaw,mekelaun doo sa busaw diyà kenagda.

13Duen ma etaw Hudiyu egtimbultimbul enù ka egpelesut da ma sa busaw diyà sa etaw linahuk busaw. Ungayà da pelaun da ma busaw danà sa tunung sa ngadan i Datù Hésus, owoy guwaen da diyà sa busaw, "Laun ka dé danà i Hésus sa igtulù i Pabelo."

14Hediya ma sa egbaelan sa pitu anak i Iskiba, sa etaw Hudiyu Tigtu Ulu-ulù Tegesimbà. 15Dodox migsagbì sa busaw diyà kenagda, guwaen di, "Egkilalaen ku Hésus i owoy si Pabelo ma. Dodox kiyu, endà egpangunutan ku duu." 16Agulé, eglimbulen sa etaw linahuk busaw kagda owoy eg-atuwan di kagda. Huenan di, migpelaguy da kedu diyà iya wé dalesan egoh da nepalian owoy nekedan ma sa ginis da.

17Na, egoh etaw Hudiyu owoy etaw beken Hudiyu diyà Épéso migdineg denu iya wé, tigtu negaip da langun owoy eg-loolen da Datù Hésus i. 18Huenan di, eg-ekedan sa medoo etaw magtu egpigtuu sa salà da ma, owoy endà eglidungen da duu sa medaet binaelan da. 19Duen ma medoo etaw eg-ipat sa libelu egtulù denu sa lambus owoy dukah. Tinipoh da iya wé owoy

eg-ulowen da diyà sa kehaa sa langun etaw. Binilang da sa lagà sa langun libelù inulow da, hê nekeuma lima lagsà. 20Na danà iya wé, nekeseluh sa tegudon denu si Datù Hésus, owoy egkedoo ma dé sa etaw egpigtuu.

#### **Ini Sa Egoh Etaw Tegetuwang Egbogo Sa Etaw Diyà Épéso**

21Na, egoh di neubus iya wé, ungayà i Pabelo umukit diyà sa uwang Masidoniya owoy uwang Akaya anì mangay dutu Hélusalém dò. Guwaen di, "Amuk meubus a diyà Hélusalém, lumagbas a dutu Loma dò." 22Agulé pineangay di dutu Masidoniya dò sa duwa etaw egbulig kenagdi, si Timotiyu owoy si Ilasto. Dodox nelugaylugay Pabelo i eg-ugpà diyà Épéso diyà uwang Asiya.

23Egoh di pelà diyà Épéso, tigtu egkebogo sa medoo etaw dahiya danà sa ketulù di sa kagi i Nemula. 24Duen sa etaw tegetuwang pilak, si Dimiteliyu, owoy duen ma sa medoo etaw eggalebek diyà kenagdi, enù ka egpetuwangen di kagda sa diisek dalesan éhè sa palas simbaan sa nemula da, si Altimis. Iya sa egdagangen da, owoy dakel sa untung nekuwa da. 25Agulé, egsetiponen i Dimiteliyu sa medoo etaw eggalebek diyà kenagdi owoy sa medoo liyu etaw tegetuwang. Guwaen di diyà kenagda, "O

medoo duma ku, netiigan yu dakel sa untung egkekuwa ta danà siini egbaelan ta. 26Dodox hinaa yu kén Pabelo i, owoy dinineg yu ma kén sa igtulù di. Iya sa igtulù di endà duen ulan sa inetaw binaelan etaw daa, enù ka beken nemula gaa iya wé. Migpigtuu dé sa medoo etaw diyà kenagdi, sa medoo etaw diyà Épéso owoy diyà sa medoo liyu menuwa diyà uwang Asiya. 27Medaet iya wé, enù ka sumbungen kén sa medoo etaw sa egbaelan ta. Medaet ma enù ka endà adatan da duu kén sa simbaan sa mapulù nemula ta, si Altimis. Kagdi sa egsimbaan sa langun etaw diyà uwang Asiya owoy diyà sa langun menuwa ma. Tigtu medaet amuk endà sumimbà da dahiya.”

28Na, egoh sa medoo etaw migdineg sa inikagi i Dimiteliyu, egbulit da temù owoy egpetaled da eg-ikagi, guwaen da, “Mapulù Altimis i, sa nemula diyà Épéso.” 29Agulé tigtu egkebogo sa langun etaw tegeÉpéso. Egsabaan da Gayu i owoy si Alistalko, sa etaw mig-unut diyà si Pabelo kedu Masidoniya dò, owoy eg-agaken da kagda diyà sa kenà sa medoo etaw nesetipon. 30Ungayà i Pabelo mangay mikagi diyà sa medoo etaw nesetipon, dodox hinawidan sa medoo etaw egpigtuu. 31Duen ma medoo loyuk i Pabelo ulu-ulù diyà

uwang Asiya owoy migpeangay da etaw diyà kenagdi anì endà mangay di diyà sa kenà da nesetipon.

32Tigtu egkebogo sa langun etaw nesetipon, enù ka endà nesetepeng sa kagi da pinetaled da. Owoy sa medoo etaw, endà ma netiigan da duu sa pesuwan da nesetipon. 33Egpetigdegen sa medoo Hudiyu Alihandelo i diyà sa taengan sa medoo etaw nesetipon. Agulé egsiniyas anì egpetemed da, enù ka ungayà di mikagi diyà kenagda. 34Dodox egoh da neketig etaw Hudiyu Alihandelo i, egpetaled da polo uman eg-ikagi taman duwa kaulas, guwaen da, “Mapulù si Altimis, sa nemula diyà Épéso.”


35Agulé, eghawidan sa ulu-ulù diyà Épéso sa medoo etaw nesetipon. Egoh da migpetemed, eg-ikagi diyà kenagda, guwaen di, “O medoo duma ku tegeÉpéso, netiigan sa langun etaw kita sa eg-ipat sa simbaan i Altimis, sa mapulù nemula ta, owoy sa batu mapulù nenabù kedu diyà langit egoh anay. 36Endà duen etaw mekepalaw ini i eg-ikagiyen ku. Huenan di, petemed yu dé. Yoko egkebuneg ga. 37Endà duen salà siedò duwa etaw inuwit yu dahini, enù ka endà duen sa pinenakaw da diyà sa simbaan ta owoy endà ma sinumbung da duu sa nemula ta. 38Upama, amuk duen salà da diyà si Dimiteliyu owoy sa

duma di tegetuwang, tulonen da doo diyà sa uwis amuk meuma sa agdaw keantang da anì seantangay da dahiya. 39Dodox amuk duen sa sebaen ma uyot yu, angati yu daa sa agdaw egoh sa ulu-uluh sumetipon sa medoo etaw, enù ka iya sa uledin ta. 40Mebaluy kita sa bulitan sa gubilenu ta danà sa binaelan ta ini egoh di. Egpeampay ki sa binaelan ta, huanan di endà mekesagbì ki denu ini i.”

41Agulé egoh di mig-ikagi iya wé, pinelikù di dé sa langun etaw nesetipon.

**Ini Sa Egoh I Pabelo Mig-angay  
Diyà Tanà Masidoniya Owoy  
Tanà Geligu**

**20** 1Na, egoh di neubus iya wé bogo diyà Épéso, egsetiponen i Pabelo sa medoo etaw epgigtuu. Egtuluen di kagda anì peelesen di sa kepigtuu da, enù ka buyu dé mipanaw. Agulé eg-ipanaw dé eg-angay dutu uwang Masidoniya dò. 2Egoh di eg-ukit diyà sa medoo menuwa dahiya, egpebagelen di sa pedu sa medoo etaw epgigtuu. Agulé egoh di migtebow dutu tanà Geligu dò, 3eg-ugpà dahiya taman telu gebulan. Agulé, ungayà di umedà sa dakel kumpit mangay diyà uwang Siliya, dodox duen gaa etaw Hidiyu endà epgigtuu egkelukuyan da kagdi



*Sa nemula da si Altiris.  
(Binaelan 19:34)*

eg-imatay. Huanan di, eg-ipanaw daa tanà Pabelo i egpelikù dutu Masidoniya dò. 4Duen etaw eg-unut diyà kenagdi, si Sopatelo anak i Pilo tegeBiliya, owoy si Alistalko owoy si Sigundo anan da tegeTésalonika, owoy si Gayu tegeDilebi, owoy si Tikiko owoy si Telopimo anan da tegeAsiya, owoy si Timotiyu. 5Pinehuna ké kagda egpeedà sa dakel kumpit mangay dutu menuwa Teloas dò, owoy eg-angatan da kami dahiya. 6Tinuluy i Pabelo aken diyà sa menuwa Pilipos, owoy eg-ugpà ké dahiya taman

meubus sa pista etaw Hudiyu egoh da egkaen sa epan endà duen ipelenuk di. Agulé, eg-edà ké sa dakel kumpit. Egoh di lima dé agdaw, neuma ké dé sa medoo duma ké diyà menuwa Teloas, owoy eg-ugpà ké dariya taman sakapadian.

**Ini Sa Egoh I Utiko Neenaw Egoh  
Di Nematay Diyà Teloas**

7Na, egoh sa sigep Sapetu, nesetipon ké langun anì egtepitepiyen ké sa epan iling sa igtulù i Hésus egoh anay. Eg-uman Pabelo i egtulù taman teliwadà sigep, enù ka sa ungayà di miperaw amuk umenaw simag. 8Duen medoo sulù dalem sa dakel bilik diatas kenà ké nesetipon. 9Duen sa melaud, si Utiko, egpennu diyà sa tatawan. Tigtu egkepilut enù ka nelugay sa ketulù i Pabelo. Hê egoh di neketudug, nenabù tanà dò kedu diyà sa ketelu logsud sa dalesan. Agulé egoh da egsapuwat, nematay dé. 10Egpenaug ma Pabelo i, owoy eglikued medapag diyà sa melaud. Agulé linagap di, owoy eg-ikagi diyà sa medoo liyu etaw, guwaen di, "Yoko egkebukul la, enù ka nehagtay doo."

11,12Hê, mig-enaw dé sa melaud, owoy eg-uwiten da diyà sa dalesan di. Tigtu da neanggan langun enù ka nehagtay doo. Agulé egoh i Pabelo miggemow dema diatas,

egtepitepiyen di sa epan owoy egkaenen ké owoy nelugay ké egseolomoy taman umenaw simag. Agulé, eg-ipanaw ké si Pabelo.

**Ini Sa Egoh I Pabelo Mig-angay  
Dutu Menuwa Milito Dò**

13Na, neseselab ké si Pabelo, enù ka eg-ipanaw tanà Pabelo i eg-angay dutu menuwa Asos dò, dodox mig-edà ké sa dakel kumpit mangay dutu anì tuluyen ké kagdi dutu. 14Egoh ké nesetelabuk diyà sa menuwa Asos, eg-edà ma Pabelo i diyà sa dakel kumpit inedaan ké, owoy eg-ipanaw ké langun mangay menuwa Mitilino dò. 15Egoh di umenaw simag, eg-ipanaw ké dema uman owoy egtalà ké diyà sa pungul Kiyos. Agulé umenaw simag dema, eg-ampil ké diyà sa pungul Samos. Hê, diyà sa ketelu di agdaw egtebow ké diyà sa menuwa Milito. 16Endà dé eg-ukit ké diyà sa menuwa Épésø, enù ka ungayà i Pabelo endà melugay ké diyà uwang Asiya, enù ka egkelakawan ké eg-ipanaw anì tumebow ké Hélusalém dò egoh di endà pa meuma sa Pista Pintikostis.

**Ini Sa Igtulù I Pabelo  
Diyà Sa Medoo Kaunutan  
Etaw TegeÉpésø**

17Na, egoh ké migtebow diyà menuwa Milito, igpeangay i Pabelo sa medoo kaunutan

etaw egpigtuu diyà menuwa Épéso. 18Egoh da migtebow, eg-ikagi Pabelo i diyà kenagda, guwaen di, "Netiigan yu doo sa langun binaelan ku diyà keniyu edung sa egoh ku anay migtebow diyà uwang Asiya. 19Megelol a egpangunut diyà si Datù, owoy pinetukéey ku aken. Eggsinegaw a ma danà sa kehidu ku keniyu. Minelikutan a ma danà sa medoo duma ku Hudiyu endà egpigtuu egkelukuyan da aken eg-imatay. 20Netiigan yu ma tigtu a ma doo egtulù keniyu sa langun meketabang keniyu egoh ku migtegudon diyà sa simbaan yu ataw ka diyà sa dalesan yu. 21Tinulon ku sa tuu kagi i Nemula diyà sa langun etaw, iling ka etaw Hudiyu ataw ka beken Hudiyu, anì ekedan da sa salà da anì metuing da diyà si Nemula owoy migtuu da diyà si Hésus Kelistu sa Datù ta.

22"Na, mangay a Hélusalém dò, enù ka iya sa uyot sa Metiengaw Suguy i Nemula diyà kenak. Endà netiigan ku duu sa mebaelan ku dutu. 23Dodoo iya daa sa netiigan ku, sumalà dé sa menuwa inangayan ku, tinulon sa Suguy i Nemula diyà kenak mebilanggu a owoy mepelihay a ma dutu. 24Dodoo maen dé amuk mematay a, enù ka ungayà ku daa ubusen ku mael sa langun igsugù i Datù Hésus

diyà kenak, enù ka pineangay di aken anì tumulù a sa Mepion Tegudon denu sa mepion ketabang ipeuloy i Nemula diyà kenita.

25" Taman ini egoh di, migtukid a eglengen diyà keniyu anì tumulù a keniyu denu sa kedatù i Nemula. Dodoo buyu a dé mipanaw, owoy netiigan ku endà dé hauwen yu duu aken dema. 26Huenan di, egtulonen ku ini i diyà keniyu ini egoh di. Amuk duen pelà sa etaw diyà keniyu endà pa egpigtuu di, endà dé duen sa naken dahiya, 27enù ka tigtu a migtulù diyà keniyu sa langun ungayà i Nemula. 28Huenan di, tulik yu. Ipat yu sa langun etaw egpigtuu, enù ka sa Metiengaw Suguy i Nemula sa miggelal keniyu anì ipaten yu kagda lagà sa keipat kebilibili. Hediya ma, ipat yu sa umpungan i Nemula, enù ka kita dé sa etaw di danà sa Anak di nematay. 29Netiigan ku amuk mipanaw a dé, dumuen etaw tumebow diyà keniyu anì akalan da kiyu. Lagà da sa uled tanà eg-imatay hinagtay, enù ka pedaetan da sa kepigtuu yu diyà si Nemula. 30Dumuen ma duma etaw diyà keniyu tumulù da kani sa kagi endà tuu di anì umunut sa medoo etaw diyà kenagda. 31Huenan di, tulik yu anì endà meakalan yu. Yoko egkelifeng

duu ini i. Takà a egtulù keniyu agdaw owoy sigep taman telu gepalay, owoy egsinegaw a ma danà sa kehidu ku keniyu.

32“Na, isalig ku kiyu diyà si Nemula, enù ka kagdi sa tumulik keniyu danà sa ketabang ipeuloy di sa igtulù ku diyà keniyu, owoy kagdi ma sa egpeeles sa kepigtuu yu, owoy ibegay di ma diyà keniyu sa mepion mekebegay di diyà sa langun etaw di. 33Endà egkesina a sa pilak ataw ka bulawan ataw ka sa ginis yu. 34Netiigan yu takà a daa eggalebek anì duen sa ibeli ku sa ungayà ku owoy sa ungayà sa medoo duma ku. 35Miggalebek a anì metiigan yu mepion amuk megelol ki gumalebek anì meketabang ki ma sa etaw egkepasangan. Netulengan ku sa inikagi i Datù Hésus, guwaen di, ‘Apiya di pa neanggan sa etaw tinabangan, uman pa doo meanggan sa etaw egtabang.’ ”

36Na, egoh i Pabelo neubus eg-ikagi iya wé, egligkued da langun owoy egsimbà Pabelo i. 37Tigtu da egsinegaw, owoy eglagapen da Pabelo i owoy egpengadekan da ma. 38Tigtu egkebukul sa pedu da danà di mig-ikagi endà dé hauwen da duu. Agulé, eg-unut da kenagdi eg-angay diyà sa dakel kumpit edaan ké.

### Ini Sa Egoh I Pabelo Mig-angay Dutu Hélusalém Dò

**21** 1Na, egoh ké mig-ipanaw kedu diyà menuwa Milito, egbertas ké eg-angay diyà sa pungul Kos. Egoh di umenaw simag, egtebow ké diyà sa pungul Lolas. Egoh ké miglegkang dahiya, eglagbas ké diyà sa menuwa Patala. 2Egoh ké migtebow dahiya, hinaa ké sa sebaen dakel kumpit mangay dutu uwang Ponisiya dò. Huenan di, mig-edà ké dema owoy eg-ipanaw ké. 3Hinaa ké sa pungul Sipeli denu bibang ké egoh ké egtalà, owoy eglagbas ké diyà sa uwang Siliya. Egtenà ké diyà menuwa Tilo enù ka duen lulan sa kumpit itenà da dahiya. 4Duen ma etaw egpigtuu hinaa ké dahiya, owoy eg-ugpà ké diyà kenagda taman sakapadian. Igsugkow da diyà si Pabelo sa kagi sa Metiengaw Suguy i Nemula anì endà lumagbas di dutu Hélusalém dò.

5Agulé, egoh di neuma sa agdaw ké mipanaw, eg-unutan da kami langun, maama owoy bayi lapeg sa medoo anak da. Egoh ké migtebow diyà sa mantadan, egligkued ké langun owoy egsimbà ké. 6Agulé egoh ké neseselab, eg-edà ké diyà sa dakel kumpit owoy eglikù da ma dé.

7Egoh ké miglegkang diyà menuwa Tilo, eg-angay ké

dutu menuwa Tolimayi dò. Egtenà ké dahiya, owoy nesegdu ké eglengen diyà sa medoo etaw egpigtuu. 8Egoh di umenaw simag, eg-ipanaw ké mangay dutu menuwa Sisaliya dò. Egoh ké migtenà dahiya, mig-angay ké eg-ugpà diyà sa dalesan i Pilipi. Kagdi sa sebaen etaw diyà sa pitu etaw hinemili da egoh anay anì mulig da sa salu i Hésus diyà Hélusalém, owoy kagdi ma sa tegetegudon sa kagi i Nemula. 9Duen sa epat anak di kenongan egtulon sa kagi i Nemula egtebowtebow. 10Egoh ké nelugaylugay dahiya, migtebow sa tegesugkow i Nemula kedu diyà uwang Hudiya, si Agabu. 11Egoh di migtebow diyà kenami, kinuwa di sa sabitan i Pabelo owoy egpoloten di sa lisén di owoy sa belad di. Agulé eg-ikagi, guwaen di, "Ini sa kagi sa Metiengaw Suguy i Nemula. Hediya ma poloten da sa etaw épê siini sabitan sa medoo Hudiyu endà egpigtuu dutu Hélusalém dò, owoy ibegay da kagdi diyà sa egkegaga etaw beken Hudiyu."

12Na, egoh ké migdineg iya wé inikagi i Agabu, igsasà ké diyà si Pabelo anì endà mangay di Hélusalém dò. Hediya ma sa inikagi sa langun etaw egpigtuu dahiya. 13Dodox egsagbì Pabelo i, guwaen di, "Yoko eg sinegawan aken. Yoko

egpedaet duu sa pedu ku. Maen dé amuk mepolot a diyà Hélusalém owoy amuk meimatayan a ma dutu danà sa kepigtuu ku diyà si Datù Hésus."

14Endà negaga ké duu eghawid kenagdi, huanan di egsabuh ké ma eghawid owoy guwaen ké, "Meketuu sa uyot i Datù."

15Agulé, egoh ké nelugay-lugay dahiya, egtipohen ké sa langun taman eg-uwiten ké owoy lumagbas ké Hélusalém dò. 16Duen ma etaw egpigtuu kedu diyà Sisaliya eg-unut kenami. Eg-uwiten da kami diyà sa dalesan i Nason, sa etaw tegeSipeli nelugay dé egpigtuu. Eg-ugpà ké diyà kenagdi.

#### **Ini Sa Egoh I Pabelo Miglengen Diyà Si Santiyago**

17Na, egoh ké migtebow diyà Hélusalém, tigu sinaluan sa medoo etaw egpigtuu kami dahiya. 18Egoh di umenaw simag, eg-unut ké si Pabelo mangay lumengen diyà si Santiyago. Nesi tipon ma dahiya sa langun kaunutan etaw egpigtuu. 19Egoh i Pabelo migsalù kenagda, egtulonen di sa langun binaelan i Nemula diyà sa medoo etaw beken Hudiyu danà sa ketulù di.

20Egoh da migdineg iya wé, eg-oloen da Nemula i. Agulé eg-ikagi da diyà si Pabelo,

guwaen da, “O Akay, mepion sa binaelan ko, dodox yaka egkelpeng duu duen ma ngibungibuan etaw Hudiyu egpigtuu diyà si Hesus, owoy egtemù da ma epangunut diyà sa uledin igsugkow i Mosis. 21Dodox dinineg da kulang sa igtulù ko diyà sa medoo duma ta etaw Hudiyu eg-ugpà diyà sa menuwa etaw beken Hudiyu, enù ka igtulù ko gaa mebaluy amuk endà epangunut da diyà sa uledin igsugkow i Mosis owoy amuk endà pekelaing da ipat owoy amuk endà mangunut da sa adat ta Hudiyu. 22Na, ngadan sa mepion mebaelan ta amuk metiigan da migtebow ka dé dahini? 23Na, mepion amuk mangunut ka ini i igsugù ké. Duen epat etaw dahini migpasad da diyà si Nemula owoy buyu dé meuma sa atas da. 24Unut ka kenagda mangay diyà sa Dalesan i Nemula owoy ilungi ko sa adat ta denu sa kepelanh ko. Amuk meuma sa pasad da, kuna sa mayad sa langun ungayà da anì pegunting da. Amuk baelan ko iya wé, metiigan sa langun etaw endà tuu di sa dinineg da denu keniko enù ka epangunut ka doo diyà sa uledin igsugkow i Mosis. 25Na, denu sa etaw beken Hudiyu egpigtuu, pineangay ta sa sulat diyà kenagda anì tuluen ta kagda. Guwaen ta, ‘Yoko egkaen duu sa igbegay diyà sa medoo

inetaw penemulawen etaw. Yoko ma egkaen duu sa hinagtay pineleng owoy sa depanug. Yoko ma egbigà ya.’ ”

26Na, egoh di umenaw simag, eg-unut Pabelo i diyà siedò epat etaw eg-angay diyà sa Dalesan i Nemula, owoy eg-ilingan di sa adat Hudiyu denu sa kepelanh da. Agulé, egdalem da diyà sa Dalesan i Nemula anì tulonen da diyà sa tegesimbà dahiya sa agdaw egoh di meuma sa pasad da, enù ka iya sa agdaw da mimatatay hinagtay ibegay diyà si Nemula.

#### Ini Sa Egoh I Pabelo Nesigkem

27Na, egoh di buyu dé meuma sa kepitu di agdaw, duen duma etaw Hudiyu endà epigtuu kedu Asiya dò eghaa si Pabelo dalem sa Dalesan i Nemula. Agulé, eg-umowen da sa medoo liyu etaw anì ebuligan da kagda egsigkem si Pabelo. 28Egpetaled da eg-ikagi, guwaen da, “O medoo duma ké tugod i Islaél, buligi yu kami. Ini sa etaw egtulù diyà sa langun etaw anì mepeumà-umaan ki, kita i etaw Hudiyu, owoy sa uledin igsugkow i Mosis owoy siini Dalesan i Nemula. Uman pa medaet sa binaelan di dahini, enù ka inuwit di sa etaw beken Hudiyu dalem siini mapulù Dalesan i Nemula anì metétê.” 29Na, iya sa inikagi da enù ka hinaa da

Telopimo i, sa etaw beken Hudiyu tegeÉpéso, eg-unut-unut diyà si Pabelo diyà Hélusalém. Huenan di, guwaen da dò inuwit i Pabelo dalem sa Dalesan i Nemula.

30Agulé, egkebogo temù sa langun etaw diyà Hélusalém, owoy medelamet da nesetipon. Sinabaan da Pabelo i, owoy ginodoy da diyà dibaluy sa Dalesan i Nemula. Hê, pinintuan da sa Dalesan i Nemula. 31Ungayà da imatayan da Pabelo i. Dodox duen etaw migtulon diyà sa kapitan sundalu sa egoh da egkebogo temù sa langun etaw Hélusalém. 32Huenan di, medelamet inuwit sa kapitan sundalu sa duma saldin owoy medoo sundalu, owoy egletu da eg-angay diyà sa kenà medoo etaw nesetipon. Egoh da mighaa sa kapitan owoy medoo sundalu, iya da pelà migsabuh egbalbal si Pabelo.

33Agulé, egoh sa kapitan sundalu migtebow diyà si Pabelo, sinigkem di owoy pinolot di ma duwa sangkalì. Agulé eg-igsà diyà sa medoo etaw, guwaen di, “Ngadan di ini i etaw? Ngadan sa medaet binaelan di?” 34Duen etaw egsagbì, dodoo endà nesetepeng sa inikagi da. Huenan di, endà netiigan sa kapitan sundalu sa nebaelan i Pabelo danà sa metaled kagi sa medoo etaw. Agulé igpeuwit di Pabelo i diyà

sa kutà sundalu. 35Egoh da migtebow diyà sa taytay kutà sundalu, egseoyongon sa medoo sundalu kagdi anì mekeukit da, enù ka egbulit temù sa medoo etaw nesetipon. 36Eg-umow sa medoo etaw egsetugdug, guwaen da, “Imatayi yu dé kagdi.”

#### **Ini Sa Egoh I Pabelo Mig-ikagi Diyà Sa Medoo Etaw Hudiyu**

37Na, egoh da buyu dé egdalem diyà sa kutà sundalu, eg-ikagi Pabelo i diyà sa kapitan sundalu, guwaen di, “Duen sa ikagiyen ku diyà keniko amuk mebaluy.”

Negaip sa kapitan, owoy guwaen di, “Neketiig ka doo sa kagi Geligu. 38Enù ka guwaen ku dò kuna sa etaw tegeligiptu migkuntelà diyà sa gubilenu egoh anay, sa mig-uwit epat ngibu etaw mebalaw diyà sa melabel tanà mediyù dalesan.”

39Guwaen i Pabelo egsagbì, “Beken aken iya wé. Etaw Hudiyu a polo, aken i, kedu diyà Talesu sa dakel menuwa diyà uwang Silisiya. Ungayà ku mikagi diyà sa medoo etaw nesetipon.”

40Mebaluy iya wé diyà sa kapitan, huenan di egtigdeg Pabelo i diyà sa taytay owoy ebgbegengen di sa belad di anì endà egséléken da. Egoh da migpetemed, eg-ikagi Pabelo i sa kagi Hibelu, enù ka iya sa tigtu kagi etaw Hudiyu.

**22** <sup>1</sup>Guwaen di, “O medoo momò ku owoy duma ku, dinegdineg yu sa ikagiyen ku diyà keniyu.”

<sup>2</sup>Egoh da migdineg sa kagi di Hibelu, egpetemed da temù. Agulé, eg-uman Pabelo i eg-ikagi, guwaen di, <sup>3</sup>“Aken sa duma yu etaw Hudiyu. Miglesut a dutu Talesu dò, sa menuwa diyà uwang Silisiya, dodox miglenuk a dé diyà Héusalém. Si Gamaliél sa mistelu migtulù kenak sa langun uledin pinangunutan sa tupù ta. Meudes a egpangunut diyà si Nemula, lagà mendaan sa niyu keudes ini egoh di. <sup>4</sup>Iya maen di ya migpelihay a sa medoo etaw eppigtuu diyà si Hésus owoy igpeimatay ku kagda. Duen ma etaw sinikem ku owoy binilanggu ku, iling ka maama ataw ka bayi. <sup>5</sup>Netiigan sa Tigtu Ulu-ulù Tegesimbà owoy sa langun kaunutan ta tuu iya wé inikagi ku, enù ka kagda sa migbegay kenak sa sulat inuwit ku diyà sa duma ta Hudiyu dutu Damasko dò. Huenan di, mig-angay a dutu anì sigkemen ku sa medoo etaw eppigtuu diyà si Hésus, enù ka ungayà ku uwiten ku kagda dahini diyà Héusalém anì mepiptamayan da.

<sup>6</sup>“Egoh di buyu dé nekebugsang, mig-ipanaw a medapag diyà sa menuwa Damasko. Hê, petow a dé nelegdawan sa dakel senang

kedu langit dò. <sup>7</sup>Hê, nekelagkeb a diyà tanà, owoy dinineg ku sa eg-ikagi, guwaen di, ‘O Saulo, maen di ya egpelihayen ko aken?’ <sup>8</sup>Agulé mig-ikagi a, guwaen ku, ‘O Datù, ngadan ko ya etaw?’ Guwaen di egsagbi, ‘Aken si Hésus tegeNasalét sa egpelihayen ko.’ <sup>9</sup>Apiya di pa hinaa sa duma ku sa senang di, endà doo nesabutan da duu sa inikagi di diyà kenak. <sup>10</sup>Agulé mig-igsà a, guwaen ku, ‘O Datù, ngadan sa baelan ku?’ Guwaen i Datù diyà kenak, ‘Tigdeg ka dé, lagbas ka dutu Damasko dò kenà ko metulonon sa ipebael i Nemula diyà keniko.’ <sup>11</sup>Endà eg-ilag a danà ku nelegdawan sa senang kedu langit dò, dodox inagak a sa duma ku eg-angay Damasko dò.

<sup>12</sup>“Duen sa etaw diyà Damasko eppigtuu diyà si Nemula, si Ananiyas. Tigtu egpangunut diyà sa uledin igsugkow i Mosis, owoy netuuwan ma sa langun etaw Hudiyu tegeDamasko diyà kenagdi. <sup>13</sup>Mig-angay egdapag diyà kenak, owoy guwaen di, ‘O Akay Saulo, kumeilag ka dema.’ Hê, petow a dé mig-ilag owoy hinaa ku ma dé kagdi. <sup>14</sup>Agulé mig-ikagi diyà kenak, guwaen di, ‘Si Nemula sa inunutan sa tupù ta, kagdi sa mighemilì keniko anì metiigan ko sa uyot di owoy anì hauwen ko sa metiengaw etaw sinugù di owoy anì dinegen ko

sa kagi di. Hê, neketuu dé iya wé. 15Hinemilì di kuna anì tulonen ko diyà sa langun etaw sa hinaa ko owoy sa dinineg ko. 16Na, yaka egpeanggàanggà ya. Tigdeg ka dé owoy pebautis ka owoy simbà ka diyà si Nemula anìmekayas sa salà ko,’ guwaen i Ananiyas diyà kenak.

17“Agulé, miglikù a diyà Hélusalém. Egoh ku pelà egsimbà diyà sa Dalesan i Nemula, duen sa igpehaa i Nemula diyà kenak. 18Hinaa ku si Datù mig-ikagi diyà kenak, guwaen di, ‘Téél ka dé. Ipanaw ka dé kedu diyà Hélusalém, enù ka endà eppigtuu sa medoo etaw dahini sa egtulonen ko denu kenak.’ 19Dodoo migsagbì a, guwaen ku, ‘O Datù, netiigan da doo tinukid ku eg-angay sa medoo simbaan Hudiyu anì sigkemen ku owoy tapesen ku sa langun etaw eppigtuu diyà keniko. 20Netiigan da ma aken sa miglenged sa kineimatay da si Estiban, sa tegetegudon denu keniko, owoy neiyap a ma sa kebael da kenagdi enù ka mibabantay a sa kawal linengà da.’ 21Dodoo mig-ikagi Datù i diyà kenak, guwaen di, ‘Ipanaw ka dé, enù ka egpeangayen ku kuna dutu mediyù dò anì tumegudon ka ma diyà sa medoo etaw beken Hudiyu.’”

22Na, egdinegen sa medoo etaw nesetipon sa inikagi i Pabelo taman sa egoh di

mig-ikagi pineangay i Nemula kagdi diyà sa medoo etaw beken Hudiyu. Agulé eg-umow da, guwaen da, “Imatayi yu dé! Mepion amuk mematay iya wé etaw.”

23Eg-umow da, owoy igpaypay da sa ginis da, owoy igsawel da sa tanà diyà awang danà da tigtu egbulit. 24Egoh sa kapitan sundalu mighaa tigtu egbulit da, igpeuwit di Pabelo i dalem sa kutà sundalu anì ipetapes di anì tumulon sa tuu kagi, enù ka ungayà di metiigan sa pesuwan i Pabelo egbulitan sa medoo etaw, enù ka endà netiigan di duu sa kagi Hibelu. 25Dodoo egoh da migpolot si Pabelo anì tapesen da, eg-ikagi Pabelo i diyà sa sundalu, guwaen di, “Endà mebaluy di metapes sa etaw Loma amuk endà pa inigsaan di uwis denu sa salà di.”

26Egoh sa sundalu migdineg sa inikagi i Pabelo, eg-angay diyà sa kapitan sundalu owoy guwaen di, “Yaka egpetapes duu, enù ka etaw Loma kagdi ya.”

27Huenan di, eg-angay sa kapitan sundalu diyà si Pabelo owoy eg-igsà, guwaen di, “Tuloni ko aken amuk tuu ka etaw Loma, ataw ka beken?”

Eggagbì Pabelo i, guwaen di, “Hoò, etaw Loma a.”

28Agulé, guwaen sa kapitan sundalu, “Medoo sa pilak

igbayad ku anì mebaluy a etaw Loma.”

Eg-ikagi Pabelo i, guwaen di, “Dodox aken, tigtu a etaw Loma, enù ka etaw Loma sa emà ku.”

**29**Agulé, sinalidan sa medoo etaw buyu tumapes Pabelo i. Apiya sa kapitan sundalu, nelimedangan ma enù ka netiigan di etaw Loma iya wé igpepolot di sangkalì.

**Ini Sa Ego Da Mig-uwit  
Si Pabelo Diyà Sa Medoo  
Kaunutan Hudiyu**

**30**Na, ungayà sa kapitan sundalu metiigan di sa pesuwan di egbulitan sa medoo Hudiyu Pabelo i. Huenan di, ego di umenaw simag, egsetiponen di sa medoo ulu-ulu tegesimbà owoy sa medoo kaunutan Hudiyu. Agulé, linengaan di Pabelo i owoy inuwit di diyà sa kenà da nesetipon, owoy egpetigdegen di diyà sa taengan da.

**23** <sup>1</sup>Agulé, eg-inengtengen i Pabelo sa medoo ulu-ulu nesetipon owoy eg-ikagi, guwaen di, “O medoo duma ku, sumalà dé sa binaelan ku, netiigan ku tigtu metiengaw doo sa pedu ku diyà sa kehaa i Nemula taman ini ego di.”

**2**Agulé si Ananiyas sa Tigtu Ulu-ulu Tegesembà, igpetagpì di sa ebà i Pabelo diyà sa etaw medapag diyà kenagdi. **3**Agulé, eg-ikagi Pabelo i diyà si Ananiyas, guwaen di, “Tagpien i Nemula ma kuna, enù ka guwaen ko dò metiengaw ka diyà sa kehaa i Nemula. Guwaen ko dò neketipay a diyà sa uledin igsugkow i Mosis, dodox kuna sa migtipay diyà iya wé uledin, enù ka igpetagpì ko aken.”

**4**Agulé, duen liyu etaw medapag diyà kenagdi eg-ikagi, guwaen da, “Yaka egsumbung duu sa Tigtu Ulu-ulu Tegesembà sa hinemili i Nemula.”

**5**Guwaen i Pabelo, “O medoo duma ku, endà netiigan ku duu kagdi sa Tigtu Ulu-ulu Tegesembà. Enù ka duen sa kagi i Nemula igpesulat, guwaen di, ‘Yoko eg-ikagi medaet ta diyà sa ulu-ulu yu.’ ”<sup>x</sup>

**6**Netiigan i Pabelo endà nesetepeng sa penemdem sa langun ulu-ulu dahiya, enù ka duen etaw Sadusiyu owoy duen etaw Palasiyu. Huenan di, egpetaled eg-ikagi, guwaen di, “O medoo duma ku ulu-ulu, aken ma sa etaw Palasiyu, owoy etaw Palasiyu ma sa naken emà. Eg-igsaan a ini ego di enù ka eg-angat-angatan ku sa keenaw i Nemula sa etaw nematay.”

<sup>x</sup> 23:5 Basa ko Éksodo 22:28.

7Egoh di mig-ikagi iya wé, egesigbolowoy sa medoo Palasiyu owoy Sadusiyu. Huenan di, nesebaed sa medoo etaw dahiya, 8enù ka egtulù sa etaw Sadusiyu endà enawen i Nemula duu gaa sa etaw nematay, owoy endà ma gaa duen sa egsugusguen i Nemula owoy endà ma gaa duen sa suguy etaw. Dodox sa medoo Palasiyu, egpigtuuwen da polo langun iya wé. 9Huenan di, metaled sa kagi da egesigbolowoy. Agulé duen Palasiyu tegetulù sa uledin igsugkow i Mosis, egtigdeg da anì metumàmà sa kagi da. Guwaen da, “Eppenemdemén ké endà duen salà ini i etaw. Endà medaet di amuk duen egsugusguen i Nemula ataw ka suguy etaw mig-ikagi diyà kagdi.”

10Agulé, tigtu egesigbolowoy da temù, owoy nelimedangan sa kapitan sundalu enù ka buyu dé egsekodoten da Pabelo i. Huenan di, sinugù di sa sundalu di anì angayan da Pabelo i anì uwiten da dalem sa kutà sundalu.

11Egoh di teliwadà sigep, egpehaa Datù i diyà si Pabelo owoy eg-ikagi, guwaen di, “Yaka egkebukul la, enù ka tumulon ka ma doo denu kenak dutu Loma dò lagà sa ketulon ko dahini diyà Hélusalém.”

**Ini Sa Egoh Da Mig-olom  
Sa Ukit Da Keimatay  
Si Pabelo**

12,13Na, egoh di umenaw simag, duen labi epat pulù etaw Hudiyu egseolomoy da sa ukit da mimatay si Pabelo. Egpengibet da endà kumaen da owoy endà uminem da taman endà meimatayan da duu Pabelo i. 14Agulé, eg-angay da eg-ikagi diyà sa medoo ulu-ulu tegesimbà owoy kaunutan Hudiyu, guwaen da, “Migpengibet ké endà kumaen ké taman endà meimatayan ké duu Pabelo i. 15Na kiyu lapeg sa medoo duma yu ulu-ulu, sasai yu sa kapitan sundalu anì uwiten da Pabelo i dahini diyà keniyu, enù ka ubòubò igsaan yu uman. Dodox pelaeban ké anì imatayan ké egoh di endà pa mekeuma diyà keniyu.”

16Dodox nekedineg sa anak tebay i Pabelo sa ungayà da pelaeban da Pabelo i. Huenan di, mig-angay diyà sa kutà sundalu anì tulonon di Pabelo i. 17Agulé, inumow i Pabelo sa sundalu, owoy guwaen di, “Uwit ko siini melaud diyà sa kapitan enù ka duen sa tulonen di diyà kenagdi.”

18Agulé, inuwit di sa melaud diyà sa kapitan, owoy guwaen di, “Migsasà iya wé etaw nebilanggu pinengadanan si Pabelo anì uwiten ku siini melaud diyà keniko, enù ka

duen gaa sa tulonen di diyà keniko.”

**19**Agulé, eg-agaken sa kapitan sundalu sa melaud eg-angay da eglebù, owoy eg-igsaan di, guwaen di, “Ngadan sa tulonen ko diyà kenak?”

**20**Egsagbì sa melaud, guwaen di, “Iya sa penemdem sa medoo Hudiyu ipeuwit da keniko si Momò simag mangay diyà kenà sa medoo ulu-ulù nesetipon anì manan da gaa migsà kenagdi. **21**Dodoo yaka egpigtuu ya, enù ka duen labi epat pulù etaw melaeb kenagdi diyà dalan. Migpengibet da endà kumaen da gaa owoy endà ma uminem da taman endà meimatayan da duu Momò ya. Eg-angat-angatan da dumineg sa kagi ko.”

**22**Agulé, eg-ikagi sa kapitan sundalu, guwaen di, “Yaka egtulon duu diyà sa liyu etaw sa egoh ko migtulon diyà kenaken.” Agulé, pinelikù di dé sa melaud.

#### **Ini Sa Ego Da Mig-uwit Si Pabelo Diyà Sa Gubilenu**

**23**Agulé, igpeangay sa kapitan sundalu sa duwa saldin, owoy eg-ikagi diyà kenagda, guwaen di, “Setipon yu sa duwa gatus sundalu miapanaw tanà owoy sa pitu pulù sundalu kumudà owoy sa duwa gatus sundalu kumemkem sigpù.

Ipanaw yu igkani sigep alas siyow mangay Sisaliya dò.

**24**Pekudà yu Pabelo i, owoy tuliki yu anì endà mekesugsug di taman endà tumebow di diyà si Gubilenu Pélis.”

**25**Duen ma sa sulat igpeuwit sa kapitan, guwaen di,

**26**“Si Keladiyo Lisiyas a egsulat ini i diyà keniko, si Pélis, sa tigtu mapulù gubilenu ké. Egtulonen ku sa mepion pedu ku diyà keniko. **27**Ini sa etaw igpeuwit ku diyà keniko, enù ka sinigkem sa medoo Hudiyu kagdi owoy imatayan da hedem. Dodoo mig-angay ké sa medoo sundalu ku anì mealukan ké kagdi enù ka netiigan ku kagdi sa etaw Loma. **28**Ungayà ku metiigan ku sa pesuwan di egbulitan etaw Hudiyu, huanan di igpeigsà ku kagdi diyà sa medoo ulu-ulù da. **29**Agulé, netiigan ku endà duen salà di sa pesuwan di meimatayan ataw ka bilangguwen. Dodoo egbulitan da daa danà di gaa miгtipay sa hagda uledin. **30**Igpeuwit ku kagdi diyà keniko, enù ka duen gaa etaw Hudiyu pelaeban da anì meimatayan da. Peangayen ku ma kani sa etaw egbulit kenagdi anì tulonen da diyà keniko sa itipu da kenagdi. Na, taman iya daa sa sulat ku.”

**31**Agulé, epgangunutan sa medoo sundalu sa igsugù sa kapitan, owoy eg-uwiten da Pabelo i egoh sa sigep taman sa

menuwa Antipatlis. 32Egoh di umenaw simag, eglíkù sa medoo sundalu eg-ipanaw tanà diyà sa kutà da. Dodoo eglagbas Pabelo i eg-uwiten sa medoo sundalu migkudà. 33Agulé, egoh da migtebow diyà menuwa Sisaliya, igbegay da sa sulat diyà sa gubilenu owoy isalig da ma Pabelo i diyà kenagdi. 34Egoh sa gubilenu migbasa sa sulat, eg-igsaen di sa menuwa i Pabelo. Agulé egoh di neketiig tegeSilisiya Pabelo i, 35eg-ikagi diyà kenagdi, guwaen di, “Igsaan ku kuna amuk tumebow sa medoo egtipu keniko.” Agulé, igpebantay di sundalu Pabelo i diyà sa dakel dalesan binaelan i Hélod egoh anay.

**Ini Sa Egoh I Pabelo Diyà Sa Taengan I Gubilenu Pélis**

**24** 1Na, egoh di neuma sa lima agdaw, eg-angay Sisaliya dò Ananiyas i sa Tigtu Ulu-ulú Tegesimbà, owoy mig-unut sa medoo kaunutan Hudiyu owoy sa abugadu, si Tiletulo. Mig-angay da egtulon diyà si Gubilenu Pélis sa itipu da si Pabelo. 2Egoh da egpeangay si Pabelo, egtigdeg Tiletulo i anì tipuwen di Pabelo i. Guwaen di, “O Gubilenu Pélis, tigtu eg-looen ké kuna. Melanih sa keugpà ta dahini enù ka kuna sa datù ké. Takaan ko eg-upion sa medaet diyà siini tanà ta danà sa penemdem ko milantek. 3Huenan di, uman agdaw

egkeanggan ké langun, owoy mepion ma sa pedu ké diyà keniko. 4Endà metaes sa kagi ku diyà keniko. Huenan di, hiduwi ko aken owoy dinegdineg ko, hih, sa tukéey ikagiyen ku diyà keniko. 5Netiigan ké tigtu medaet ini i etaw, enù ka egbogowen di sa langun etaw Hudiyu diyà siini sinukub langit. Kagdi ma sa ulu-ulú sa medoo etaw egpigtuu diyà sa etaw tegeNasalét. 6Ungayà di tééen di ma sa Dalesan i Nemula dutu Hélusalém dò. Huenan di, sinigkem ké kagdi. [Antangen ké hedem danà di migtipay sa uledin ké. 7Dodox migtebow Kapitan Lisiyas i diyà kenami, owoy tinegel di polo egkuwa diyà kenami. 8Agulé pineangay di kami diyà keniko anì tulonen ké sa itipu ké kenagdi.] Amuk igsaan ko, metiigan ko doo tigtu tuu sa langun itipu ké kenagdi.”

9Neseunut sa medoo duma di etaw Hudiyu egtipu, guwaen da, “Anan tuu sa inikagi di.”

**Ini Sa Egoh I Pabelo Migsagbì Diyà Si Gubilenu Pélis**

10Agulé, eggsiniyas Gubilenu Pélis i diyà si Pabelo anì mikagi. Agulé guwaen i Pabelo, “Netiigan ku nelugay ka dé uwis diyà siini uwang tanà ta. Huenan di, meanggan a sumagbì diyà keniko denu sa ketipu da kenak. 11Egoh di sepulù owoy duwa dé agdaw

sa egoh ku mig-angay egsimbà diyà sa menuwa Hélusalém. Amuk migsà ka diyà sa liyu etaw, metulon da tuu iya wé. 12Egoh sa medoo Hudiyu mighaa kenak, endà egsigbolow a etaw diyà sa Dalesan i Nemula, owoy endà ma egbogo a sa etaw, iling ka diyà sa medoo simbaan ké ataw ka diyà sa medoo liyu kenà diyà Hélusalém. 13Endà ma duen sa ipehaa da diyà keniko sa kenà ko meketiig tuu sa itipu da kenak. 14Dodox tuu ini i egtulonen ku diyà keniko. Egsimbà a diyà si Nemula inunutan sa medoo tupù ké, owoy epigittuu a ma diyà sa tegudon denu si Hésus sa guwaen da dò butbut. Dodox tigtu a ma egpangunut diyà sa langun uledin igsugkow i Mosis owoy sa igsulat sa medoo liyu tegesugkow i Nemula. 15Nesetepeng sa eg-angat-angatan ku diyà sa eg-angat-angatan siini medoo etaw egtipu kenak, enù ka eg-angat-angatan ku ma sa keenaw i Nemula sa langun etaw nematay, iling ka mepion etaw ataw ka medaet.

16Huenan di, eg-udes a egbael mepion, enù ka ungayà ku endà duen salà ku diyà si Nemula ataw ka diyà sa liyu etaw.

17“Apiya di pa nelugay a endà mig-angay Hélusalém dò, migpelikù a doo dutu, enù ka

mig-uwit a pilak diyà sa medoo duma ku etaw Hudiyu egkepasangan owoy mig-imatay a ma hinagtay ibegay diyà si Nemula. 18Diyà a sa Dalesan i Nemula, enù ka inilingan ku sa adat ké denu sa kepelanih etaw. Endà duen etaw sinetipon ku, owoy endà ma egbogowen ku duu sa medoo liyu etaw dahiya. Dodox duen etaw Hudiyu kedu Asiya dò mighaa kenak, 19owoy binulitan da aken. Mepion hedem amuk dahini da anì tulonen da sa itipu da kenak amuk duen gaa sa salà ku. 20Igsà ko diyà siini medoo etaw ngadan sa salà ku dinineg sa medoo ulu-uluh diyà sa Dalesan i Nemula egoh da mig-igsà kenak egoh iya. 21Endà duen salà ku. Dodox ini daa sa inikagi ku, egoh ku inigsaan da dutu, guwaen ku, ‘Igsaan a ini egoh di enù ka epigittuu a enawen i Nemula sa etaw nematay.’ ”

22Na, migsabuh Gubilenu Pélis i sa keantang di, enù ka tapay dé netiigan di sa igtulù sa etaw epigittuu diyà si Hésus. Guwaen di, “Ubusen ta pa sa keantang amuk tumebow si Kapitan Lisiyas.” 23Agulé, migsugù Pélis i sundalu anì bantayan da Pabelo i, dodoo endà ma pelihayen da duu owoy mebaluy ma lengenan sa medoo loyuk di anì tabangan da.

**Ini Sa Ego I Pabelo Mig-ikagi  
Diyà Si Pélis Owoy Si Delusila**

24Ego di nelugaylugay, migtebow Gubilenu Pélis i owoy sa sawa di etaw Hudiyu, si Delusila. Igpeangay di Pabelo i anì dinegen da sa ketulù di denu sa kepigtuu etaw diyà si Hesus Kelistu. 25Dodox egtulù ma Pabelo i denu sa mebaelan etaw metudà owoy sa endà mekeunut di diyà sa uyot pedu di medaet owoy dumuen ma sa agdaw ego i Nemula migtamay etaw. Ego i Pabelo migtulù iya wé, tigtu nebul Pélis i, owoy eg-ikagi, guwaen di, “Naal dé sa ketulù ko. Amuk sebaen agdaw pa, ipeangay ku dema kuna.” 26Na, takà igpeangay i Pélis Pabelo i anì seolomoy da, enù ka guwaen di dò begayan i Pabelo kagdi pilak anì melengaan.

27Na, ego di neuma dé sa duwa gepalay, si Polsiyu Pistu sa migpesambì si Gubilenu Pélis. Dodox endà eglengaan i Pélis duu Pabelo i diyà sa bilangguwan, enù ka ungayà di metuuwan sa medoo Hudiyu diyà kenagdi.

**Ini Sa Ego I Pabelo  
Migpeantang Diyà Sa Sulutan**

**25** 1Na, ego i Gubilenu Pistu migtebow diyà uwang Hudiyu, eg-ugpà diyà menuwa Sisaliya taman telu agdaw. Agulé eg-angay

Hélusalém dò. 2Ego di migtebow dutu, egtulonen sa medoo ulu-uluh tegesimbà owoy kaunutan Hudiyu sa itipu da si Pabelo. 3Igsasà da diyà si Pistu anì ipeuwit di Pabelo i diyà Hélusalém, enù ka ungayà da pelaeban da diyà dalan anì imatayan da. 4Dodox eggsagbì Pistu i, guwaen di, “Nebilanggu pelà Pabelo i dutu Sisaliya dò, dodox endà melugay a pelikù dutu. 5Mepion amuk peunuten yu sa medoo ulu-uluh yu diyà kenak mangay Sisaliya dò, anì tulonen yu dutu sa itipu yu kenagdi amuk duen sa salà di.”

6Labi sakapadian eg-ugpà Pistu i diyà Hélusalém. Agulé miglikù dutu Sisaliya dò. Na, umenaw simag, eg-angay diyà sa atung kenà di eg-antang, owoy igpeangay di Pabelo i. 7Ego i Pabelo migtebow, eggselibetan sa medoo etaw Hudiyu endà egpigtuu kedu diyà Hélusalém, owoy medoo sa itipu da kenagdi, dodox endà duen sa igpehaa da amuk tuu sa binaelan di medaet. 8Dodox eggsagbì Pabelo i, guwaen di, “Endà duen salà ku, enù ka endà migtipay a sa uledin ké, kami i etaw Hudiyu, owoy endà ma migtéte a sa Dalesan i Nemula, owoy endà ma migsumbung a sa sulutan ta dutu Loma dò.”

9Dodox ungayà i Gubilenu Pistu metuuwan sa medoo Hudiyu diyà kenagdi. Huenan

di, eg-igsaan di Pabelo i, guwaen di, "Meiyap ka pa mangay Hélusalém dò anì antangen ku kuna dutu?"

**10**Egsagbì Pabelo i, guwaen di, "Meked a iya wé. Dahini a daa diyà sa taengan ko. Kuna sa uwis sinugù sa sultan ta, huenan di peantang a dé dahini diyà keniko. Netiigan ko dé endà duen salà binaelan ku diyà sa medoo duma ku etaw Hudiyu. **11**Upama amuk duen salà ku, endà meekedan ku duu sa kepigtamay ko kenak ataw ka sa keimatay ko kenak. Dodo amuk endà tuu di sa itipu da kenak, endà doo mekeangay a diyà kenagda. Huenan di, egpegeni a si Sulutan daa sa umantang kenak."

**12**Na, egoh da neseolom dé si Pistu owoy sa medoo duma di tegeantang, eg-ikagi diyà si Pabelo, guwaen di, "Danà ko migpegeni si Sulutan daa sa umantang keniko, huenan di peangayen ku kuna diyà kenagdi."

#### **Ini Sa Egoh I Pistu Migtulon Diyà Si Agelipa Denu Si Pabelo**

**13**Na, egoh di nelugaylugay dé, migtebow Datù Agelipa i owoy sa sawa di, si Bilnis. Eglengen da diyà si Gubilenu Pistu diyà menuwa Sisaliya. **14**Egoh da nelugaylugay eg-ugpà dahiya, egtulon Pistu i diyà si Agelipa denu si Pabelo.

Guwaen di, "Duen sa etaw dahini binilanggu i Pélis egoh anay, dodox endà linengaan di duu. **15**Egoh ku mig-angay Hélusalém dò, tinulon sa medoo ulu-ulu tegesimbà owoy kaunutan Hudiyu sa medoo igtipu da kenagdi. Igsasà da diyà kenak anì pigtamayan ku. **16**Dodox tinulonon ku kagda beken iya sa adat etaw Loma amuk mepigtamayan sa etaw egoh da endà pa mesetaeng sa medoo igtipu kenagdi anì mesagbian di sa igtipu da. **17**Agulé egoh sa medoo Hudiyu migtebow dahini, endà migpeanggànga a, dodox egoh di umenaw simag mig-angay a diyà sa atung kenà ku eg-antang owoy igpeangay ku kagdi i anì antangen ku kagda. **18**Egoh sa medoo migtipu kenagdi mig-ikagi, guwaen ku dò tigtu medaet sa salà iya wé etaw, dodox endà duen di polo. **19**Egkesesibolow da daa denu sa hagda adat owoy denu sa etaw, si Hésus, nematay gaa, dodox guwaen i Pabelo mig-enaw doo egoh di nematay. **20**Danà ku daa endà neketig sa egbaelan ku denu iya wé, inigsaan ku kagdi amuk meiyap mangay Hélusalém dò anì antangen ku dutu. **21**Dodox mig-eked iya wé, enù ka ungayà di si Sulutan polo sa umantang kenagdi. Huenan di, igpebantay ku taman egoh ku peangay kenagdi diyà si Sulutan."

22Agulé eg-ikagi Agelipa i diyà si Pistu, guwaen di, “Meiyap a ma doo dumineg sa hagdi kagi.”

Agulé guwaen i Pistu, “Simag dumineg ka doo diyà kenagdi.”

23Na, egoh di umenaw simag, metolol sa ginis i Agelipa owoy si Bilnis egoh da eg-angay diyà sa atung kenà da eg-antang. Mig-unut ma sa medoo kapitan sundalu owoy sa medoo mapulù etaw tegeSisaliya. Agulé, igpeangay i Pistu Pabelo i. 24Agulé mikagi Gubilenu Pistu i, guwaen di, “O Akay Agelipa owoy langun yu nesetipon dahini, kaini dé sa etaw tinipu sa langun etaw Hudiyu, iling ka diyà Sisaliya ataw ka diyà Hélusalém. Takà da egpetaled eg-ikagi diyà kenak anì ipeimatay ku. 25Dodox endà egketiigan ku duu sa salà di sa pesuwan di ipeimatay ku. Dodox egoh di migsasà kenak si Sulutan polo sa umantang kenagdi, huenan di migpenemdem a peangayen ku diyà si Sulutan. 26Dodox endà pa duen sa netiigan ku isulat diyà si Sulutan denu sa hagdi salà. Huenan di, igpeangay ku kagdi diyà sa taengan yu taman diyà keniko, Datù Agelipa, anì dumuen sa mekesulat ku amuk meubus sa keigsà ta kenagdi. 27Enù ka sa penemdem ku endà mepion di

amuk peangayen ku diyà si Sulutan taman endà duen sa metiigan ku salà di.”

**Ini Sa Egoh I Pabelo Mig-ikagi  
Diyà Si Agelipa**

**26** 1Na, eg-ikagi Agelipa i diyà si Pabelo, guwaen di, “Mebaluy dé amuk mikagi ka.”

Agulé binegeng i Pabelo sa belad di owoy eg-ikagi, guwaen di, 2“O Datù Agelipa, neanggan a temù enù ka kuna sa dumineg sa kagi ku ini egoh di, anì metiigan ko endà tuu di sa itipu sa medoo Hudiyu kenak.

3Neanggan a enù ka tigtu ka egpeketiig denu sa langun adat ta, kita i etaw Hudiyu, owoy sa medoo egsigbolowen ta. Huenan di, egpegeni a sa ketigkel ko egdineg sa ikagiyen ku diyà keniko.

4“Neketiig doo sa langun etaw Hudiyu sa adat ku edung sa egoh ku batàbatà pelà diyà sa tapay menuwa ku taman diyà Hélusalém. 5Amuk meigsaan ko kagda, metulon da doo tuu ini i eg-ikagiyen ku, enù ka netiigan da tapay a dé egtemù egpangunut diyà sa langun adat Hudiyu, enù ka etaw Palasiyu a ma. 6Na, egtigdeg a dé diyà sa taengan yu ini egoh di danà sa ketipu da kenak, enù ka eg-angat-angatan ku sa ketuu sa igaipasad i Nemula diyà sa tupù ta denu sa keenaw etaw nematay. 7Iya ma sa

eg-angat-angatan sa langun sepulù owoy duwa geumpung etaw Hudiyu, owoy sa pesuwan di takà ki egsimbà diyà si Nemula agdaw owoy sigep. Na, o Datù, tinipu a duma ku etaw Hudiyu danà ku egpigtuu sa keenaw i Nemula sa etaw nematay. 8Kiyu i Hudiyu, maen di ya endà meiyap yu egpigtuu sa keenaw i Nemula sa etaw nematay?

9“Apiya aken ma egoh anay, guwaen ku dò mepion sa kepelihay ku sa etaw egpigtuu diyà si Hésus tegeNasalét. 10Iya sa binaelan ku egoh anay dutu Hélusalém dò, enù ka binilanggu ku sa medoo etaw egpigtuu diyà si Hésus enù ka sinugù a sa medoo ulu-ulu tegesimbà. Egoh ké mig-antang kenagda, ungayà ku ma meimatayan da. 11Medoo gulê mig-angay a diyà sa medoo simbaan Hudiyu owoy pinelihay ku sa medoo etaw egpigtuu diyà si Hésus, enù ka ungayà ku sumabuh da migtuu hedem. Tigu egbulitan ku kagda, owoy linohot ku ma kagda egpelihay taman mediyyù dò.

12“Huenan di, mig-angay a ma dutu Damasko dò, enù ka inuwit ku sa sulat sa medoo ulu-ulu tegesimbà anì sigkemen ku sa langun etaw egpigtuu diyà si Hésus dahiya. 13Na, o Datù, egoh sa nekebug sang diyà ké dalan, hinaa ku sa egsenang kedu langit dò, owoy uman pa

dakel sa legdaw di diyà sa agdaw. Nelegdawan ma dé sa medoo duma ku eg-ipanaw. 14Hê, nekelagkeb ké langun diyà tanà, owoy duen sa dinineg ku mig-ikagi diyà kenak diyà sa kagi Hibelu, guwaen di, ‘O Saulo, maen di ya egpelihayen ko aken? Kuna polo sa mesakitan danà sa egbaelan ko.’ 15Agulé mig-igsà a, guwaen ku, ‘O Datù, ngadan ko ya etaw?’ Agulé guwaen di migsagbì, ‘Aken si Hésus sa egpelihayen ko. 16Tigdeg ka dé. Migpehaa a diyà keniko enù ka hinemilì ku kuna anì gumalebek ka diyà kenak, anì tulonen ko diyà sa medoo etaw sa hinaa ko ini egoh di owoy sa ipehaa ku diyà keniko kani. 17Tulikan ku kuna anì endà meimatayan ka etaw Hudiyu owoy etaw beken Hudiyu. Peangayen ku kuna diyà kenagda, 18anì mettiigan da sa tuu tegudon, anì iniyugan da sa delem anì misalu da diyà legdaw, enù kamekelaun da kedu diyà sa egkegaga i Satanas anì mangay da dumatù si Nemula. Amuk migtuu da diyà kenak, mekepeuloy sa salà da, owoy mekeunut da diyà sa etaw hinemilì i Nemula.’

19“Na, o Datù Agelipa, endà eg-ekedan ku duu egpangunut diyà sa igpetiig i Nemula diyà kenak. 20Iya sa anay tinulonon ku sa etaw tegeDamasko, agulé sa etaw Hélusalém, owoy migtukid a diyà sa medoo

menuwa diyà uwang Hudiya owoy mig-angay a ma diyà sa medoo etaw beken Hidiyu ma. Migtulù a kenagda anì ekedan da sa salà da anì tuingen da sa pedu da diyà si Nemula owoy baelan da sa mepion anì tandaan da sa keeked da sa salà da. 21Danà ku migtulù iya wé, sinigkem a etaw Hidiyu diyà sa Dalesan i Nemula dutu Hélusalam dò anì imatayan da aken. 22Dodox ebuligan i Nemula aken taman ini egoh di. Huenan di, kaini a dé eg-ikagi sa tuu kagi diyà sa langun etaw, iling ka sa mapulù etaw ataw ka lagdà etaw. Iya sa itulù ku kenagda neketuu dé sa kagi sa medoo tegesugkow i Nemula owoy si Mosis egoh anay, 23enù ka tinulon da mepelihay sa Tigu Datù eg-angat-angatan ta owoy meimatayan ma. Dodox kagdi ma sa anay etaw meenaw egoh di nematay, owoy kagdi ma sa tumulon diyà sa langun etaw, iling ka etaw Hidiyu ataw ka beken Hidiyu, anì melegdawan da danà i Nemula eg-aluk kenagda.”

24Na, egoh i Pabelo eg-ikagi pelawà, egpetaled eg-ikagi Gubilenu Pistu i diyà kenagdi, guwaen di, “O Pabelo, egkelengleng ka dé danà di egsubela dé sa egketiigan ko.”

25Dodox egsagbì Pabelo i, guwaen di, “O Gubilenu, endà egkelengleng a eg-ikagi, enù ka anan tuu polo sa eg-ikagiyen ku

diyà keniyyu, owoy tigtu miulan ma. 26O Datù Agelipa, endà egkelimedangan a eg-ikagi diyà keniko, enù ka netiigan ko anan tuu sa inikagi ku, enù ka endà nelidung di iya wé nebaelan diyà sa langun etaw. 27O Datù Agelipa, enù di ya, egpigtuu ka pa sa kagi sa medoo tegesugkow i Nemula egoh anay? Netiigan ku egpigtuu ka doo iya wé.”

28Agulé eg-ikagi Agelipa i diyà si Pabelo, guwaen di, “Guwaen ko dò migtuu a ma diyà si Kelistu apiya di pa endà melugay sa inikagi ko.”

29Egsagbì Pabelo i, guwaen di, “Iling ka melugay ataw ka endà melugay di, egsimbà a diyà si Nemula anì mekeiling ka kenak, taman sa langun kedoo yu egdineg diyà kenak ini egoh di. Dodox endà egkeiyapan ku duu amuk mepolot yu sangkali iling kenak.”

30Agulé, egtigdeg sa datù owoy sa gubilenu owoy si Bilnis owoy sa medoo duma da.

31Egoh da eglau, egseolomoy da, guwaen da, “Endà duen salà iya wé etaw, owoy endà ma duen sa pesuwan di meimatayan ataw ka mebilanggu.”

32Agulé guwaen i Datù Agelipa diyà si Gubilenu Pistu, “Mebaluy hedem lengaan ta iya wé etaw amuk endà migsasà di peantang diyà si Sulutan.”

**Ini Sa Egoh I Pabelo Inuwit  
Da Dutu Loma Dò**

**27** <sup>1</sup>Na, egoh di neuma sa agdaw keipanaw ké dutu tanà Italiya dò, mig-edà ké sa dakel kumpit. Igsalig da igpebantay Pabelo i owoy sa medoo duma di nebilanggu diyà si Huliyo, sa kapitan medoo sundalu pinengadanan da Umpungan sa Sulutan. Aken si Lukas sa mig-unut diyà si Pabelo. <sup>2</sup>Mig-unut ma diyà kenami Alistalko i tegeTésalonika diyà uwang Masidoniya. Duen sa dakel kumpit kedu diyà menuwa Adelamito mangay diyà sa medoo menuwa diyà tanà Asiya, owoy iya sa inedaan ké. <sup>3</sup>Egoh di umenaw simag, nekeuma ké diyà menuwa Sidon. Eghiduwan i Huliyo Pabelo i, huenan di migtenà anì lumengen diyà sa medoo etaw epgigtuu dahiya anì begayan da sa kulang di. <sup>4</sup>Egoh ké uman eg-ipanaw kedu diyà Sidon, egliwes ké polo tebowon agdaw diyà pungul Sipeli anì meiwod ké sa meleges kelamag. <sup>5</sup>Agulé egbelong ké dagat medapag diyà sa uwang Silisiya owoy uwang Pampiliya. Nekeuma ké diyà sa menuwa Mila diyà uwang Lisiya. <sup>6</sup>Hinaa i Huliyo dahiya sa sebaen ma dakel kumpit kedu diyà menuwa Alihandeliya mangay tanà

Italiya dò. Huenan di, pineedà di kami dahiya.

<sup>7</sup>Agulé tigtu melénég sa keipanaw ké, owoy nelugay sa ketebow ké diyà medapag sa menuwa Nido enù ka egkesungsung ké sa meleges kelamag. Danà di egkesungsung ké sa meleges kelamag, ebgertas ké polo eg-angay diyà sa pungul Kelita. Egliwes ké diyà sa tukò Salmon, enù ka endà iseg di mebagel sa kelamag dahiya. <sup>8</sup>Egdulug ké diyà mantadan pungul Kelita, dodox egkelikutan ké ma doo taman sa egoh ké migtebow diyà sa look, pinengadanan da Mepion Look, medapag diyà menuwa Lasiya.

<sup>9</sup>Danà di nelugay sa keipanaw ké, neuma ma dé sa pista Hudiyu egoh da egpeketuleng sa kepeuloy i Nemula sa salà da. Tigtu melikutan ké amuk uman ké mipanaw enù ka timpù udan, huenan di eg-ikagi Pabelo i diyà sa medoo duma di. <sup>10</sup>Guwaen di, “O medoo duma ku, netiigan ku tigtu mepasangan ki amuk muman ki mipanaw kedu dahini, enù ka medaetan kéen sa dakel kumpit owoy sa lulan di owoy mekesugsug ki ma.”

<sup>11</sup>Dodox endà epgigtuu sa kapitan sundalu diyà sa inikagi i Pabelo, enù ka iya polo epgigtuuwen di sa kapitan kumpit owoy sa épê di.

<sup>12</sup>Medoo sa duma ké meiyap da

lumegkà dahiya, enù ka egpenemdemén da endà iseg di mepion iya wé look amuk timpù udan. Huenan di, ungayà da manan da mipanaw mangay dutu Pinis dò, sa menuwa denu eladan agdaw diyà sa pungul Kelita, enù ka ungayà da mangat-angat da dutu sa egoh sa tanà kumepion.

#### **Ini Sa Egoh Di Duen Sepuk**

13Na, egoh di eglinek dé sa kelamag, guwaen da dò mekelagbas da mangay Pinis dò. Huenan di, egbatunen da sa labù, owoy egdulug ké sa mantadan diyà pungul Kelita. 14Dodox endà iseg di nelugay, tigtu egkeleget dema sa kelamag kedu pungul Kelita. 15Neuma ké sa meleges sepuk. Hê, egkesungsung ké sa meleges kelamag owoy endà dé egpekeukit sa dakel kumpit. Huenan di, egkeanud ké polo danà sa kelamag meleges. 16Agulé egoh ké migtebow medapag diyà sa diisek pungul Kauda, eglineklinek dahiya. Huenan di, iglulan da sa diisek owong tinundan sa dakel kumpit, dodox tigtu melikutan da egbael iya wé. 17Egoh da miglulan dé sa owong, pinolot da tali sa iyug dakel kumpit anì endà melukat di. Nelimedangan da mekesendad sa dakel kumpit diyà sa bekulud dutu tanà Libiya dò. Huenan di, kinukuh da sa dakel layag, owoy

egkeanud ké kelamag. 18Egoh di umenaw simag, tapay doo meleges sa sepuk, huenan di igbuung da sa duma lulan diyà dagat anì endà metegeban ké.

19Egoh ketelu di agdaw, igbuung da diyà dagat sa medoo sangkap kumpit. 20Nelugay endà nekehaa ké agdaw owoy bituen. Huenan di, guwaen ké dò mekesugsug ké, enù ka tapay doo tigtu meleges sa kelamag.

21Na, tigtu nelugay endà nekekaen ké. Dodoo egtigdeg Pabelo i owoy eg-ikagi, guwaen di, "O medoo duma ku, mepion hedem amuk migpigtuu yu sa inikagi ku egoh ta endà pa mig-ipanaw kedu Kelita dò, anì endà medaetan sa medoo lulan ta owoy endà ma mepasangan ki. 22Dodox eg-ikagi a diyà keniyu, pebagel yu sa pedu yu, enù ka endà duen etaw melened. Iya daa sa medaetan sa dakel kumpit. 23Netiigan ku iya wé, enù ka egoh sigep duen sa egsugusguen i Nemula migpehaa diyà kenak, enù ka pineangay sa Nemula egsimbaan ku owoy sa Datù ku. 24Mig-ikagi diyà kenak, guwaen di, 'O Pabelo, yaka egkelimedangan na, enù ka mekeangay ka doo diyà si Sulutan dutu Loma dò. Owoy danà sa kehidu i Nemula keniko, mekelapeg ma mealukan sa medoo duma ko diyà dakel kumpit.' 25Na, o

medoo duma ku, pebagel yu sa  
pedu yu, enù ka egsalig a diyà  
si Nemula owoy petuuwen di sa  
langun tinulon di diyà kenak.  
26Dodoo mekesedad sa dakel  
kumpit diyà sa sebaen pungul.”

27Na, egoh di neuma dé  
duwa kapadian, egkeanud ké  
eg-uwiten kelamag diyà  
teliwadà dagat Adeliya.<sup>y</sup> Ego  
di teliwadà sigep, mig-agtem sa  
etaw kumpit medapag ké diyà  
ilis mantadan. 28Agulé  
egteladeken da tali sa kedalem  
di. Duwa lenet sa kedalem di.  
Agulé sumaup da tumeladek,  
iya sa kedalem di selenet owoy  
lima lipo. 29Egkelimedangan ké  
amuk mekedumpal sa dakel  
kumpit diyà batu. Huenan di,  
egnabuen da sa epat labù diyà  
sa ulinan di, owoy eg-angat-  
angatan ké sa egoh di sumimag.  
30Agulé egtuntunen etaw  
kumpit sa diisek owong diyà  
dagat, enù ka ubòubò da  
lumabù diyà sa sumong kumpit,  
dodoo ungayà da polo  
mekepelaguy da kedu diyà sa  
dakel kumpit inedaan ké.  
31Dodoo eg-ikagi Pabelo i diyà  
sa kapitan owoy diyà sa sundalu  
di, guwaen di, “Endà mealukan  
ki langun amuk endà mugpà da  
diyà kenita.” 32Agulé, eggetasen  
sa sundalu sa tali igtakses diyà  
sa owong anì meanud dé.

33Egoh di buyu sumimag,  
eg-ikagi Pabelo i diyà sa medoo  
duma di, guwaen di, "Kaen yu  
dé, enù ka duwa kapadian dé sa  
lugay yu endà nekekaen.

34Huenan di, egasà a diyà keniyu, kaen yu dé anì kumebagel yu owoy mehagtay yu. Yoko egkelimedangan na, enù ka endà dé duen sa sugsug ta.” 35Agulé kinuwa i Pabelo sa epan, owoy egpesalamat diyà si Nemula diyà sa taengan ké langun. Hê, egtepiyen di sa epan, owoy eg-edung dé egkaen. 36Egoh ké mighaa kenagdi egkaen, migkepion sa pedu ké, owoy egkaen ké ma. 37Duen duwa gatus pitu pulù owoy enim geetaw mig-edà diyà iya wé dakel kumpit. 38Egoh ké dé nebesug, igbuung ké diyà dagat sa langun lulan nesamà anì tigtu lumagpuk sa dakel kumpit.

## Ini Sa Ego Di Nedaetan Sa Dakel Kumpit

39Na, egoh di umenaw simag, endà egketiigan ké duu sa kenà ké, dodox egsugpayalen ké sa look owoy sa mepion mantadan dahiya. Huenan di, egpenemdem da dumunggù sa dakel kumpit dahiya, asal mebaluy. 40Agulé, eggetasen da sa tali polot sa

**y 27:27** Dagat Adeliya sa sebaen ma ngadan sa dagat Méditeliya denu selatal tanà Italiya.

labù di, huanan di neeed sa langun labù dalem dagat. Eglengaan da ma sa tali polot sa suwil di. Agulé binekah da sa layag denu sumong di anì eg-uwiten kelamag mangay dumunggù diyà sa mantadan. 41 Dodoo nekesendad sa dakel kumpit diyà sa bekulud. Hê, nekekadal sa sumong di, owoy nelukat sa ulinan di danà sa dakel lambeg egdagpak.

42 Na, ungayà sa sundalu imatayan da sa medoo etaw egbantayan da anì endà mekekahung da melaguy. 43 Dodoo eghawidan sa kapitan da enù ka ungayà di endà meimatayan Pabelo i. Agulé, egsuguen di sa langun etaw metiig kumahung anì mekehuna da lumaway diyà dagat mangay mantadan dò. 44 Agulé sa liyu etaw nesamà endà metiig kumahung, eg-olul da daa papan ataw ka kayu kedu sa dakel kumpit. Hê, nekeuma ké langun diyà mantadan, owoy endà duen sebaen diyà kenami nesakitan.

#### Ini Sa Egoh I Pabelo Diyà Sa Pungul Malta

**28** 1Na, egoh ké miggauñ diyà sa mantadan, netiigan ké iya sa netebowon ké sa pungul Malta. 2Tigtu eghiduwan sa medoo etaw dahiya kami, owoy egsaluan da kami. Egtmegauñ da kami apuy enù ka eg-udan owoy

egkegenawan ké ma. 3Agulé eglogomen i Pabelo sa kayu. Dodox egoh di migsunù diyà sa apuy, duen sa uled miglesut danà sa keedup apuy owoy mighemued diyà sa belad di. 4Egoh sa medoo etaw Malta mighaa sa uled migtikeb diyà sa belad di, egseolomoy da, guwaen da, “Kagdi kéen sa tegeimatay, enù ka apiya di pa endà nematay di diyà dagat, mematay doo diyà awang enù ka mepiptamayan danà sa salà di.”

5Dodox endà egkesakitan Pabelo i owoy igaipilik di polo diyà sa apuy. 6Agulé eg-angat angatan sa medoo etaw amuk lumebag sa belad di owoy amuk petow mematay. Dodox taman nelugay endà duen hinaa da nebaelan i Pabelo. Agulé nehalì sa penemdem da, guwaen da, “Si Nemula kéen ini i etaw.”

7Na, medapag dahiya duen sa melabel tanà i Publiyu, sa datù diyà iya wé pungul. Eghiduwan di kami owoy pinegemow di kami diyà sa dalesan di kenà ké eg-ugpà taman telu agdaw.

8Egoh iya, eglinadu temù sa emà i Publiyu. Meedup sa lawa di owoy egbelékén ma. Agulé, eg-angay Pabelo i diyà kenagdi, owoy egsabaan di owoy egsimbà diyà si Nemula. Hê, nelikuan sa lukes. 9Huanan di, eg-angay diyà kenami sa langun etaw eglinadu dahiya, owoy nelikuan da ma dé. 10Tigtu medoo sa ibegay da diyà kenami. Agulé, egoh ké eg-edà

sa sebaen ma dakel kumpit  
dahiya, iglulan da ma sa igbegay  
da kenami sa kulang ké.

**Ini Sa Egoh Da Mig-angay Dutu  
Loma Dò**

11Na, egoh di meelut sa telu gebulan, eg-ipanaw ké dema. Eg-edà ké sa sebaen ma dakel kumpit kedu diyà Alihandeliya, pinengadanan da Seping Nemula, sa migdunggù diyà Malta egoh sa medaet tanà. 12Agulé egoh ké migtebow diyà sa menuwa Silakusa, eg-ugpà ké dahiya taman telu agdaw. 13Agulé egoh ké mig-uman eg-ipanaw, egliwes ké tukò owoy egtebow ké diyà sa menuwa Ligiyo. Egoh di umenaw simag, duen sa kelamag kedu kimataan owoy eg-ipanaw ké dema mangay dutu menuwa Putiyoli dò. Nekeuma ké dahiya diyà sa ketelu di agdaw. 14Netelabukan ké sa medoo etaw epgigtuu diyà si Hésus dahiya, owoy eggsasaen da kami anì mugpà ké diyà kenagda taman sakapadian. Agulé eg-ipanaw ké tanà mangay dutu Loma dò. 15Egoh sa etaw tegeLoma epgigtuu neketiig denu sa ketebow ké, eg-angayen da kami egtelabuk diyà sa Padian Apiyo. Duen liyu etaw egtelabuk kenami diyà sa menuwa pinengadanan da Telu Tinda. Egoh i Pabelo mighaa kenagda, eg-looen di Nemula i owoy tigtu egkepion ma sa pedu di.

**Ini Sa Egoh I Pabelo Migtulù  
Diyà Sa Menuwa Loma**

16Na, egoh ké migtebow diyà Loma, endà nebilanggu Pabelo i, dodox pineupgà da kagdi diyà sa dalesan egbantayan sundalu. 17Egoh di neuma telu agdaw, egsetiponen i Pabelo sa medoo ulu-ulul etaw Hudiyu diyà menuwa Loma. Egoh da nesetipon langun, eg-ikagi diyà kenagda, guwaen di, "O duma ku etaw Hudiyu. Apiya di pa endà duen salà ku diyà duma ta Hudiyu owoy endà ma egtipay a diyà sa adat tupù ta, sinigkem da doo aken dutu Hélusalém dò, owoy igbegay da aken diyà sa etaw Loma. 18Egoh da mig-igsà kenak, lengaan da hedem aken, enù ka endà duen salà ku sa pesuwan ku meimatayan. 19Dodox sa medoo duma ta Hudiyu, endà meiyap da amuk melengaan a. Huenan di, migsasà a si Sulutan polo sa umantang kenak. Dodox endà egbulitan ku duu sa etaw Hudiyu, enù ka etaw Hudiyu a ma. 20Iya sa pesuwan di sinetipon ku kiyu anì mesekilala ki owoy seolomoy ki ma. Nepolot a pelà sangkalì danà ku epgigtuu diyà sa nita eg-angatangatan, kita i tugod i Islaél."

21Egsagbi da diyà si Pabelo, guwaen da, "Endà duen sulat denu keniko migtebow kedu diyà tanà Hudiyu, owoy endà ma duen etaw migtebow dahini

egtulon kenami amuk duen medaet binaelan ko. 22Dodoo netiigan ké duen gaa etaw diyà sa medoo liyu menuwa egbulitan da kiyu i etaw egpigtuu diyà si Hésus. Huenan di, neiyap ké ma dumineg sa niko kagi.”

23Agulé eg-atas da diyà si Pabelo. Egoh di neuma sa atas da, tigtu medoo sa etaw nesetipon diyà sa dalesan kenà di eg-ugpà. Edung magtu kesimag taman mahapun, egselepangen i Pabelo diyà kenagda sa igtulù di denu sa kedatù i Nemula owoy denu sa uledin igsugkow i Mosis owoy sa igsulat sa medoo tegesugkow i Nemula egoh anay anì migtuu da diyà si Hésus. 24Duen doo etaw netuuwan da diyà sa inikagi i Pabelo, dodoo duen ma etaw meked da migtuu. 25Endà nesetepeng sa pedu da. Nesepalak da egoh i Pabelo mig-ikagi ini i diyà kenagda, guwaen di, “Tuu sa kagi igpesugkow sa Metiengaw Suguy i Nemula diyà si Isayas egoh anay, enù ka guwaen di denu sa medoo tupù ta,

26 ‘Angay ka diyà sa medoo Hudiyu,  
owoy ini sa ikagi ko diyà kenagda.

Apiya di pa takà yu egdinegdineg,

endà metiigan yu duu sa selepangan di.

Apiya di pa takà yu eghahaa, endà ma hauwen yu duu.

27 Enù ka metegas sa ulu da anì endà meketiig da, owoy sinagpeng da sa telinga da anì endà mekedineg da, owoy miglipedeng da anì endà mekehaa da.

Dodoo amuk eg-ekedan da iya wé, metiigan da doo sa kagi ku

owoy metuing sa pedu da diyà kenak  
owoy migtuu da diyà kenak,  
owoy alukan ku ma kagda,  
guwaen i Nemula.”<sup>z</sup>

28Na, ipetiig ku ini i diyà keniyu. Netulonon sa medoo etaw beken Hudiyu sa kagi i Nemula denu sa kealuk di kenagda, owoy migtuu da polo.”

29[EGoh i Pabelo mig-ikagi iya wé, eglegkang sa medoo etaw Hudiyu owoy egsesigbolowoy da temù denu sa inikagi di.]

30Na, taman duwa gepalay eg-ugpà Pabelo i diyà sa dalesan sinagbayan di diyà menuwa Loma. Tigtu eggaluan di sa langun etaw eglengen diyà kenagdi. 31Egtategudon diyà kenagda denu sa kedatù i Nemula owoy denu si Datù Hésus Kelistu. Endà egkelimedangan di egtulù, owoy endà ma duen eghawid kenagdi.

<sup>z</sup> 28:26-27 Basa ko Isayas 6:9,10.